


ANAVA FETALAI



Tele'i'ai Fanaeā Christian Ausage

Upu Tomua:

Faasino Mataupu	
Upu Tomua	7
Faafetai	8
Folafolaga o Meaai & Sua	10
Sufiga o ‘Ava	23
Folafolaga o ‘Ava	31
Tufaga o ‘Ava	43
Lauga Usu	50
Lauga Tali	66
Lauga o Sii o Maliu	72
Lauga Tali i Paolo Eseese o Maliu	80
Lauga o Talaga Teu ma Liu Tofaga	94
Lauga o Nunuavaga/Faaipoipoga	100
Lauga o Umusaga/Faaulufalega	105
Lauga o le Usu Gasegase	112
Lauga o Saofa’i	118
Lauga o Ifoga	122
Lauga Faafetai	128
Lauga e Momoli ai Faifeau	139
Lauga o le Faafaiavaina	144
Lauga o Taalolo	148
Folasaga Eseese	154
Tuvoga Eseese	165
Solo ma Saaafiafiga	180

O le a taoto ia le lafialalo o paia o Samoa le atumuu tofi, auā e leai se tufuga faafialima maeaea na te toe atofuli faaleatoa ou mammalu va i vanu ma le tifa to, auā o Samoa le atumuu tofi, e le taliola pe tala tau e pei o Toga, o le fare foi ua soo taiao lona atuao ma e tulutulu i tao, tulou. Taoto la ia faamaene i le tai loloto i Tootoo o le Motu Sa, Tama Matua, tainane le Usoga a Tumua ma Pule paia ia mai le oneone le usitia i le Tai Samasama, a o faanae lupe le la, se ia pa ia le oneone sina o Nafanua i lona Tai Uilaula, ina ua ifo o le taulaumea, tulou, tulou, tulouna lava.

E le vaea le fala na aami i lagī, i susuga i Ao faalupega o lo’u nuu o Samatau, tainane le Pulega ma auauna a le Atua o le Misiona Samoa o le Ekalesia Asofitu o le Toe Afio Mai, ou te faatulou atu. E le toe soli tapiga e se faamatalaga le a’ua’u ou sa le avea ma ou mammalu le toesea. Faalelepa ia o outou paia faale-talaalei i le Atua, o le e ou mea uma.

O le Faafetai:

Ae mua a'i le faasagi i le Atua o le fuā, o lona aao taitai ua tini pa'o ai le uto e pei o upu i faiva o le tapalega, e tauala i lenei galuega. Seanoa lava lona agalelei, e atafasaina faafuga o laau e toulu se vaivai e faufau ai ni manatu, aua alo ma fanau o lo o utuvai magalo i le poto salalau i le Laumua o le Saili Atamai o le Kolisi Tuuifaatasi o Amerika Samoa.

Faafetai i suli ma feoi o le talalelei, i lo latou nono manū i talosaga, inai ia a'e malo taumafaiga a tama fanau o Niupai, Samatau; e ui lava ina o lo o taase i eleele ese, ona o le saili manuia awa aiga o lo o tapuai mai ma tu'i o le mulipapaga.

Faafetai i lo'u nuu pelle o Samatau, le paia i le Falefa o Usoalii, Fiamē ma Gafa, tainane lau Saofaiga i le Nofo Ituāga ia Leulumoega. Faamalo le tatalo, malo le faamalosiau, na tupu ai le loto tele a o feagai ma lenei galuega.

Faafetai faapitoa i lau tofa i le Avaganofoa – Pumi Raea Puni ma le Ao a Matua i le suafa Tele'i ai, tainane le paia o le nofoasuafa ma le mamalu o le Aiga Sa-Puni i Samatau, o a outou talotologa, lea ua a'e malo ai le faiva sa taumafai i tauasaga e tele ua tuanai.

Faafetai faaopoopo i lau afioga i le Faatonu, Okenaisa Fauolo ma le Ofisa o Measina ma Aooga a Samoa – SSI: Samoan Studies Institute mo la outou tuualalo ma fautuaga i lenei galuega fita. La faamanua le Atua i o outou tiute ma nafatotofi.

Faafetai sili i le Sosaiete o le Lavea'i ma le Pulega, mo le faatupeina o le lomiga o lenei tusi o lauga, e toomaga i ai ni isi o le atunuu mo se fesoasoani.

A muli a'i se faafetai, i lau afioga Sepuanume Simolo Ai'i Faile Ausage. O oe lava o le matua faitama, o lau tui mumusu lea ua oloa luuluu ai le tusitala ina ua meā i upu o le ituaso, ae sili ai le itu faaleagaga, ua afua ai ona tino lenei galuega sa punoua'i ai.

Auvii

1. Folasaga – Upu faano fogofie po o Upu faanofo filemu.
2. Faalupega o tagata o lo o folafola agai i ai le toonai.
3. Faalupega o tagata na aumai ai le toonai.
4. Folafola loa le maau.

Iloiloga o vaega taitasi o le auivi

MATAUPU 1:

Folafolaga o Meaii

Folafolaga o Toonai o se aiga/aulotu/nuu.

Folafolaga o Tāuga i se alaala faga.

Folafolaga o Asiga o se malaga.

Folafolaga o ‘Ava o se fono po o le fono o le ‘ava.

Folafolaga o Meaii o se galuega (nuu, ekalesia, autalavou).

Folafolaga o Sua

Folassaga – Upu faano fogofie/Upu faanofo filemu

E faaaoga e le tagata folafola toonai alagaupu ma muagagana e tomua ai sana solo puupuu i le amataga o lana folasaga. O alagaupu e afua mai tala tuu taliga ma tala o le vavau, lea e lagolagoina e ni pine faamau ma lagi soifua e faamaonia ai. O muagagana e afua mai i le siosiomaga faanatura ma faiva o le atunu sa faatino ai le tauutu tuāvāe i aso ua mavae. O nei faiva e aofia ai le seuga lupe i le tuāvao, atoa ai ma le alofaga faapea ma le lelepaga po o le lelepaga malie sa faatino i le tuāau. O taaloga foi, poula, tala o taua, faaipoipoga, saofai ma isi fesilafaiga o le atunu, e maua ai foi isi upu e faaaoga i amataga o isi folasaga.

E masani isi folafola toonai ona faaaoga upu faaonapo nei po o upu e foliga o ni vaogagana faale talalelei. *Ft: Ua tala mai le lagi galuega a le Silisili Ese, na faaia foi i le vanimomimo galuega mama-na a ona aao.* Atonu e le namu Samoa i se faafogaga a isi, ae ua mafai lava ona talia i o tatou manatu faalotoifale, ona o le pījama ma le pīoia ai o tatou itu faakerisiano ma la tatou aganu e pelei i o tatou loto.

Faalupega o tagata o lo o folafola agai i ai

E taua faalagiga o tagata ia sa’o lelei ma lagotonu i lona taotoga lemu. O le mitamitaga o so o se tagata Samoa, o le sa’olele atoatoa ona faalupe lona faalupega ma lona faasimomaga. E taua le malama lelei o le tagata folafola toonai i faalupega o tagata ua potopo-to, ina ia lelei i le faafogaga a le aofia le amoia o lana folasaga.

Faaalupega o tagata na aumai ai le toonai

E taua tele foi faalagiga o tagata na maamaau ma milomilosis i le gaseseina o nei toonai. E le pa'u fua le afu sisina ma le oloooloia o tatou tagata i le gasesegia o taumafa, auā le taliga o le sua ma taimi o tautega i so o se saofaiga. O le mafuaaga lena o le faailo o le fogatia, ina ia silafia e sa napatia i lea foi nafa taua.

Folafola loa

O mea sa sau a'i le atunu anamua, e muamua ona folafola o'i po o inai o le toonai. E le tau aumaia i fafo mea aano e pei o fuāuli, maualuga, līlī po o ni sofesofe. E faapena foi i palusami po o ni fai ai afifi, e lelei ona faailo, ae tuu pea i totonus o le ato ina ia aua nei tele isi galuega e fai e le tagata folafola toonai.

O le maau uma e folasia i lumamea, ina ia mafai e le talaluma o lea saofaiga ona fai la latou pule i ni ato e fū'e ese mo i latou ua lautogia, po o ni aiga foi e tuaoi ma le nofoaga lea e gao ai nei taumafa. O mea ua totoe, ona lufilifi lea e tali ai le sua.

Ni isi o faataitaiga o Folafolaga o Toonai

Faataitaiga 1

O lea ua mapu nei i le sasaga le utuga taufa ia Keriso ma lana upu folafola, sa manavaina e le sui o le Atua i luga o le fata, e taitoalua ai o outou finagalo, e tauhua ai i le Atua ma lona malo. Ae o le a mamau ia ma maua'a i fala matū paia lasilasi o le ekalesia (*faalupega o le ekalesia e masani ai, faatasai ai mani isi o lo asiiasi mai*). O paia o le atunu u faaetegatā, ua taoto, a o se ala o'o ma ona pa le solo, o le a faataalolo, tulou. Ae avea ia paia o le Atua, e lanutasia ai o tatou tagata, ae a le asō ma la tatou toonaiga i le maota o le galuega. La maotua ia so'u nofoaga, ae magalo lo'u leo. O le a ou tautala i le maau ma le milomilosis, ola tatou faitoonai lenei e fai ma o outou fofoa taumafa i lenei foi aso sapati o le Atua.

lasila toto'a i susuga i tiakono, faapea le nofoatoofi o le ekalesia i ona vaega e fia. E le vaea foi le fala sii gatā, i paia lasilasi o malo, tuafafine ma uso valaaulia, ua mafai ona tatou mafuta ma fai tapuaiga faatasi i lenei ekalesia (*ta'u faalupega o tagata valaaulia, pe afai e te silafaina*). O la tatou faitoonai lenei o le ou folafolaina atu:

O le toonai lenei a le susuga i le Faafeagaiga ma le Faletua

Ua i ai i'a mai le moana e 2

1 le apa papalagi, pisupo 3 pauna
Fuāuli ma palusami ua i tua nei
Faalu se leo, ua i ai ma la outou vai vevela ua mae'a tapena i ona vaega eseeesse

O le susuga i le A'oa'o (*suafa o le tagata*)

1 le filiga

Kuka eseeesse ua mae'a ona teuteuina matagofie
Maualuga ma palusami ua i tua nei

O le tama matua ia (*suafa o le tagata*)

Ua i ai le manu mai le lafu

Maualuga ma fai'ai affif ua i tua nei

O le toonai lenei a le tina matua ia (*suafa o le tagata*)

Ua i ai le manu mai le lafu

1 le moe piiilima

Fuāuli ma palusami ua i tua nei
Afioga ia (*suafa o le tagata*)

1 le ta'ai fa ua mae'a faavela lelei
2 afi fāpulou
Fuāuli ma palusami ua i tua nei
Tofa ia (*igoa o le tagata*)

2 tu'e ma le fai'ai ola e tasi
2 fagu sami saunia lelei
Tasi ae lua so'u leo, e hu'a ea vailolo ua mae'a tapena.

Ia faliu ia le silafaga maualuga i lau susuga i le Faafeagaiga, o le tama lava lea o le galuega, sa feagai ai ma le luluina o le fatu o le talalelei i le asō, tainane le faletua. A o se maimoa malamalamā i susuga i A'oa'o (*faaopoopo i ai faletua, pe afai e i ai ni faleitia*). Se si-

O le aotelega o lo outou fofoga taumafa i lenei aso

- * 3 filiga po o'i a mai le moana
- * 1 le apa papalagi – pisupo 3 pauna
- * 1 le manu mai le lafū
- * 1 le ivi/tua o le manu
- * 1 moe piiima
- * 1 le ta'a'i fa ua vela lelei
- * 2 afī faapulou
- * 2 tu'e
- * 1 fai'ai ola
- * 2 fagu sami
- * Atoa ai ma kuka eseese ua mae'a teuteuina lelei

Ia, to mai le pule i lo o outou talalumaga, ona lufilufi ai lea o la outou tautega i lenei aso paia.

Faataitaiga 2

Ua vili nei le foe a le tautai a'e, ma ua ifo tonu nei le u o le tologa i le feau sa alagaina i le 'Ala ma le Mila o le Atua i le asō. O lana upu sa folafolaina i le fata, ua fai lea ma vailaau aoga, e moltinu ma mili'u ai o outou finagalo, e tömatauina ai tiute ma galuega ua totofi e le Atua, tatou te galuhue ai mo la ma lana upumoni. O paia o le atunuu, mai le totogo a'e o le la i Saua, se ia pa ia le tauaumea i le Alataua, o le a nuumu atu, i faleupolu totofi o le Faleagafulu ma le Motu Sa – Tama Matua ma Tootoo, auā o lo latou nafa tausī lea, e pui-pui malu i paia ia o Samoa. O paia o le au valaaulia, e i aile lagona o le a faalepa ma nona i tootoo au ma le autalaia o Samoa. A o le asō ma la tatou fesilafaiga, tapā ia i lagī ona mamalu, e lalanu faa-umaaveave faatasī ai lenei saofaiga.

E mactua ia se nofoaga, ae magalo le leo o le auauma. Ae liliu ia se silafaga maualuga i lau susuga i le tofi, lau susuga i le Ao Faalupega, o le sa tu i le foe ma fai ma sui o le au osi taulaga o Sa-Levi ma lona nofo-a-intuaiga, e faaleo le finagalo o leova, e tusa o lenei aso sapati. A o se maimoa manino i susuga i'A'oa'o, tainane foi se silasila maua i le nofoatofi o le ekalesia ma lona loaloa i ona tafa e fia, tulou. E le tavavaea foi le paia tele o malo ua affio mai ma tala mai aao,

tatou te vagavagaia faatasī lenei laoai i le asō. O la outou fai toonai lenei o le a ou taumafai e folafolaina atu:

Folofola loa, e pei o le faataitaiga o lo o le pito i lugua.

Faataitaiga 3

O oleua faafosoga leova i le taulaga sūtia e ala i le feau lea ua silimea nei, e pei o upu i seuga. Ua tala mai foi la i le lagi lona mama-lu ma ua faailoa i le vanimonimo galuega mammā a ona aao. Tau ia ina ia to fatu i moana ma nofo fale Sa-Tui ia Maa le upu sa lufilufi i lenei aso e fai ma areto o le ola, e fagaina ai lo tatou soifua faaleagagi i lena foi vāiaso fou o muamua. Ae faiu ia se silafaga maualuga (*faaaau loa i paia ua potopoto*)

Faataitaiga 4

Ua tē'a nei sa o uila ma ua motu i lagī le fētu ta'i matagi. Ua mae'a sula lapalapa o malo ma momoli laau i Fogaa, o le viiga lea lava i Matautu aai. Ae silafaga maualuga ia (*faaaau loa i faahapega o tagata ua mafai ona afiio atu i le toonai*).

Folafolaga o Tauga i se alaalfaga

E tutusa lelei lava le auivi o le folafolaga toonai ma le folafolaga o tauga i se alaalfaga. O le alaalfaga o se tasi lea o faiga 'ai a Samoa e pei lava o toonai ma isi ituaiga faiga 'ai. E faatinō se alaalfaga pe afai ua toai taunu le uto i fanua i se malaga a se totino o se aiga ua leva ona aumau i atunu i fafo, a o lea ua maua le avanoa e malaga asiasi mai ai i aiga. E faatinō foi se alaalfaga i se tagata ua te'a mai se maota gasegase, talu ona faataotolia sona gasegase. E faatinō foi pe afai ua ola se pepe fou po o se po muamua o se faifeau ua mae'a momoli i sona nuu. E afia ona folafolaga o taumafa ina ia silafia ai e le aofia ua potopoto lo latou lava maau ma le milosia lea sa taitai mai e fai ma fofoaga taumafa

Faataitaiga

O le a taoto ia famaene i le tai loloto paia o lenei affafi o tamaiiii. Ae o le a to'a ia faatagi i le vasa mammā o le susu mai o lau susuga i le Faafeagaiga taulagi, o le sa manavaina le upu a le Atua e tomatauai-

na ai lenei faamoemoe. Pāpā le gaeē foi la paia sautuaoo o le affiō mai ma tala mai o aao. O le a sala ia le nofoaga ae magalo se leo e faailo le fogatia e ala i lo outou olooloia ma le gapatia, aua se fa'i fua mo lo outou fosoga taumafa. Faliu ia se silafaga maualuga (*faalagi lelei loa ia sā' o paia o tagata ua potopo i le aalaafaga, paia o tagata na maau i tauga taitasi, ona folafola lea*)

Folafolaga o Asiga i se malaga

E le salaese se taofi i le faaaogaina o le auivi lava lea e tasi e folafola ai asiga o se malaga. E tau aao e tagata asi malaga ia taumafa, ae tuu aao mai e tagata malaga ni lafo tipe e fai o ni mea alofa e tali a'i le agalelei ma lo latou alofa tulai. E masani le atunuū i le soā fuaītai, e le avatu ni lo ae toe aumai ni lo. Peitai, o le tu lea a Samoa e massani a'i, o le fefaaaloalo a'i. E fefaaaloalo atu, toe fefaaaloalo mai foi.

Faataitaiga

Ua toia nei a'u i le ulia ma le titi lavatoa ona o le faaaloalo lea ua opea i le maotaga. Taoto la faagalu le fati paia le popo ma mammalu o le faiga malaga, tainane ona tulaga faalupe ua manuteao i lenei aso. Ae ua utia a'u i le va i agia, ae omia i le va o galu, talu lau faaaloalo ua tetele. La mao tua ia la lo'u nofoaga, ae magalo se leo ma se fāamatлага, sei o'u liliu ane e failo le fefaaaloalo maualuga lea ua folasia i lumamea. Faliu ia se silafaga (*faahipega o tagata o le malaga ma faahipega o tagata na maauina le fefaaaloalo, ona folafola lea*).

Folafolaga o fono o le 'ava po o ni meaai i taimi o galuega

E tog i tasi uma ma lautusi e tasi le folafolaina o toonai, tauga, asiga ma fono o se 'ava po o ni 'ava foi o se fono. E fono faapipi ai foi le folafolaga o ni meaai i se suega manu a se nuu, galuega a se ekalesia po o se faalapopototoga. E masani Samoa i ana tu ma aga, e le gata ina tau aao se totogi o se galuega, ae ao foi ona tuu aao i ai ni taumafa, auo o fefaaaloalo masani ia a le atunuū. E le numuria e pei o le uto ma le maene tu ma aga fefaaaloalo a Samoa ma isi atunuū. O le mafuaaga lena e ala ai ona malosi le tausia o le va tapuia o tagata e tusa o lo latou va tuu nonofo.

Faataitaiga 1

Ole a ou le toe faloina le afā loloa pe toe ta i utumaua paia faatoototo o lenei aso, auu ua mae'a paniniu i le itula ua sola ma le taimi ua fano. Taoto la sa ma faiga o lenei aso i tulatoa e tausi vaatele i le tupuatausi lea ma le laoai (*igoa o le malaefono o lea mu e fai ai lea saofāiga*). Ua lāga se leo ona o lo outou fosoga taumafa e ala i 'ava sa umia mai, auu le faamatagoifieina o lenei faamoemoe. Faliu ia se silafaga maualuga (*faalupe loa tagata o lo o i ai, faalupe le tagata malana 'ava, ona folafola lea*).

Faataitaiga 2

Ole a ou le toe ta i tua le tili auā pe tailia tulafāna i sa ma faigata. Faataaloalo la paia o lenei aso auu e le mafai ona ou toe seu taflia le naa, ae ao lava ina seu mataoaga, e pei o upu i seuga o le tuāvao. Sala ia la le leo ae sei taumafai se faamatalaga, auu o lea ua opea i outou luma le fefaaaloalo lea ua mae'a teuteuina i ona vaega eseese. Faliu ia se silafaga maualuga (*faalupe loa tagata ia e folafola agai i ai, faalupe le tagata na maauina le fefaaaloalo, ona folafola lea*).

Folafolaga o Sua:

Auivi

1. Folasaga – Upu faanofogofie po o Upu faanofo filemu.
2. Faalupega o le tagata o lo o folafola agai i ai.
3. Faalupega o le tagata na saunia le sua
4. Folafola ma faailo loa le maaau

Iloiloga o le Auivi

E le o toe pomalaē le atunuū i le uiga o le sua ma ona vaega eseese. Tau lava ina toe faamanatu e tupu ai tele le silafia ma tamau i finagalo o tagata a'oga lona uiga ma lona taua.

O le Sua Ta'i – E afua ona manau o lona igoa ona o le taga o lo o faatinō e le tagata ta'i sua. E feagai tonu ona fofoga (mata) ma le vailolo ona ta'i lea, e afua ai le upu Sua Ta'i.

O le Sua Tautē – E mafai ona faalautele le upu tautē i le tautega. O lona uiga, o meaai e avatu e tauusami ma tali ai le sua i le taimi lava lea a o fesilafai paolo, gafa ma aiga.

O le Sua Talisua – O taumafa e ave e malo, paolo, aiga po o le tagata na ta'i ai le sua, e toe talisua ai pe a toai taunuū le malaga i lona aiga ma lona faasinomaga.

E autasi le manatu i le faaaoga tutusa lelei o le auivi e folafola ai isi taumafa ma le auivi e folafola ai sua faatamalii. E pau lava lona eseeseaga, o le nofoaga e faatinō ai nafa o nei folafolaga, atoa ai ma le suiga o le leo pe a folafola o sua i fafo o maota ma laoa.

Faataitaiga 1

Ua see lilia nei Ulufanuasesee ma ua ou nofo foi i fala gatete, i lau faaaloalo ua tetete. Ua li'a ai nei ita le ugapepe, ma ua sausau fialele le manu sa moe i Utufiu, ae sagisagi faamanuao le manu sa moe afusia, i lagona o le meemee ma le faagaeetia. Ua omia ai nei au i va o galu, ae utia i le va i agia, i le faaaloalo maualuga ma le teu faatamalii. Ua toia ai nei a'u i le ulia ma le titi lavatoa i lau teu faatupu ma le aga

faafaleupolu. Ua paia ai nei falo, ua patia fate, o lugā ma lalō, i lau faaaloalo ma lau pule to. Se ua o se i'a e moe mauga o Salafai, auā ua e faatiertie Sa-Asomua i le mauga, ua mapuepue ai le asō i le maotaga, ae seu silasila i le tupua ma le laoai (*igoa o le maota/laoc/mu/malae*).

Ae liliu ia se silafaga maualuga i lau afioga/tofa (*falaupega o tagata o lo o folafola agai i ai le sua*). O le faatupu ma le faaaloalo lea ua opea i le (*igoa o le maota/malae*), o lea sa tauao ma maamaau i ai le afioga (*tau le igoa o le tagata ma lona aiga na latou saunia le sua*). O lea o le a ou folafolaina atu:

Ua i ai le Sua Ta'i:
Le vailolo/su'iga ma le ufi laulau o le vala (lea ua suaia i ie papalagi i nei aso)

Ua i ai lau Sua Tautē:
Le amoamosa/ laulau faatupu/laulau talo – o le moe piiilima ma le faavevela

Ua i ai lau Sua Talisua:
O le Alafa (manufata)/ Ta'ai fa/ Pusa pisupu/ Vae o le manu/pusa i'a (*pule lava oe po o fea o nei mea e fai ai le sua talisua*)
'Au'au le faatamalii lea i le maniti a tamalii.

O lea foi ua saunia le tofa, e laei ai le faaaloalo faatauvaa lea.

Faataitaiga 2
Ua ou tu nei i siui ae sausau i le moana, auā ua liligo le fogatia, ua paū foi le tuāvao maifua malu i le faamoemoe o lenei aso. Ua taafi ai nei le lupe sa saili mafua, ina ua ifo i le toaga le tuamafa na fili i malae, ao alofaiva le seuga i le fogatia. Ua saa ai nei i le tai le tapuaiga a le autaliuta ma le autalimaua i lau faaaloalo ua tetele ma lau pule ua faiva ese lo Pepe. O lea ua matamata nonofo ai nei le seuga, a o e alofaiva i lau faiva pule ma le faiva o faaaloaloga. Ua e faalele nei le lupe o le vateatea, ina ua ifo, tu i le tula, tu i le lima le faaaloalo lea ua mapue ai nei le (*maota/malae*). Ua taele ai nei le se, ae 'au'au le pepe,

Sailili Atili

auā ua e faafo le faga i Lalau ma le faga i Foa. Ua e faamalie le galala o le papa o Galagala ma le papa o le Faatolotologatama, i au aga fatatupu ma lau tiu fatatausala i au faaaloaloga.

Faliu ia se silafaga maualuga (*faalupega o le tagata o lo o folafola agai i ai le sua, faalupega o le tagata na aumai ai le sua, ona folafola lea*).

Manatu faaopoopo

Ua faamamafa i lenei uluai mataupu o le tusi le taua o upu nei e tolu.

Silafaga:

Ua faapitoa lava i le folafolaina o so o se ituaiiga meaai, e pei ona ta'ua i le ano mataupu o le tusi. O lona uiga, e le talafeagai le toe faaaoga o le upu silafaga i ni isi mea e le o ni taumafa.

Ft: Silafaga maualuga maia le paia (*faalupega o tagata*)

Sila alofi/Sila le'a/Sila 'ava:

O le folafolaina lea o 'ava o se alii taeao ma se usu faaaloalo. O le alofi ma le agatonu, o isi ia vaogagana o le 'ava. Afai o le Le'a le isi igoa o le 'ava, e tatau foi la ona i ai se upu o le "silale'a" po o le "sila'ava", auā e uiga tutusa lelei ma le upu o le sila alofi.

Ft: Silaalofi maia le paia o le faigamalaga (*faalupega o tagata*)

Sila malo/Sila toga:

E faapitoa lava lea upu i le saoga o toga i taimi o faalavelave. O le faafitauli tele ua tulai mai, ua faasoloatoa ona faaaoga le upu silafaga i 'ava ma toga.

Ft: E lelei ona silalamo ma silatoga lo tatou aiga i a tatou saofaga nei.

Manatu anoa muamua – O lo o tala faamuli auma eseese finagalo o le atunuu i le mau e faapea: E le uitaiia ni meaai i se toga a le atunuu, sei vagana ai se sa o le tagata ua tuumalo, usufono pe maliu. O le pogai autu lena ua mamunu ai le auivi o le folafola sua ina ia ta vavae ese le faaaogaga e tagata a'oga o le upu uitai, ona o le mau tauave lea. Peitai, o lo o agiga pea i le faafofoga a Samoa le upu uitai, e toomagai i ai se vagana a se tulafale pe a oo ina ta'i o ni sua faatamalii i se faa-lavelave.

Manatu anoa lona lua – Afai e le talafeagai ona faaaoga le upu uitai e faaiu ai ni taiga sua, faamata la po o a isi vaogagana e ono talafeagai ona faaaoga?

1. 'Au'au atu le faaaloalo lea i le manii o tamalii
2. Molimoli atu le faaaloalo lea i le ie o le malo
3. Ua tālā foi le toga ma le malo, e laei ai le faaaloalo lea.
4. O le 'ula o le faaaloalo faatupu lea, o le ie o le malo.

Manatu anoa lona tolu – E tusa ai o tulaga faaekalesia ma tapuaiga ua oaoa ai nei i faleseu ae saa i maa o malie ni isi o le atunuu, e afua ai ona le faaaogaina ie o auafa e fai ai ni tofa o ni sua faatamalii ma 'au'au ai le ta'iga o sua faatupu, ae ua apaapa i seleni e laei ai tulaga ia ona o le maualuga o le tamaoaiga ua tagolima i ai o tatou lava tagata. Atonu e le afaina nei suiga, auā ua o tatou masani lava i le soā fuaitau e faapea: E fai lava suiga, ae mausali pea lona faavae papa. Faamata e talafeagai lea 'suiga'?

Manatu anoa lona fa – E talitonu ni isi o toe ultaia o le aganuu, o ta'iga sua, ua o se faaaloaloga e maoae lona maualuga ma sa faapitoa lava mo tamalii. E afua lea tulaga, ona o le tautua tuāvae lea a le atunuu i o latou tamalii. Peitai ane, o nei aso ua tatou matauina suiga. Ua mafai ona oo atu le malosi o ta'iga sua e aofia ai ma tamaitai, o tulaga o tagata i galuega, e oo lava i le tulafale na fetalai i lea faamoe-moe, ua ta'i foi lana ia sua. O le a se silafia i ai o tagata a'oga i lea tulaga?

Manatu anoa lona lima – O lo o taofii ni isi o le atunuu, e le ailaoina le folafolaina o sua faatamalii i le Falesefulu ma le Motu Sa. O le talitonuga o isi, e patino lava suafa o lo o faaaoga e ailaao ai sua faatamalii i eleele o le itu i sisifo o Samoa, ae le aofia ai Samoa i Sasae. E le faapea la ua leai ni igoa tautana e ailaao ai le folafolaina o a tatou sua i Tutuila nei, ona a'e lea o se manatu ua sese la tatou nafaa o lo o faaaau pea lona faatinoga i o tatou aiga, nuu ma ekalesia. O nei suafa masani lea e tele ina faaiu ai le folafolaga o sua e aofia ai le:

Tui-aana
Tui-atua
Gatoaitele
Vaetamasoalii
Malietoa

Manatu anoa lona ono – O a tonu lava taimi e folafola ai sua i se maliu? Afai lava e tatau pea ona faailo le maau ma le gapatia o le paia o aiga, o fea tonu lava le taimi e ailaao ai ia faaaoloologa ma le nofoaga e talafeagai ona folafola ai, aua e le i tatatalaina lagi o maliu, e tusa o lea talitonuga o le atunuu?

Manatu anoa lona fitu – Faataitai loa ona tusi sau folafolaga o meaai po o se folafola sua e faaaoga ai le auivu ua tuuina atu.

MATAUPU 2:

Sufiga o 'Ava

'Ava:

O le 'ava o le taulaga osia lea e momoli i atua o Samoa anamua, e alofi fesilafai ai le atunu ona o le puipuiga saogalemu i se malaga. A toai taunu manuia se malaga e tusa o le faamoemoe na fau ao ma fau po ma lavasi, e uluai fesilafai i le 'ava o le feiloaiga, e momoli ai le faafetai i atua ma ilamutu sa puipuia i latou a o asa i le ala pe folau i le vasa. E mafua ona fai o 'ava, e fai mo malo, ae le o i latou o lo o usu faatali. O le 'ava e momoli ai lapalapa o malo ona ua le afea se atua o le ala a o malaga.

ma tuutuu laau faamanuiti mai i le ala. O 'ava sa masani ona faatinio i malae tetele, peitai, o lea lava ua suiga malie e fatino i maota ma laoa. O le 'ava la i lona aotelega, o le *Taulaga Faafetai Mo Le Saogalemu*.

Sufi 'ava:

O le tagata sufí 'ava, o le uluai leo lea o le alii taeao ma le usu-alele po o se usu faaalaoalo faatali a se nuu/aiga/ekalesia o lo o talimalo. Ole uiga o le upu sufí o le saili, su'e, ao, aami ma faailoa 'ava. E ui lava ina tele 'ava e umia atu i se alii taeao a ni tamalii ma se usuale a le nofo a faleupolu po o ni tulafale, tainane le usu faaalaoalo a malo usu ma Samoa ua poto i le futiafu e tasi, e saili lava na o 'ava lelei e sula ai le agalelei o atua o Samoa anamua. O isi 'ava e saili mai, e fai lea ma 'ava oso o le faigamalaga. E mafua ona saili na o 'ava lelei, ona o lea ua osi le taulaga e moomia ai mea silisili, e pei ona saili e o tatou tagata i nei ona aso mea silisili ona lelei, e fai taulaga ai i le Atua o i le lag. E le o se lauga le sufí 'ava, auu o lea ua oli tao le tagata po o le tulafale o le a lauga usu.

Faataitaiga 1

Ua faatau ata nei le la ma le masina, ina ua lupepe le taumau ulu, ua liliigo foi le fogatia, ua tau fai 'ai le ofeloa ma le matila i paia faataotooto o le taeao, lea ua faavaotutui ma manutoao i (*igoa o le maota po o le malae*). Ua tago i ula, tepa i ula, ina ua lau i ula le asō, ina ua tatou fesilafai i magafetau soifua i luma o le nuu, ae le o le loiifofoga maligi ma le tagiu'u. Ua tatou feiloai i le masina ua atoa, ae le o taape o papa ma le tusipa o le aniva. Ua talaga pasina foi le taeao ma le aso, ina ua sanisani faamanuao ma ua sausau fialele le manu sa moe afusia i lagona o le taeao ua maualuga, ua malutauee, se ua sa, auā a lūlū le aveō, ua sa le pisa, ua sa foi le pa'ō. Se ua moni upu a le atunu, ua sau le vaa na tiu, tau mai i le vaa na tau, a o lo o mamau pea lago o le vaa na fāō afolau. Se mea ina lelei o uso ae non-ofo faatasi pei o la le fatu pese o Tavita. Ua tatou feiloai i vae lupe maua, ae le o vae lupe saa. Ua tatou umufono talatala i le soifua lagi mama, ae le o se gasetoto o le la. O lea ua tatou ulu mea fatu fala i le laolao matagofie, ina ua tulia ala o manu, ae tuua avanoa lelei, tatou te fesilafai ai i lenei taeao ua liugalua.

O paia o le taeao ma le aso (*faalupega o le malaga*), alo maia, se i ou liliu ane e tau saili se aano a tamalii (*faahupega o le itu usu*), e fai ma 'ava taumafa, a o se 'ava taute, e pati aao ai ma pati lima lo tatou taeao fesilasilafai. Sau se taulealea.

Tau aao mai 'ava o le talaluma (*faleupolu, tulafale o lo o i hma*). Amia 'ava o le matuatala ('ava o tamalii) Aumai 'ava o le faamoemoe (fala 'ava pe afai ua siumi).

Toso le fala 'ava i malo.

Auvivi

1. Folasaga – Upu faanogofie po o Upu faanofo filemu
2. Faalupega o le malaga
3. Faalupega o le itu usu
4. Ao loa 'ava

Faataitaiga 2

Ua liliigo le fogatia, ae pau le tuāau mafua malu. O le taeao tupu, le taeao totoa, le taeao manimo, le taeao o manū, ua le atafasaina, ae ua atasina ma galu ua le fati toto, e pei o le upu i taeao e ono. Ua

fati sisina nei galu ma auma o le gataifale, ina ua feagai ma ali' peau molioo. O lo o fesilafai vaelupe maua, ae le o vaelupe saa. Ae lepa i le foe le aleaga a le fuavaa a tamalii, ua aofaga i'ula le maota, ua manalu foi le upega lauga. Ee maia i o outou seetaga malu i le paia o le talaga, i le afio o (*faahupega o malo ua valaunia*), tainane foi lenei itu o le malu (*faahupega o le itu usu*). Ae taumafai maia sa tatou 'ava au a faigata a tatou malo faaaloaloa.

Faataitaiga 3

Ua paū le tuāvao mafua malu ina ua ifo le fufui i le fogatia. O lea foi ua tau fai paea le ofeloa ma le matila, aua o paia o lenei aso e faaufigatā e pei o upu i le Siisialafia ma le aiga Salevaio. O paia i lena tala na atoa (*faahupega o le malaga*), a o se seu silasila foi ma se maimoa manimino i lenei foi talaga (*paia o le itu usu*). Tapuai maia i nai minute, se'i ou liliu ane e tau saili se 'ava e patipatia ai lo tatou taeao fesilafai.

Sufiga o 'ava o se saofai e le itu a le usu/nuu

Faataitaiga

O le a le filifogamafua se faamatalaga, auā ua mapue le taeao ma le aso, ua matamata nonofa ma matamata fesilafai, ua laru i 'ula, ae pou i toa, le taeao ma le aso. Ua a'e sagisagi nei le fua sa lelepa i tuāau mafua malu, auā ua faiva ese lo Pepe le agalelei o le Atua Silisili Ese. O lea ua aofia faga i La-Ua i le maota (*igoa maota/laoa/malae*) ina ua le tafi lāua e peau o mala le soifua ma le ola i le pogisa ua mavae, ae ua tatou mimusa ma oaoa i faleseu i le taeao manino ma le taeao toto'a, ona o le manulauti o le asō ma le faamoemoe. Ua mataulu ai nei lena talaga na atoa, i le affio mai (*faahupega o itu o le nofo*). Ua atoailo le masina i lenei talaga, tainane le talalumaga, auā ua soo lona taitao ma ua tulutulu i tao, ina ua folaloa le siapo i pou o lauga i faleupolu tototofa o le aioaga (*faahupega o le usu a le muu*). Ua atoa tupe i le fala i le anofale o le maota, auā o lea ua aofia ai Samoa atoa i ona tafa e fia, ona o le molimauna o le faafotu tupu ma le faafotu alii, ua ala ai ona tau-muatasi le asō i lenei fesilafai. O paia na o Samoa mai le Vai Sa o le Tui Manua i lona Tai Samasama, se ia pa ia le Vai Salia o le Mavaega i

Tulāfāsa i le Tai Ulaula o le Tamaitai. O paia ma mammalu o le asō o lea ua malutauee ma timitauao i le maota, nuunu ia, auā e le avefolia faa-le-soo i se upu ma se faamatalaga, tulou. Ae o le paia maualuga ua affio mai, alo maia, se'i ou liliu ane e tau saili se 'ava o le alii taeao ma le usu faaaloalo, aua e faigata le faafotu tupu ma le faafotu alii, e faa-le-agatonu ai le sii mai o le fala sii gatā i tamalii, ae o le fafati mai o pou i le nofo a faleupolu, tainane le loaloa o lena itu o lo outou aiga tupu.

Sau se tama/ Aumai se fala

Tau aao 'ava o le talaluma
Aami 'ava o le matuatala
Sii mai 'ava o le usu

Liuga luga o lo'u leo, o lena ua i ai le 'ava e ati mai mauga, le le'a mu'a lena ua i le muā lagoa/ muā maota, e fai i ai lau faasoa faale a'u u.

Sufiga o 'ava o le nofo

Faataitaiga

Ua su'e fuesue nei le tai o Tigilau, aua ua le toe tu se ola, ina ua oooo tutu'i le tai. Ua leai foi la se seu e toe lagavale, auā ua ala le mafua alii. E leai la se tautai matapalapala na te toe asasaaina le tai lea, auā o Samoa ua taoto ona paia ma ona mammalu. Ae tau ia ina ou sauai i le va ma ou faopoipoi lilia faalau tu i vanu, aua e faigata le fufui lea ua totō ifo i le maotaga. Ua paia ai nei (*malae ma faahupega o le muu, atoa ai ma ona maota ma laoa*). A liliu le vai o Sinafatulua, ua mafumaunu ma saveioloolo foi lenei itu o le malu, aua o lea ua nfonofo atu ai (*faahupega o le itu o le nofo*). Ua talanai utouto foi lo tatou taeao aua o lea ua potopoto Samoa atoa, o lupe lava na i vao esese, o lea ua fufui faatasi. O le a faalelepa la paia o lenei aso i tootoo uli ma tootoo sinasina o Samoa, aua o lo latou nafa tausī vaatele lea. Ae tapua'i mai a le paia tele o lo tatou nuu ma Samoa aoao, se'i ou liliu ane e saili mai 'ava o le faafotu tupu, le faafotu alii, tainane le sao i matau ma le faafotu o le vaaulu, auā ua maualuga le asō ma le fesilafai.

Sau se toa

Sii mai le fala ‘ava ua tapena mo le faamoemoe (‘ava una na o isi igoa matalai lea ua fai a latou nofo, ia po o ‘ava foi ua tapena lelei, pe afai e tasi le nofo)

Aami le ‘ava o le nofo, po o le amia foi o ‘ava o nofo pe afai ae nofo luu se suafā matai.

Sufiga o ‘ava i le toai taunu o le Faafeagaiga fou

Faataitaiga

Feiloaiga a le Matagaluega – Ekalesia Asofītu o le Toe Afio Mai a Tutuila & Manu'a ma le Taitai Matagaluega, Pastor Neville Neville.

*Tootoo: Telei ai Fanaea C Ausage.
26 Februar, 2006.*

Ua paū vanu ae popogi fatu, auā o lele ua tau fai sunui ao o le lagi ma itu e fia o le malae o le faautugatagi o le talalelei i Lakina ma Poasa, o pou tu toa o le malumalu o Solomona. Ua paū nei le tuāvao mafua malu ma ua iligo le fogatia ina ua ifo le toaga mafana, o le tua-mafa na fili i malae. Ua le toe tu se ola, auā o lele ua su'e fuefue le tai ma e leai se tasi e toe fagota sagolegole i ai, a lele ua talatuavalu lau o le fo i paia maualuga o le asō. Ua mapueque ai nei Lupelele, le tupuatausi o le afioaga e afio ai le Punefu o le Motu, susū le vaa see lua i Sa'o, susū le faauiuluga o le Meana'i, le Matua ma le Taauo ma upu i le Tagaloa.

Ua saveioloolo ai nei lena itu o le malu, auā o lea ua susū mai lau susuga i le Taitai Matagaluega o le Ekalesia Asofītu o le Toe Afio Mai i Tutuila ma Manu'a. O lea ua siii mai le fala siigata i le paia o aiga, o le mamalu lava lea i le Malelega a le Tui Olosega, Nofao ma Usalii, Tootoo ma le fētalaiga ia Niuatoga ma upu ia te oe Olosega. Ua malumaunu foi lenei itu o le malu, auā o lea ua alalatai atu ai le Ituaiga Sa o le talalelei, o susuga i Faafeagaiga taulagi o afioaga taitasi o lo o totō ai le fatu o le upumoni, o le vasega o toeainā mai ekalesia esesse,

taimane le loaloa o le nofoatofi o le Matagaluega a Tutuila ma Manu'a. A o lenei aso, e sau se taimi ona momoli lea o laau i fogaa ma sula mea i Matautu Sa, auā e faigata lo tatou taeao fesilasilafai, se'i o'u liliu ane e saili se 'ava, a o se aano a tamalii, e agatonu ai lo tatou taeao ua tau tupu, tau tamalii, tau faleupolu, ona o le susū mai o lo tatou paolo faale-talalelei, lana susuga i le Taitai Matagaluega ma lena itu tele o le paia o aiga.

Ao ‘ava

Soifua.

Manatu anoa lona luu – Faamatala le ‘ava faatupu ma e faapefear foi lona faatinoga?

Manatu anoa lona luu – Aisea e asu faatolu ai le ipu ‘ava e le tautu ‘ava, ta faatolu le fau e le ta fau ma solo faatolu le tanoa/laulau e le taupou? Se tulafono lea mea, ae o le a foi lona faavae? Faia i ai saililiga a tagata a’oga.

Manatu anoa lona tolu – E i ai fesootaiga o le numera tolu lea e faatinoo i taga o le ‘ava ma pou e tolu o se maota talimalo Samoa ma lave e tolu o lo o i le tuiga o le taupou?

Manatu anoa lona fa – O fea ea le itu o le maota e muamua ona ao o ‘ava? O le talaluma, po o le matuatala? Afai e toso se fala ‘ava e ao ai ‘ava o le itu usu, o fea le itu e talafeagai ona toso muamua mai ai e le solisoli alofi le fala? O ni isi, ua fofola sa’o le fala i luma o le tagata sufi ‘ava, ona ao lea i ai o ‘ava. O fea o nei faiga e talafeagai i le ag-nuu?

Manatu anoa lona lima – O le sufi ‘ava ea o se lauga, pe na o le aoina lava o ‘ava ma momoli loa i malo?

Manatu anoa lona ono – O fea tonu ea ‘ava e tatau ona faaumu pe failo e le solisoli alofi i le taimi lea e sufi ma ao ai ‘ava?

Manatu anoa lona fitu – Aisea e taua ai le ‘ava mata po o le ‘ava e ati mai mauga i le taimi e sufi ai ‘ava?

Manatu anoa lona valu – E faapefear ona talepe ma faasoa le ‘ava mata po o le ‘ava ati?

MATAUPU 3:

Folafolaga o ‘Ava

Folafolo 'ava:

O le leo muamua lea o le malaga na te faailo le fogatia e ala i le folafolaina o le lumā'i ava sii lea ua op ea i le maota. O tu ma aga a Samoa o le faailo o ni faaaloaloaga ina ia silifia e tagata uma. O le tagata lea na te fesoaina le fala 'ava lea ua i ona luma mo tagata o le malaga, atoa ai ma le fā'i o le inati o le tanoa i le tausala ma le aumaga latou te lu'ili'u i maijeina le alofi o le taeao fesilafai. O lea tu ma aga a Samoa e faaali mai ai uiga feavatai ma le taliana o le faaaloalo e tauala i 'ava. O le ata foi lena i nei aso, e tatau ona folafola le maaau ma le milosia o tagata ekalesia e tauala i la latou faiga taulaga, e pei lava o le folafolaga o 'ava, aua o le taulaga lea a Samoa anamua.

Auivi

1. Folasaga – Upu faanogofie po o Upu faanofo filemu.
2. Faalupega o le itu usu.
3. Faalupega o le malo ma le malaga.
4. Faafitiga o 'ava po o le sulaga o 'ava (*vivigga o 'ava*).
5. Folafola loa i le malaga.

Folafolaga o 'ava o se malaga

Faataitaiga

Tootoo: Alaileto'o S Seumalo.

A taalii le mafua ma ua matie faalaumea i le moana sausau o le vasa, ona faapea lea o le aiga tautai, se ua paū le tuāau mafua malu. A sasala faaali o le po e pei o le pua taupea le mafua o le tuāavo ma le fuifui ua luepe i le fogatia, ona faapea lea o upu o le seuga, se ua molumaunu ma saveiololo le tuāavo mafua malu, ina ua tagata loaloa le lauelele o le Motu Sa. O lea ua lalafo i lumāmea ataaata o Taulelei, ua malomua le igoa ipu o le atua o taua, ina ua tatou autasi e umufono talatala ma ulu mea fatu fala i le atoa o le masina e pei o le igoa ipu o le Vaimagalo, aua o lea ua tatou fesilafai i malaē i le soifua lagi mama, ae le o le taape o papa.

A lena ua atoa tute i le fala e pei o upu i le faiva o le taulafoga i lena itu o le malu (*faalupega o le itu usu*) A o se maimoa malamalamāa foi i lenei itu o le malu (*faalupega o le malaga*). A lea ua agai-tupu, agai-tafa i, agai-tamalii le taeao 'ula, ua mapue a ua maualuga lea talaga, i le afio atu o le afioa i le Ao o le Malo Amerika Samoa, le afioa i le Matua Togiola Tulafono, o le o lo o ututumu i le Sa o le Malo i ona upufai, tainane le maave eseese o le faigamallaga i sui tofia o le kapaneta. O paia na o le taeao, e sili ona faalelepa ma lalafo foe i le savili i tootoo o le Manu'atele, aua o lo latou nafa tauri lea, e malu pui-pui ai paia o le atunuu.

Ae o le a sopo ia le manuvale i le fogatia, auā ua sala le nofoaga, ae magalo i lau faafogoga se leo vaivai, ae o le agaga o le meemee e fāailo ai le fogatia e alaga le lupe mua ua i le naaloa, e ala i lau faaaloalo maualuga lea ua op ea i le maota. 'Ava o 'ava, 'ava e fai lona gafā, 'ava e fai i ai le tala, ae muliaina ia Suasami'ava'ava. 'Ava e fear, e leo e ilanmutu ma sau'ai. 'Ava e ola i le maamaa, e laga i le tafa o ata, ae suluia i le fausa aulama. 'Ava sa ola i mauga, e tupu i vanu, ae ifo, ta'uui ma au'afa mau i Manu'atele lea na alofi ai Samoa ma le lalolagi tele, e i ai le taeao lenei ua faiva ese lo Pepe, ina ua alii taeao mai i le 'ava lea (*faalupega o tamalii*), ae usu faaaloalo ma usualele le mamalu i faleupolu (*faalupega*)

Silaalofi maia lau afioa i le Kovana Sili, o le Ao o le Malo o Amerika Samoa, lau afioa i le Matua Togiola Tulafono, tainane le maave eseese o le faigamallaga. Ua ou tautala i le faaaloalo maualuga na alii taeao mai ai (*tamalii*), ae usualele ma usu faaaloalo (*tulafale*). O lea ua ou taulima ina nei le lupsina, o le 'ava sa faapologolo faamata moepo, o lea ua tatala i le asō, ona o la tatou fesilafai. O lea o le a te'a i le afioa i le Kovana Sili, e tusa o le faaaloalo faatupu i le taeao nei.

Faafetai le faatofalai 'ava
Faafetai le faaaloalo
Faafetai le aga faafaleupolu

Folafolaga o ‘ava o se saofai

Faataitaiga 1 Tootoo: Mataaga Alefāio Lutu.

Ae ou te lei utufia le vai na iite i ai le Tui-atua nai Mulinu’ū ma Sepolataemo, ma ou so’aina le loto nai le Itutolu o Sagaga ma le Faleono o le Atigana, Faleata ma le Gafa, e muamua ona ou faapoipoi Ilia faa-laau tu i vanu, e pei o le upu ia Lemalu ma Lemamea ma lo la fale na tōese ma fafano ane o’u lima e tau faaetefimale le vaogagana, nei vaipa lou gutu, tulou. Tuloma le mapuepue o le maota (*igoa o le mao-ta*), lea ua tinitauao ma malutauue ai paia o le taeao ma le aso. Ua lau i ‘ula ae pou i toa le taeao toto’ a, ina ua matamata nonofo foi ma matamata fesilafai le asō i le maota nei, auā o lea ua poto moli i le futiafu e tasi i le paia tele i le afioaga e afio ai (*fa’ahupega*). Tulou maota e fia ma laoa e fia (*faatulou igoa o maota o tamalii ma laoa o tulafāle o le nuu*), lea ua tu manauluga ai le faafotu tupu ma le faafotu ali’i o le afioaga ia Lutu – (*ta’u faalupega o le suaqa Lutu, pe qfai e i ai ni faalupega*). O paia o le Itumalo ua potopoto (*ta’u paia o le Itumalo, ou te faatulou atu i le Alataua ma le Aiga Sa-Tummafono, le afia malosi*). O Tumua ma Pule, Itua’u ma Alataua, Aiga i le Tai ma le Too o le Fua, tainane le Falesefulu ma le Motu Sa, ou te faatulou atu. O paia na o Samoa mai le Matāfanua i Saua o le Tai Samasama o le Tui Manu’ā, se ia pa ia le Siūāfanua o le Alataua i le Tai Ulaula o le Nafānua i Filimapuletuu na tauilo ai malo ma tali i lagis se ao o le malo o le Malietoa, lea ua poto moli i (*igoa o le maledae*), nuunuu atu.

*Ava:

O ‘ava o velevellega. O ‘ava sa faaaagaga e sua, ae a Pule ma Tumua. O ‘Ava e tatala gatā, e oioi grātā, se’i vagana ni puapuaga. O ‘ava e le fāia i ai so’u faafiapoto, se’i vagana le faamaligi toto. O ‘ava sa ola i le maamaa, sala ona la i auvae mauga, ae lūlū ona nafinafi i tumutumu mauga. O ‘ava sa faapololo faamatua moepo, e moe faō i luga o ona lava fua, se’i vagana se faafotu o le vaa ulu o se tuua. O ‘ava sa faatagataga, e le soona tatala, auā o le le’ā ‘ula ma le le’ā pu’ā, o ‘ava e nanau i ai Samoa uma. O ‘ava sa tofa i maota o (*tamalii o le nuu*), ae moenai i laoa o (*faleupolu o le nuu*). O ‘ava sa leo ai (*tau le*

maledae), ae matau a i le puipui-ma o le feau ma le galuega a le Atua. Ae ua faigofie ona tatala i le asō, ona o lo outou silasila i le faafotu tupu ma le faafotu ali’i o le afioaga ia Lutu (*ta’u ona faalupega*). A o le asō, o lea ua ali’i taeao (*faalupega o ali’i o le nuu*), ae usualele le paia tele i (*faalupega o faleupolu o le nuu*), a o se usu faaaloalo ia Samoa ua potopoto.

Ia, silaalofi maia lau afioga i le Sa’o – Lutu, tainane le paia tele o lo tatou aiga potopoto. O ‘ava sa aili’i taeao mai ai tamalii, ae usualele ma usu faaaloalo faleupolu. O lea o le a ou folafolaina atu:

- # Lupesina
- # Latasi
- # Feiloaimauso
- # Matimatimaivasa
- # ‘Ava tugase ua mamago fa’ala lelei

A ao le malae/maota, ua lava ma totoe. O lea o le a fai i ai la’u pule, auā ua lava ma totoe.

Sau se tama/taulealea/aumaga

Te’ā le tugase lea e patipatia ai lo tatou alofi ma le taeao fesilasilafai.

Faataitaiga 2

Tootoo: Toetu Brown (SAM 152, ASCC)

Ua tala tua valu lau o le fo ma ua talaga pasina le asō. Ua lau i ‘ula ae pou i toa le taeao toto’ a ma le taeao manino. Ua saveioloolo foi le maota (*igoa o le maota*) ma ua malumaunu le tupua ma le laoal, (*igoa o le mallae fono*). O lea ua nofoia auololo ma tia mapuepue, ina ua pāū le tuāvao mafua malu. Ua tau fai ‘ai foi le ofeloa ma le matila i paia lasilasi o le taeao ma le aso, auā o lea ua sii mai le fala siisiigatā ma faamaloulou mai le paia tele i lena itu o le maota.

Ua atoa tupe i le tauafoga i lena tala na atoa, (*faalupega o le nuu*), tainane le paia tele o Samoa ua potopoto ma ona tulaga faalupe,

(*faalupega o le Falesefulu ma malo usu ua potopoto*). O lea ua nofoia pou o lauga i sou faleupolu fētalai (*faalupega o le Nofo Tuialau-ta*) e tusa o le manulauti o lenei aso, ae a le faafotu alii ma le faafotu tupu o le suafa i le Matua ia Poloai. O lea foi ua atoadio le masina i lenei talaga, (*faalupega o le aiga o lo o autu i ai le nofo*). O lea foi ua nofonofo atu faleupolu totofi o lenei itu o le maota. Ua mamalu le talatuā, auā o lea ua nōpiai le tausala ma le aumaga (*Sa' o Tamaitai ma le Sa' o Aumaga*), latou te luiui malie so tatou agatou, auā lenei fesilafaiga.

‘**Ava** – o ‘ava sa ai’i taeao mai ai (*faalupega o tamalii o le mui*), ae usualele ma usu faaaloalo le mammalu o (*faalupega o tulafale o le mui*). O ‘ava o lea ua afifio mai ma le paia tele i le Falesefulu, tainane Tumua ma Pule ma ona tulaga faalupe. O ‘ava e tatala gatā, e oioi gatā, se’i vagana ni puapuaga. O ‘ava e le faigofie. O ‘ava sa faagaaga e sua, auā le galuega a le Atua. O ‘ava sa tofā i maota ae moenai i laoa. O ‘ava sa faapelepele, auā malo o le ekalesia e fetaaololoai. E ui ma faiagata, ae ua tala i le asō ona o la tatou fesilafaiga.

Ia, silaalofoi maiia le paia tele o lo tatou aiga, (*faalupega o le aiga o lo o autu i ai le nofo*) ma le maave eseese o lenei itu o le maota. O le lumāava si’i lenei sa alii taeao mai ai le susuga (*tamalii o le mui*), ae usualele ma usu faaaloalo le mammalu (*faleupolu o le mui*). O lea o le ou folafolaina atu:

1. Ua i ai lupesina e 3
2. Ua i ai latasi e 2
3. Unaolei’ asa
4. Matimatiavaiva
5. O ‘ava felafrai
6. O ‘ava tugase ua mamago faala lelei

À ao le malae/maota, se ua lava ma totea ma ua le mafaitaulia. O lea o le a fai i ai le pule a Leomiti, auā ua lava lelei lona faasosoaina.

Sau se tama/taulealea/aumaga

1. Te’ a le inati lea o le tanoa e patipatia ai lo tatou taeao fesilasilafa’i
2. Te’ a le ‘ava lea auā le ipu o le nofo, o le faafotu tupu ma le faafotu alii
3. Te’ a le ‘ava lea i le matuatala
4. O ‘ava o lo o totoe, o le a mano a inei, auā e umi taualumaga o lo tatou aso.

Soifua ma ia manuia.

Isi Faataitaiga

Tootoo: Alaileto’ o S Semalo.

‘**Ae** ou te le i asaina le vao filifili o le vaosa pe toe falo le afaafa loloa i le oooo tutu’ i o le tai i le mapue o le taeao ua mauahuga, ua lau i ‘ula ae pou i toa, ua matamata nonofo ma ua fosoga fesagai, e muamua ona ou tapui le tapu o le tupuatausi ma le laoai, auā e leai se tautai e toe fagota sagolegole i taeao faapenei, ina ua le toe tu se ola, auā ua su’ e fuefue le tai nai avaavalua. Ua leai foi se aliiseu e toe seu tarfili le naa, ae lelei ona seu mataoaga, nei silināa se upu o le vaogagana, ona lagavale lea o le mafua alii lea ua malutauee ma faavaotutu’ i le paia o le maota, tulou, tulou, tulouna lava.

Ua talatua valu nei lau o le fo ina ua paū le tuāvao mafua malu, ua malu foi le taufaanuu, ina ua lalaga le galu fuli afa, ua tatou feiloai i le masina ua atoa, ae le o le masina faalao po o le masina ua malupeaua. A lea ua faamaloulou mai ma alii taeao le paia mauahuga (*faalupega o le Tamalii o le mui*), tainane le usualele o le mammalu o ona tulatoa matulamiae e tausii vaatele, ae a upu o Asotau (*faalupega o le Faletolu*). Ua ou tu foi i le to, ina ua maniti tino i le pisaga, auā o lea ua sii mai le fala siiisigatā i le usu faaaloalo o le paia tele i le Itumalo (*faalupega*). Ua failā tu i moana le asō, ina ua malama i lagī le faafotu o le vaavulu, a o le sao i matau o le suufa Fauaa i le nofo lea, auā o lea ua fafati mai pou o le paia i le Falesefulu (*faalupega*), tainane le Motu Sa (*faalupega*), faapea le la to i le ea ma le la to i le vasa, a o le la to i le ala o le Usoga ia Tumua ma Pule (*faalupega*) ma Samoa ua potopoto.

A liliu le vai o le tamaitai, a lea ua soo tatao lenei talaga ina ua soosoo tuli ma folo loa le siapo i le paia o lenei itu o le aiga. O lea ua alalatai atu le ua tagaloatusi i ai finagalo o le aiga, ina ia avea e fai ma faamatuatumu e tauisia le aiga, aua ua ausage ona totino. O lea fai ua alalatai atu le paia tele o le aiga ma ona tulaga faalupe (*faahupega*). O paia na o le taeao ma le aso, e i ai le lagona o le a nuunuu atu ma faalepa i Tama Matua ma Tootoo tainane tootoo au ma faleipolu totofi o Samoa, auā e leai se vave e toe vaetapuina sa ia ma faiga, nei lafai (tulou) i se faamatalaga, ona avea lea ma aleu o le manulauti o lenei faamoemoe.

‘Ava

‘Ava a Tagaloa ma Pava, ‘ava na i Saua, ‘ava ai le Faletoluga ma le Faleula
 ‘Ava sa ola i le maamaa, e tupu i le papa, e laga i le pogisa, e sulu i le pupu aulama, ae liai i le tafa o ata, ‘ava ai Falealili, Safata ma Aleipata
 ‘Ava na failo i le ususu, ‘ava ai le Falesefulu
 ‘Ava na afua ia ‘Ava’avalii na Sa’aalii, ‘ava ai tulafale ma tamalii
 Suasamiaavaava, tupuga o le ‘ava, faaifo i Niniva, ‘ava ai Finao ma ‘ava o le maa gao, e ono lavea ai aao
 ‘Ava e feai, e leo e ilamutu ma’ai, e oioi gatā, se’i vagana ni puappuga
 ‘Ava e le faia i ai se loto po o se faafiapoto, se’i vagana le faamaligi toto

A faasavali gafā o le ‘ava ua tau, ‘ava ai Samoa ma le ataulau, ‘ava sa faasau, ‘ava e le gau, lea ua ifo uma ma mapu’e ai Asotau.
 ‘Ava sa faapolopolo, sa tofā i maota, ae moena’i i laoa
 ‘Ava sa tulafitai i mauga, falala ona la i auvae mauga
 ‘Ava sa tupu lau usiusi i auvae mauga, ae lūlū ona nafinafi i tumutumu mauga
 ‘Ava sa faagaaga e sua, ae a le galuega a le Atua
 ‘Ava sa faatagataga, auā le Falesefulu ma le Motusa, e tatala gata, ae ua faigofie i le aso, ona o lo outou silasila i le famoemoe lea.

O lea o le a fai i ai le faaso, auā ua lava ma totoe

Silaalofi mai le paia (*faahupega o le aiga*)

O lea ua ou taulimaina nei le luma-‘ava sii sa alii taeao mai ai (*tamalii*) ae usualele (*tulafale*), auā le faafotu o le faafotu o le vaaulu ma le sao i matau o le

nofo (*snafa o le nofo*)

O lea o le a ou folafolaina atu (*Igoa o ‘ava*) – Lupesina, Latasi, Matimatimaivasa, Unaolei’asa, ‘Ava fefafai, ‘Ava felefele, Tugase A ao le malae/maota (*igoa o le Laoa o Fauaa*), ua lava ma totoe O le a fai i ai le pule a le tamaloa, auā ua le mafaitaulia.

Saofai Alga Sa-Puni - Samatau

Tootoo: Telei’ai Fanaea C Ausage
22 o Tesema, 2005.

‘Ae ou te i utufia le vai na iiite i ai le Tuiatua i Mulinu’ū ma Sepolataemo, taimane Lalogaufaufia; e muamua ona ou faapoipoililia faataau tu i vanu e pei o le upu ia Lemalu ma Lemamea ma lo la fale na tō’ese, ma ou rapui le tapu o Tupolesava le aloalii, e pei o le upu i le Taoto lima a Galumalemana, auā ua paia fale, ua paia fafo ma ua mamalu le taeao festilasilafai. Ua paū ai nei vanu, ae popogi fatu, ina ua liliogo le fogatia ma le tuāvao, auā ua le toe i ai se tuamafafimilae, a o se lupe pāpagatā o le toaga e toe liolio sai i le tuasivi e toe olo tu. Ua paū le tuāau mafiu malu, auā ua leai se peau lagavale, a o se peau lagavava e faafua e fati, ina ua mapu le sologa o peau i le auau o le tai.

Se ua maualuga ai nei le taeao maninio ma le taeao toto’ā i Tugamau, ina ua aofia faga i La-Ua, ua poto foi moli i le futiafu e tasi i paia sausaugatā o Samoa e amata mai i le Matāfanua i Saua, se ia pa ia le Siufanua i le Alataua. O paia ia mai le Oneone le Ufitia ma le Tai Samasama o le Tui Manu’ā, se ia pa ia le Oneone sina ma le Tai Ulaula o Nafanua. O paia ia mai Malaetele na taape ai tofiga ma Pomaseme le malae opea na alofi ai le Tui Manu’ā ma le Malietoa, se ia pa ia le Fafāma le Lualoto o alii, lea na tali ai i lagi ao o malo.

Se ua failā tu i moana le asō, auā o lele ua alii taeao mai le Falefa o Usoalii i lena tala na atoa. Ua manufulu’ula le asō, auā o lele ua usualele mai le nofo a ituaiga ia te oe Leulumoega. O lea ua atoalio le masina i lenei tala na atoa, aua o lea ua alaalatai atu ai lana afioga i le Sa’o, lana tofa i le Avaganofoa, lau tofa Puni ma le mammalu o le aiga. Ua mamalu le talalumaga, auā o lea ua atoa i ai tupe i le fafao, ua

atoa tupe i le fala i le faiva o le taulafoga, auā o lea ua nofoia pou o lauga ma ua fola loa le siapo o le fetalai i faleupolu tofia o le nofo a Ituaiga ia Leulumoega, o tulatai, tulatoa, ma ona tulamalae.

Ua paia le laoa ma le maota, auā o lele ua usu faaaloalo le Itumalo ma Samoa aoao. O le paia ia Tumua ma Pule, Ituau ma le Alataua, Aiga i le Tai ma le Vaa o Fonoti. O paia ia Sua ma le Vaifanua, Fofo ma Aitulagi, Ituau ma le Alataua, Saole ma le Launiu na saelua. O paia o le Motu Sa, i le afio o le Laau na Amotasi, affio alii Faatui ma le fetalaiga i Tootoo ma upu ia te oe le Manu'a Tele.

Ae o le asō, o lea o le a ifo le u o le tologa ma sopolia e le tau-talaga le faaaloalo ua opea i le maota ma le laoa, auā ua ifo nei le tagavai a le tau-tai mata palapala, ae ati le 'ava fānua ma le fāasaō i le alofa o le Atua, mua ia ina mua, mua o ma fāasaō.

'Ava: 'ava na alii taeao mai ai le Falefa o Usoali'i, a o se usuale-i le Nofo a Ituaiga ia Leulumoega. O 'ava o lea ua usu faaaloalo mai ai le Itumalo ma Samoa ua potopoto. O 'ava sa faatofa i maota o le Falefa o Usoali'i, ae moenai i laoa o le Nofo a Ituaiga. 'Ava sa leo ai le galuega a le Atua. 'Ava sa faapolopolo a o se matua moe po, auā aso faapenei. 'Ava sa tu i le auvae mauga, ae sala ona la i tumutumu mau-ga. 'Ava sa totō i le tumutumu mauga, ae lūlū ona nafinafi i auvae mauga. 'Ava sa ola i lau eleele sa, e faigata, e oioi gatā, se'i vagana ni puapuaga. 'Ava e le fai i ai so'u loto po o se faafiapoto, se'i vagana le tagata faamaligi toto. 'Ava na sulu i le pupu fausa aulama, ae ati i le tafaa o ata, lea na fesilafai ai le atiu ma le tagata, lea na toso ane ma fatafeia i le vasa, ae 'ava ai Samoa ma ona tagata. 'Ava e faigata, e talagatā, ae ua faigofie i le asō, asiea?, ona o lo outou silasila i le afioga i le Sa'o, le tofa i le Avaganofoa, i lona finagalo sa agi, a o se matagi le moe, e i ai le asō, i le faafotu tupu, o le faafotu alii o le suafa Tagaloa, suafa Leota, ae o le faafotu o le vaaulu i le Ao a Matua o le suafa Tele'i ai ma le sao i matau o le suafa Malagamalii, suafa o le Tafaoivao-ose, suafa Aanaauatasi, ma le suafa Ausagetaliiitama.

Silaalofi/Ao le malae

Faafetai le faatupu
Faafetai le faafaleupolu ma le faatofalai 'ava

Isi vaogagana o le sulaina o 'ava
Tootoo: Peterī M Gaoteote (SAM 152, ASCC)

'Ava na ola i logo papa
'Ava na tupu i le papa ma le maamaa
'Ava na savalia, 'ava na telea'ia
'Ava na elia, 'ava na fulia, na ifo ai mea a le lagj i le Faleula ma le aumaga paia
'Ava nai Saua, 'ava e o i le itu i manū, ae faailo i le ususū
'Ava na ifo i le Faleula, 'ava ai le Faletoluga
'Ava na suatia i Masefau, ae maia e Faiumu e le gau
Faasavalī gafa o le 'ava, Tuitele ma Lualemana sauni se faigamalaga
Ina ua oso 'ava i Vini ma Tapaga, 'ava ai Aleipata, 'ava ai Siumu ma Safata, 'ava ai Lotofaga
Taliu 'ava o le a toe folau, toai matāfanua 'ava e faasau
'Ava ai Aunuū ma Alofau
Ua lava agi o le toelau, ae agia lai
Susū mai 'ava a folau
Gafa o le 'ava ua tau

Manatu anoa muamua – O le a le taua i le aganuu Samoa e talafeagai ai le fesilafai i se alofi, se alii taeao ma se usu faaaloalo?

Manatu anoa lona lua – E faumalo lava le tagata i lona finagalo tupu i le pogai autu o le ‘ava ma lona tupuaga. E lelei ona fefaasoa a’i mau eseese o le ‘ava, e pei o Manu’ā, Upolu ma Salafai.

Manatu anoa lona tolu – O ni isi o tulafale, e sosoo lava le folafolaga o ‘ava ma lana lauga e fai agai i le itu o lo o usu, ae o la e lomaloma mai le vaatele o le tulafale o le itu usu i lana lauga, e osia ai le tauлага i le Atua. O le a sou taofi i lea mea pe afai e tupu i se fesilafaiga?

Manatu anoa lona fa – E lelei ona faaaoga le upu o le silaalofi i le folafolaga o ‘ava ma le upu o le ao le malae po o le ao le maota pe afai e aofai fatatasi le lumā’ava sii ma le faaaloalo a le itu usu. O lo o agiga pea i le taimi nei, le upu o le silafaga ma le ao o le malo. O lena ua manino le mata o le vai i le mataupu muamua, o le silafaga e ave i me-aai, ae o le ao o le malo, o le upu e faaaoga i le tuufatasiga o toga.

Manatu anoa lona lima – O ni isi nei o upu e talafeagai ona faaaoga e folafola ai ‘ava pe afai e auese lou finagalo i se tuuualo ua faaalia i le manatu anoa lona fa:

- Silasila matamata nonono maia
- Fagafua ia le nofoaga, ae magalo se leo/faamatatalaga (*e mafai foi ona faaaoga lea soāfuitai i le manatu anoa lona fa*)

MATAUPU 4:

Tufaga o ‘Ava

Tufa 'Ava

O le leo mulimuli lea o se alofi. O lona tiute o le tufaina o le 'ava taumafa a le atunu. E 'ava mua i le matuatala i se tamaiii o le malaga, ae 'ava muli ma motu le agatonu fesilafai i se tasi foi tamalii o le iuu o le usu. E va i 'ava i tulafale o le talaluma, atoa ai ma alii o lo o alaala i pou pepe o se maota. E alagataatu ona inu uma se malaga pe a talafeagai, ae le tatau ona inu uma se usu, ona e mataga i le faasamoa ona toe inu lava e le usu la latou 'ava faatali sa tapena.

Auvi

1. Folasaga – Upu faanofogofie po o Upu faanofo filemu.
2. Faalupega o malo po o le malaga.
3. Faalupega o le itu usu.
4. Taute loa ipu o le taeao ma taumafā 'ava i faleupolu.

Faataitaiga 1

Tootoo: *Pete Pedro. (SAM 261, ASCC)*

Ua lele le manu i le vateatea ae fememeai tautai o le vasa,

Ua maua i le loto popole ma le faaletomu, au ua agi le matagi, ua lavelavea ai peau o le sami, peau oso, peau loloi, peau autaa, peau lagavava

Auā lou la to i le ea, ma lou la to i le vasa, tainane lou la to i le ala
Na e la to i le ea, o le tuugamau e lelea
Na e la to i le vasa, o le tuugamau e opeapea
Na e la to mai i le ala, o le tuugamau e le maalofia

Ae o lea ua sau nei le vaa na tiu, tau mai i le vaa na tau, ae o lo o mamau lago o le vaa na faō i le afolau
Sii le viiga ma le faafetai i le Atua, auā o lupe sa vao eseese, ae o lea ua fuifui faatasi

A o lo outou agatonu lenei ua matou vai magaloina, a tetea le efu ma le malasina, o le fau ma le laulau, le lupe ma le upega, o a'u o le a faiā le galuega.
Ooooooo, usi le 'ava faasoosoaa.

Tulai se solisoli alofi.
Tufa le 'ava.

Faataitaiga 2

Tootoo: *Alaileto' o S Seumalo.*

Ua talu tua valu lau o le fo ma ua le ta paitataaga le pilia le asō. Ua logo foi le nai a tea, logo le nai ama, ina ua taumuun le upu o le mavaega i le maluapapa, ua tofu ola le asō ona o le Atua ma lona aao laveai ua ulimasao, ae le faauilulito. O le asō ua le o se tatu'i-i-malae pe tofale' auga faaualualuo, ae o le fesilafaiga ua manutoao i Asotau, le Atua faafetai i lou agalelei faamemelo ma lou alofa faananaau. O lea ua tuu tau saunoaga ma fetalaiga i le maota, auā ua mapue Asotau le maotata o le galuega i le paia tele i le faiga malaga, i le afio o Gaga'eolo ma le suafa o Naioti. Susūle Alo o Malietoa ma mammu o le Falelima o le siitaga fita. O le paia lava lea i le aai o Fonoti, o le fatu faasolo o le aai a le Tupu. Ua atoalio foi le masina i lenei itu o le maota (*faalupega o Vailoa*). O lo outou agatonu lenei ua matou faatito i ai le vai, a tetea le lupe ma le upega, o le fau ma le laulau, o le efu ma le malasina, o a'u o le faasoosoaa ina.

Faataitaiga 3

Tootoo: *Telei' ai Fanaea C Ausage.*

Ua sugalu nei aualuma, ua tetele poula, auā ua malu le taufaanuu i le paia lasilasi ua maluatauee ma tinitauao i Asotau. Ua te'a i lagī sa o uila, ua faafogofoga le Atua i le taulaga molia. Ua silinaa nei tanoaga ma saunoaga, ae silimea le seuga i vagana ma fetaalaiga tumalele lea sa tafī, tafā faamuli 'aumā eseese i le maota o le galuega. Ua lau i 'ula nei ae pou i toa lena itu o le maota, i le afio mai o le paia tele i le faigamalaga, i le afio o Gaga'eolo ma le suafa o Naioti. Susū le Alo o Malietoa ma le paia maualuga i le Falelima o siitaga fita. O le mammu lava lea i le aai o Fonoti ma le fatu faasolo o le aai o le Tupu. Ua laga foi le galu fuli āfa, ina ua atoa tipe o taulafoga i lenei itu o le malu (*faalupega o Vailoa*). A o lo outou agatonu ma le alofi fesilafai lenei ua matou suia ma filogia i vai magalo, a mae'a lului malie e le tausala, tetea le efu ma le malasina, lupe ma le upega, fau ma le laulau, o Telei' ai o le a faailo ipu o le taeaoo.

Ooooooo, usi le 'ava faasoasoa, tulai se solisoli tamalii ma faleupolu.

Ua usu faaaloalo foi le komiti i alii ma tamaitai faia'oga o le Kolisi Tu- ufaatasi o Amerika Samoa

Faataitaiga 4

Tootoo: Tele'i'ai Fanaea C Ausage

Ua logo le na i tea, logo foi le na i ama, auā ua paia maualuga lo tatou taceao fesilasilafai. Ua paū vanu, ua popogi foi fatu, ina ua ma lu le taufaanuu, auā ua nofoia auoloolo, ua le toe tu foi se ola, ina ua sua tutu'i le tai. Ua tagata loaloa le vao, ua paia le maota o le galuega o le Kohuse Paia, ina ua sii mai le fala sii gatā i lau susuga i le Fesoasoani ma le Falema, tainane le aumalaga mammal. Ua paia foi lenei talaa o le maota, auā o lea ua ee papa aao ai tulaga faalupe o le ekalesia. O lo outou agatonu lenei ua matou faatito i ai le vaimagalo, a tetea le ēfū ma le malasina, o le lupe ma le upega, o Telei'ai o le a faia le galuega.

Oooooooo – Ussssssiii le 'ava faasoasoa. Tulai se solisoli alofi o le talalelei.

Faataitaiga 5

Tootoo: Tava'e Auomanū (SAM 152, ASCC)

Mati 18, 2010 – WASC Visit.

Ua paū le alofisa o le Tuimani'a
Auā ua ala le mafuaali'i
Ua logo le fua ma le paō
Auā ua paū le alofisa o le Tagaloaalii
Ae tau ina ou faapai i sa ma faiga o le taeao ua tau tupu
Auā o paia le popo ma le pa e le solo
O lea ua nofotale nei ia Samuamaa
Auā ua tapui le tapu o Tupou ua sāsā foi le Aveo

Ia ua paia lena talaga na atoa i le afio o lau afioga i le taitai malaga, faapea foi le paia maualuga i le faigamalaga mai le WASC. O lea ua paia lenei talaga atoa auā o lea ua ali'i taeao le susuga i le Peresetene, Seth Galea'i, ae maiise le afioga i le taitai fono Utu Dr. LalouluTagoilelagi

Lea ua ifo ai nei tu lima le seuga a le manusina
Ae mapu i Tulatoa fetalaga o le taeao ma le aso
Ua mautu ai nei le vai avea ma le lauti e le putea
Ae talisoa ai le i'a a Nafanua
Ae taliausolo le igoa o le tamaloa nai i Tuamasaga

A o le agatonu lenei o lo outou taeao fesilafai
Ua tanua nei e le tausala ae agai e le aumaga
Se'i tetea le lupe ma le upega, o le fue ma le efu
O a'u o le a faasoasoaina

Uoooooooooooo.....
Ua usi le 'ava faasoasoa tulai se solisoli tamalii ma faleupolu
Tufā le 'ava.....
Aumaiā lau afioga....
Tautē lau afioga.....
Lau 'ava lenei.....
Nunuimalo talitali lau 'ava lea ua atu ma le tautu.
O... lau 'ava lenei.....
Motu lo outou agatonu ua mativa le fau ua papau le laulau o le laumua tuuifaatasi o Amerika Samoa
Ave le ipu e faafolau
Ave le fau e faasau
Ave le laulau e tautau
Ae tautue lau afioga.....

Oooo..... Ua maliu le alofi.....

o Amerika Samoa, ae le o le tufa ‘ava i le kolisi, ae faaaaoga ai fua le mativa o le fau ma le papau o le laulau a Tumua ma Pule po o se igoa o se isi malae.

Manatu anoa lona lua – A tau aao ipu o le matuatala ona faaaaoga lea o le taute ma le aumaia, atoa ai ma le alagaina o latou igoa ipu. O le taumafa ma le ‘ava ma le tosoina o le leo o le “o”, o le faaleoima na o ipu ‘ava i le talaluma. E lelei ona talatalanoa pe faamata aisea ua tumatāmaga ai faapea la tatou gagana i le tau aaoina o ‘ava a matai ma vaega patino o le maota/laoa o lo o alala ai?

Manatu anoa lona tolu – Faasoa ma tagata a’oga le mafuaaga e ala ai ona tau aao i le alolima ‘ava a tamalii, ae tualima tulafale. Aisea e ala ai ona ave lima lua le ipu a le ‘ava mua po o le uluai ipu o le ‘ava, faatasi ai male le uluai ipu ‘ava i le tamalii o le itu usu pe a oo ina soofau pe sooula le maota/laoa?

Manatu anoa lona lima – Aisea e tele ai ina motu le agatonu po o le ‘ava muli i se tamalii o le usu? E i ai ni isi afioaga e motu i tulafale o le usu a latou alii taeao ma le ‘ava o fesilafaiga o ni malo?

Manatu anoa lona fa – O le saoga o le upu o le *motu le agatonu* po o le *motu le agatonu*?

Manatu anoa lona nomaga – E lelei lava ona faaaaoga o igoa o le faasinnomaga lea e fai ai le alofi ma le agatonu, pe a oo le vaega a le tufa ava i le soā fuaiteau lea:

- *Ua mativa le fau, ua papau le laulau a Tumua ma Pule – ‘ava e fai i Upolu ma Savaii.*
- *Ua mativa le fau, ua papau le laulau a le Falesefulu ma le Motu Sa – ‘ava e fai i Tutuila ma Manu'a.*
- *Ua mativa le fau, ua papau le laulau o le Laumua o le Saili Atamai – Kolisi Tuu Faatasi o Amerika Samoa.*
- *Ua mativa le fau, ua papau le laulau o le Laumua o le Pa paigagalaga – Le Iunivesite Aoao o Samoa.*

Afai o le Kolisi TuuFaatasi lea e te tufa ‘ava ai, ona faapea lea o le tufa ‘ava: “*Ua mativa le fan, ua papau le laulau a le Kolisi TuuFaatasi*

Lauga usu

O le tulafale lea ua tasi i ai le faatau paia ma le sivaloa e fai ma osi taulaga. E le soona filia se tasi e lauga, se'i vagna le tagata ua lava tapena mo lea faamoemoe. O ia lea o le a momolia finagalo uma o tagata ma faafetaia atua o faasinomaga esese, e tusa o la latou puipuiga saogalemu i le malaga. E tutusa lelei le lauga faaleaganuu ma le lauga i le malumalu. E filifilia e le agaga o le Atua le tofi lauga e momoli le faafetai i le Atua, ona o le aao taitai i le soifua o tagata eklesia.

O lauga usu sa masani ai le atunu, e faatino lea i le taeao po. Afai ae taunu se malaga ua afai se aso, ona talia lea o malama o muamua, faatoa alofi lea i se alii taeao ma le usualele. Peitai, o nei aso, e taunu loa se malaga tusa lava po o le affafi, e faataunu lava se usu. Ua faaigoa lea tulaga o le "Taeao ua Liugahu".

MATAUPU 5:

Lauga Usu Faatau Paia ma le Sivaloa

Vaoggagana o Faatau ma le Sivaloa

O le mafuaaga ua ta'ua ai lenei mea o le faatau, ona o le tuu-lalo o manatu o tulafale e saili se e lauga i se fesilafaiga. E faatau atu manatu o le isi tulafale i le tasi tulafale. E afua ona ta'u o le sivaloa, ona e i ai isi faatau e ta'i atoa lava le itula po o le sili atu foi o fai lava, seiologa ua maua se tasi e fai ma osi taulaga.

Faatau ma le Sivaloa

Faataitaiga

Laga Faatau – O lea ua paū ma maualuga le taeao. Pa'u, ou te talitonu foi e leai se tautai e toe vavevave i aso faapenei, auā o si o ta lava lima e toe paia ai si o ta mata. O le mea lea, o fea o taotio ai le tofa, ae aumai a lenei taeao se'i fai ai a'u ma faitaulaga i la tatou fesilafaiga. O le faatau atu lea ma le ava e tatau ai.

Tali a le tagata muamua – Ua faamalo faafetai Puni i le vagana o lea ua mua i malae. Ou te le i moe lelei foi a'u anapo talu lo'u mafaufau tele i le taeao lenei. Silasila foi, se ua e taeao lasi. Ae a fa i lou finagalo ae aumai lenei aso, se'i o'u lauga ai foi ta ita ia. Manuia le faatau.

Laga Faatau – Pa'u, e leai se tasi na fai atu ia te oe e ana e te tofa lelei i le po ua mavae, auā na ou moe lelei lava a'u, atoa ai ma le puipuiga a le Atua. Ae o lo'u manatu i le taeao nei, ua ou alofa atu i lou tagata ua matua ma ua ou manao e tauosa la tatou galuega faa-Leulumoega. O le mafuaaga lena o le tatalo atu ma le agaga maulalo, aumaia lau faautaga ou te faaleoina sa tatou taulaga, auā ua sua oooo le tai o le taeao mama-lu. O le toe tatalo atu lea ma le faaalolo.

Tali a le tagata muamua – Faamalo faafetai Puni. Ai ua galo ia te oe upu o le Tusi Paia e faapea: *Ia e ava i lou tama ma lou tina, e faaleave-leva ai ou aso.* E ui lava ima ua e le silasila i lo'u tagata matua, ae o le feavatai i lo tatou va nonofo faa-Leulumoega, o le mea sili lea ia te a'u i le taeao nei. O le mea lea, manua lau lauga ma ia lele malie lau ti'a, ae o le a tapuai Pa'u ma le Aiga Sa Pa'u.

Laga Faatau – Se ua moni upu a le poto e faapea: *E sili le toa na te pulea lona loto, na i lo le toa na te aea le olo.* Pa'u, o oe o le toa ua e pulea lou finagalo i le taeao nei. Ua le sili lou momoo faalupe o naurmati i le taeao, ae ua laualuga lou manatu i lo tatou va nonofo o le Nofo a Ituaiga ia Leulumoega. Faafetai mo le faaalolo.

Mano'o, o aso lava faapenei e leai se tasi e toe faataiflu i ai. Aisea?, auā o aso o le soua o tuāau ma le filifili o le vao sa. Peitai, e le ela sa'u matau i lo tatou va tu nonofo faa-Leulumoega. Afai o a'u nei, o oe taeao. Afai foi o oe nei, o a'u taeao. E ui i lea, se ua ou anau e fia seu, auā o lele ua totō le fuiwai i le fogatia. O le faatau lea ma lo'u agaga maulalo.

Tali a le tagata lona lua – Puni, Puni e, se e ofo lo'u loto i lenei mea. Silasila foi, faatoā mae'a nei atu lava le saofai a le Aiga Sa-Lefaille, lea sa e fetalai e faapaia a latou nofo, a o lenei foi ua e toe manatu i le-nei taeao. O a'u foi o le isi tagata matua e pei o le tofa ia Pa'u. A ua e le seu silasila mai lava o ma ua ua toetiti feoti, ae le aumaria lenei taeao ou te lauga ai, e le iloa po o la'u lauga mulimuli lea, ona ou otai ai lea taeao. Ou te manao i le taeao ma lou faaalolo.

Laga Faatau – Mano'o, o upu a le Apostolo e faapea: *E tupu le faat-iatuia i le tau logologo atu.* Afai ua galo i lau tofa Mano'o, o lea o le a ou toe faamanatu ia te oe upu o le Evagalia o Mataio e faapea: *E tagi atu ea lou atalii i se areto, ae e aumaria i ai se akarava?* *E tagi atu e au-potoi areto ae e aumaria i ai se maa?* *E tagi atu foi i le falaoa, ae e au-maria i ai se gata?* O lea ua ou tagi atu ou te fia lauga i le asō, a o lea lenei taeao, se'i e faafogfa i se lauga a tama fanau o le eleele. O le toe tatalo atu lea ma le faaalolo tele.

Tali a le tagata lona lua – Faafetai le fetalai Puni. E moni lelei a oe. Peitai, o se mea e fia faasao. E le o a'u o se tama le alofa. Silasila foi, ana ou le alofa, e leai se faatau ma se sivaloa i le asō. O ai e lauga? O Mano'o lea e tauitala atu, tulou le taeao paia. E ui i lo'u matua, e le see fua lo'u tamai paopao i le malu o le tai taeao. Aisea? e pele ia te a'u lo tatou va fetausiai faafaleupolu. Ua ou manatuia i lo'u loto upu a tamaiti e faapea: *Ua lava lau fai, sei ou fai a'u ia.* Ia, a faifai ai lava o le foi e fia fai lenei aiga. Ae ui lea, o le a tapuai Mano'o ma le Aiga Sa Manoo. Manua lau lauga.

Laga Faatau – Ua faamalo faafetai Mano'o. Ua moni i le asō upu o le seuga a Ulumu ma Lefaoseu e faapea: *Ua e tog i le seu na laga tila, ua e faapulou i le tulima, ua faamalo fai o le faiva.* Malo faafetai mo lau faaeaea lea ma le tuualalo, ua maua ai malo, ae a le asō ma lenei fesilafaiga. Manua le tapuaiga.

Lo outou Ituala na Mavae – Ua faamalo faafetai Mano'o. Ua moni i lo outou Aiga Sa-Lefaille, o aso fapenei o aso fai mea sasa'o. A lua finagalo lua te fia fetalai, o le a malolo le tootoo o Puni ma lona aiga. Ae afai o lau faaalolo lea ua tasi ai toeauna matutua ia, o le a faapena ona olo le fua ma faatino lou finagalo ma lau faautaga tuutuu mamao.

Tali a le tagata lona tolu – Manua le lauga Puni, tapuai Mutimutu ma lona Ituala na Mavae.

Tali a le tagata lona fa – Manua le lauga Puni, tapuai Lavea ma le Aiga Sa-Lefaille

Laga Faatau – Faamalo faafetai Mutimutu. Faamalo faafetai Lavea. O aso faapenei e silafia ai e o tatou malo, lo tatou nonofo fealofani, e pei o le poloaiga a le Alii Faaola i lona ausoo, ina o le a afio i le lag. Manua lau tapuaiga.

O le paia o lo outou tala na atoa, le Falefa o Usoalii, aumaiā le tofa ma le moe. Tau lava o sau faamanuiaga, ona faatino lea o le nasa faa-Leulumoega.

Falefa o Usoalii – O le a matou tapuai. Lele malie lau ti'a ma ia uluulu matafolau i le manulauti o le asō.

Laga Faatau – Faamalo i lo outou talaga. O faiva e tapuaia, o faiva na e manua. Faafetai mo faamanuiaga ma e le masalosalo i le asō o matou tagata, e tusa o le tanoa faalele i lo outou foi pito laau tauave. Manua le tapuaiga.

Vaega o Lauga

O lo o fetoso a'i pea faapautolo a loi le finauga i le mau e fesiliglia ai pe fia tonu lava vaega o se lauga usu, po o se lauga o feiloaiga. E molimau ni isi o tootoo au o le atunu i a latou foi saililiiga, e fa (4) vaega tetele o se lauga. O ni isi ua latou sailili ma mautu lo latou taofii e iva (9) vaega o le lauga. Peitai, o le manumanuga i lenei tusiga, ina ia le gata e tamaoaiga o tatou lava falepolu tofia i le vaogagana o lauga, e tatou foi ona onomea le talafeagai ona maua e i latou faatoa amata ona lauga lenei sosis o vaogagana eseese, e mamamanu ai lauga anoa.

O le fesili tuga ua tulai mai, e faapefēa la ona maua e i latou faatoa amata lea tomai e lauga? O le tali, o le mulimilitai i vaega e ono (6) o le auivi lea o le a faataoto i lenei tusi, e fai ma tapasa o folauga i aso o afa ma le louloua.

Auivi

- | | |
|----|--|
| 1. | Folasaga – Upu faanofogofie po o Upu faanofo filemu
(paia/ faalupega) |
| 2. | Faafetai i le Atua |
| 3. | 'Ava |
| 4. | Taeao – (taeo o le atunu ma taeao o le talalelei) |
| 5. | Auga ma le manulauti o le aso |
| 6. | Faamatafi (Faatoesega, Faamanuiaga, Faamavaega/
Mavaega a le atunu po o le talalelei) |

O le isilea auivi e mamamanu ai lauga usu

- | | |
|----|------------------------------|
| 1. | Folasaga (paia ma faalupega) |
| 2. | 'Ava |
| 3. | Faafetai |
| 4. | Auga |
| 5. | Taeao |
| 6. | Faamatafi |

E mafua ona tuu taeao e faamulimuli, ona o vaega ia e seu ai e isī lauga, auā ua le toe i ai se mea e fou i le faafogoa a le atunu. O le uiga o le upu taeao, o se mea e fou i le silasila ma le maimoa a le atunu. O le mafuaaga lena o le maua ai o taeao o le talalelei, ona e fou i le matau a le atunu tagata papae ma o latou pelaue ma fusiu, e faatusatusa i o latou laei o lo o faaaoga.

Auiliiliga o le auivi

Folasaga – Tomua i alagaupu ma muagagna ina ia faanofogofie ai le aofia lea ua tuluma e momoe faatasi i se maota talimalo o se nuu, aiga po o se ekalesia. E tuu malie i ai i totonu faalupega ma paia o le faigamalaga, ina ia mautu ai le folasaga lea ua papae faati'a o le tauiaga.

'Ava – E mau isi tootoo o le atunu, e muamua lava le vaega o 'ava, auā o le masani lea na sau a'i le atunu. Peitai o isie manatu, ua tatau ona faamuanua le vaega o le faafetai i le Atua, ona o le talalelei lea ua o tatou oaoa ai nei i faleseu ae saa i maa o malie. O le tulafale e osia le

Faataitaiga 1

Tootoo: Fululele D. N. Apo. (Aoga Tulaga Muamua-Aua)

taulaga i lea taeao, e tatau ona *faamalulu ma momoli malu i puega* i le paia o le faigamalaga, ona o ‘ava le tuā ma se ‘ava le fonotia, ae o se ‘ata iti ua alii taeao mai ai ona tamalii, ae usu faaaloalo ona faleupolu. E faaiu le fetaitaiga a lea tulafale i le vaega o ‘ava i le tapa ipu lea o le taeao pe a mae’ a lauga togia o le aso.

Faafetai – E leai se isi mea e sili atu lona taua na i lo le momoliga o lapalapa o malo e sua ai le viiga o le Atua i Matautu Aai. E onomea lava le te’ a muamua o le fetu ta’i matagi, o le faailoga lea o le te’ a atu o sa o uila i lo tatu Silisili Ese, ona o lana puipuiga i le maa tui ma le maa gao, tainane le maa faalavea aao, ina ua feiloai i pue o manū, ae le o pue o mala.

Auga – Ia auu lava nei pomalaē pe po foi se lilo i le aofia lea ua manufulu’ula e tasi i le maota le manulauti autu o se faamoemoe. E tatau lava ona faailo i malae lona mafuaaga ua ala ai ona mata fesilafai ma fofoaga fesagai.

Taeao – E ui lava o le tasi lea o vaega e masani ona seu ai lauga e le au lama lauga, ae le mafai ona ta vavae ese lona taua i le auvii. Aisea?, ona e tatau lava ona faamanusina taeao iloga o le atunu i taimi o le fefuliuia a’i ma le toto massa. E le gata i lea, ae e talkafeagai foi ona manusina le soā taeao o le talalelei, ina ia talafeagai ma le autu tonu o le taeao lea e fesilafai ai i le maota. Afai ae seu le lauga i taeao, o le mea sili ua mae’ a ona faailoa le auga na afua ai le faamoemoe. Afai foi e te finagalo e aqu le seu lau lauga i taeao, taumafai e aqu le ta’uina le upu taeao a o e fetalai.

Faamatafiga – O isi lauga e le faamatafia pe afai e lua pe tolu aso o se mafuraga. Peitai, o isi failauga, e faamatafi lava a latou fetaitaiga. Ua faatulaga lenei vaega o le lauga i ni “F” tetele se tolu.

F – Faamanuiaga

F – Faatoesegaga

F – Faamavaega po o mavaega.

E pule lava le failauga, po o fea o na mea e faaaoga, po o le faaaoga uma foi, aqu e leai lava se isi e pao fua i lau lauga na tapena.

Ua talaga pa usi le asō ma ua pasfuga le ā e pei o le faiva o le seuga gogo. Ua talatuavalu foi lau o le fo, auā ua alittia fanua i le paia ma le mammalu ua aofia i le laumua nei. Ua paū ai nei tuāā mafua malu, i le afifio mai o malo valaaulia, matua, uo ma aumeamamae, tainane aiga o alo ma fānau o lenei a’oga. Ua maualuga le asō, auā o lea ua faatasī mai le aufaiga luguega a le Atua, tainane le aiga faia’oga. Nuunuu la paia ia i tootoo uli ma tootoo sinasina, auā o lo latou nafā tāusi lea.

A o le asō, e muamua sa tatou fāfafetai ma le viiga i le Atua o i le lagj, ua mafai ona faasopo mai lo outou sofifua lagj lelei ma le sofifua lagj mama, tatou te fesilafai i luma o le nuu, ae le o tua o le nuu. Ua tatou fetai i magā fetau sofifua, ua faō vaa o mala ae ea sa o manū, ina ua muūā le aao taitai o le Atua i lenei taeao manua. Seanoa lona alo-fa, e taumate i le ‘ete ma o se foe foi e faaee i le tau lenei faamoemoe. Ae fāfafetai i le Atua, ua ia tafia mala, ae tuua lenei laolao matagofie tatou te laulua fesilafai ai i le Laumua o le Malimi – marlins.

E matou te avatu mālū i puega ona o ‘ava sa tau aao atu e lenei itu. Faamalulu atu ua tuafale i papa ae muafale i moana. Ua le ola lelei se ‘ava, ua mafua ai ona tau aao atu se ‘ava le tuā, a o se ‘ava le fonotia. Peitai, ua fai lava lau faasoa faatupu ma lau pule faafaleupolu, ma ua e fa’i le inati o le tanoa ma faaso le ‘ava i le matuata-la. Faamalo, fāfafetai. Sau se taimi tau aao ipu o le taeao fesilafai. Tapa se ipu auu le matuatala, taumafa se ‘ava i ou faleupolu. A liliu le vai o Sina, tapa se ipu i lenei itu o le malu, se ‘ava ma faleupolu nei, a toteo se suā alofi, saa fua ma le tāutalaga.

O taeao o le atunu e le toe oo i ai se leo, auā o taeao o le pogisa ma le toto masaa. O taeao o le femisa a’i ma le fefulifua a’i o le atunu. Peitai, o taeao o le talalelei na suluia ai Samoa i ave malolosi faa-kerisiano, o taeao lelei ia ma le matagofie o le atunu, lea ua tatou sapi ai ma oaoa ai i faleseu i lona finagalo. O le taeao o le toe tu manu-

malo o Keriso mai le tuugamau, o le taeao lena e i ai le asō, ina ua tatou manumalo e tapu'e ma puipui le gagana ma le aganuu tatou te mitamita ai, lea o le a tauau ina satia i mea a papallagi.

Ou te o le faamoemoe i le asō, ua le toe po se lilo. Le faamoemoe sa lavasi ma atofa i aso e tele, o lea ua faataunu i le asō, o le viiga lea o le Atua. La toe faamanatu i alo ma fanau le tāua o le gagana ma le aganuu Samoa e ola ai le tamaititi Samoa. Mitamita nei i lou lava faasinomaga, auā o lo tatou tofi mai le Matai, nei vale tuulima i se tasi.

A tuuama le sua ma fatala le fili alii i le asō, puipui malu le Atua i lo outou soifua. Ia maua le tofa faale-Atua i le auaua togia o le talalelei. Faaaupegaina susuga i le pule a'oga ma le aiga fai'a'oga, auā le a'oa'oina o alo ma fanau o lenei nuu o Āua. Ia manua matua ma le auvalaaulia, ae ola fanau o le a'oga a Āua i le alofa ma le agalelei o le Atua.

Soifua

Faataitaiga 2

Tootoo: Joseph Josua (SAM 261, ASCC)

Folasaga:

Sa tialalo nei le i'a sa a le aiga tautai ma fetunai le muniao i le nofo a faleupolu i se o le a tu e lafo le fue auā le paia o le taeao. Ua tasi ai nei le faafitiga o aleaga, o a'u o le a faaperoftaina lo tatou taeao fesilafai.

Ole a ou le toe paopaoina faatupe o tauafoga le paia maualuga o le taeao ma le aso, auā o lele ua nofioia auoloolo. Ua ailitia foi famua, ina ua tinitauao le faamoemoe. O lele la ua feagai sega'ula, auā o lea ua poto le paia o le maota.

Susū lau Susuga i le Faafeagaiga Susū le Peresetene ma le nofotao o le autalavou mai le Papa i Futiga Ua paia foi le malae i Paepaetele e afio ai lau afioga i le Matua, o le alo o le Tuiatua A liliu foi i lea itu o le malu

O lea ua alalatai atu ai le Susuga i le alii Sea ma le nofo tapuai i le Peresetene o le autalavou i Gatavai O paia ia, ae a malae i Nuuuli ma le Tunofo Afio ai le Laulu ma le paia i Aiga Salevalasi Puipui i lau fetalaiiga Tiatia, Togia i ma le Faalaa Ma le mammalu ia te oe Salemuliaga. Faataalolo la paia o le asō i Puleono o Salafai, auā o lo latou nafa tausi vaatele lea i paia o Samoa.

'Ava:

Talofa i sau silasila le tau i se 'ata iti na umia mai e le Susuga i le Sea ma le autalavou Se ua mamago vanu, ua le suasua alia Ua faalaualau tofaa tuā-maota o Salemuliaga Ua le maua se 'ava ati mai mauga auā lou la to i le ea ma lou la to i le tai

E ui lava o se 'ata iti ma se 'ava le tuā A o lena lava ua fai i ai lau faasoa Ua e to ma te'a foi le inati o le tanoa Talisoa ia le galuega a le tausala ma le aumaga A tetea le fäu ma le efu, faailo le fogatia, ae tapa ipu lo tatuou taeao fesilafai

Tapa se ipu i lau Susuga i le Faafeagaiga mai le Falesefulu Tapa se ipu i le Matua, o le alo o le Tuiatua Momoli se 'avai i Tautootoo ma oe le Ituau o Tofiga A liliu foi le vai o Sina i lea itu o le malu Tapa se ipu i lau Susuga i le alii Sea Tapa se ipu i le paia i Aiga Salevalasi Momoli se 'ava ia Tiatia O se suā alofī o toteo, ia saa fua ia ma le leo.

Faafetai:

A o le asō ma le faamoemoe i le affio ma le susū mai i le paia o le Faleagafulu, se ua malo le tauatai. Se a ea se loto e fai, pe ana afatia lou sa i le vasa O le foe a e faaee i le tau e ausaga foi e le tuvae Ae faafetai i loma aao taitai na faamamalu

Ua laveana ai lou la to i le tai ma lou faaopeapea mai, ua taunu
 manua aile le faigamallaga
 Ua le feiloai i vaelupe saa, a ua vaelupe maua lo tatou taeao manua
 Ua tatou feiloai i le maota o le galuega i pue o manu, ae le o pue o ma-
 la
 E momolii ai laau i Fogaa
 Ua matalupe laufanua o Salafai
 O se faamoemoe ua taunu o le laau o le soifua lea
 Lau Susuga i le Ao Faalupega ma le mammalu o le autalavou mai le Pa-
 pa i Futiga

Malo le manatu mai, faafetai le faatamalii
 Ua e laasia vasa e fia ma e aau mai i Salafai nei
 Talu lo ouluva va tuu nonofu ma le Susuga i le alii Sea
 Ua mafua ai ona taunu lenei mafutaga
 Ua malie i lau faaaloloalo
 Nuumuu la le agalelei o le Atua i ana auauna o lo o talafaauto i fata
 fiaitaulaga e fia, talu le Atua ma lona finagalo.

Taeao:

O taeao o le atunu o le a le toe faatalale i ai se faamatatalaga,
 auā o taeao o le fefulitu'a i ma le pogisa o Samoa i taimi o le tiāvavau.
 O taeao o le talalelei lea ua tatou sapi ai ma oaoa ai i faleseu i maota
 tapuai e fia o le atunu, e nōnō manu ai auā so tatou manuia faaelagi.
 Ae o le taeao sili e i ai le asō, o le taeao na sūtia a'e ai le Alii Faaola
 ma faapea atu i le ausoo, "Ia outou seafolani".

Auga:

O le asō ua moni upu o le tologa
 Ua le o le fisiga, po o le fusiga, ae o le niusina le aano o le faamoemoe
 Tau ia ina ia avea le mafutaga a le autalavou ia maua ai se viiga o le
 Atua
 Ae a lo tatou sauni atu i le aso e faaali faalua mai ai

Faamatafi:

Se itula silimea le seuga a alii i le faamoemoe
 La maua le tofa faale-Atua i le Susuga i le Faafeagaiga
 Maua le tofa faatupu i Tapaua ia

La maua le lauga i Tautootoo
 Soifua maloloima le mammalu o le faigamalaga
 A liliu i lea talaga
 Manua tele le Susuga i le alii Sea
 Lagimama le autalavou nei
 Maua se manatu o Tiatia
 Ae ola lo'u leo i le alofa o le Atua
 pa i Futiga

Soifua

Faataitaiga 3
LAUGA O LE SISIGAFUA
TUTUILA MA MANU'A
2008

Tulamalae: Tofa i le Matua – Salave'a Miki.

Ua talagai utouto, talaga pasina le asō ma ua pafuga le ā, e pei o
 le faiva o le seuga gogo; auā o lele ua saveioloolo le seuga, ua ma-
 lumauu le fogatia, ua paū foi le tuāvao mafua malu, ina ua tōtō le
 toaga ma ua ifo foi le tuamafa filimalae i Lupele. A lea ua o tatou
 mimusa ai nei ma aleale atiu i le agaga o le meemee, pasioa ma paioa,
 ina ua tini pa'ō le uto, e pei o le upu i le faiva o le tapalega, ua tau foi
 le 'ai, ina ua mua atu, mua mai, aua o lea ua nofoia auuloolo, ua mata-
 mata nonono le asō ma matamata fesilafai i le tupua ma laoai, ona o le
 faailogaina o lau susigafua – Tutuila ma Manu'a. Ua savini ai nei faa-
 puna o manufou lagona, ina ua faiva ese lo Pepe lenei taeao manino ma
 le toto'a, auā ua lau i 'ula ae pou i toa, e pei o le fale na i Amoa, paia
 ma le mapuepu e le asō, ou te faatulou atu, tulou, tulouna lava.

O paia ua aofia faga i La-Ua, ua tuluma foi e momoe faatasi, e
 pei o le upu i le faiva o le malofie, lea ua foto ai nei moli i le futiafu e
 tasi ma tinitauao i Lupele, o le a le toe oo i ai se upu ma aafia i se
 faamatatalaga, tulou, auā o lea ua taoto le ivi'ai'a o le atunu, o le fale o
 Po ma Ao, ua soo lona tiaoia ma e tulutulu i tao, e le o se atunu taliola,

pe talā tau fai e pei o Toga. A lea ua mae'a paepaelago, paepae faaulufanua ma taotō ti'a o le tautiaga e le fofoaga o le aso, o le sa faauamua ava i le itula ua sola. O le lagona maualuga, o le a taoto ia le fala le see i pāia ia, ma o le a ou le toe lotoīā le lauti fatulalo, pe toe tāilia tūlāfanā ma ta i tua le tili āua, pe sii se matalalaga, a o se alafausa e fono faapipii i pāia ia, e leai. Aisea?, a lea ua ifo tonu le niusina, e pei o le upu i le tologa, e le fetalaiga maualuga, o le fosfoga mua o le aso, lea na tapena ai faatamaitai toaga lo tatou taeaō fesilasilafai, e leai se vave, se poto ma se mataalia, a o se atoa i le liu o lo'u vaa, e toe ulumataīlauina ai le maota o le atunu, pāpā le gaeē la pāia o le aso ma nuunuu atu i le au tolo popoto ma tootoo au o Samoa, auā o lo latou nafa, le matatafaoi ma le anava tauave lea, e puipui ma lipoi i upufai o le atunu. O pāia o le aufaigaluega a le Atua, i lo outou aiga o Sa-Levi, o lo o tala faauio, faatuna paulia ma faafale-le-malu i afioaga eseese, ona o le tauasina o le taufa ia Keriso ma lana faaolataga, nona ia i lagī, i lo tatou Tapaua Sili, o le ou le aso ma le atulaulau.

E ui lava ina ua mae'a maalo le iu ofe a le aiga tautai, totō foi le riui i le tuaoi e tapui ai lo tatou va tapua ma le Mataisau, ina ua te'a i lagī le fētu ta'i matagi ma momoli le viiga i Matautu aai i le talosaga molia ma le upu folafola a le susuga i le faafeagaiga taulagi, e le fāaitiitia lava le agaga o le faasagi i le Atua o malo. O lana pule faasoifua ma lana pule to, a lea ua malama ai i lagī, failā tu i moana ma atoalio ai le masina i le soifua maualuga o le Taitai o le Malo, lau afioaga i le Kovana Sili, lau afioaga i le Matua – Togiola Talalelei Tulafono ma le faletua, tainane lau afioaga i le Sui Kovana, lau Susuga i le Tama Faalagia – Faoa Autofele Sunia ma le faletua, a o le paia i le Fono Faitulafono i ona Maota e lula, i lau afioaga i le Peresetene o le Senate, tainane lau afioaga i le Fofoga Fetelai o le Maota o Sui, faapea lau afioaga i le Faamasinogā.

faigamalo, i le afio o le Ao Mamanu o le Malo Tutoatasī, afio lau afio-ga i le Palemia ma le Kapeneta filifilia, tainane le afio o lau afioga i le ua faavaoutu'i i le asō. E le 'ēla la matou matau i afioaga ua valaaulua, ae a lenei faamoemoe (*Saleaumua, Lano, Auvaā [fautasi]*). Seanoa le Atua ma lona agalelei, semanu e atafasaina faafuga o laau e toulu, pe taumate i le 'ete ma ausaga e le tu aao lo outou soifua ma lo matou ola, auā o le foe lava e faaē i le tau lenei faamoemoe, pe a aunoa ma Ia. A lea ua matau e sulu o le tino lo tatou ulumea fatu falā ma umufono talatala, fesilafai i magā fetau soifua i luma o le nuu ma mauga o ao, auā ua fāō vaa o mala, ae ea sa o manū, ona o le alofa susuu' u o le Atua, ua o ni ua faāalanu maaveave.

E le o se taeaō o le aava, a o se taeaō sa faafuāveta, po o se aso sa faataitai gogo le asō. E le o se taeaō foi o se faletautu faaualualuo, a o se tatū i i matiae. Se o le faamoemoe sa fāu ao, fāu po ma oolo o pito vaa ai le faigamalo a Tutuila ma Manu'a, lea ua taunu, o le laau lea o le soifua. O taeaō o le atunu e le toe tau faaalanuina i sa'u faamatalaga, auā o taimi o le pogisa, le toto masaa ma le fefuhutua a'i o Samoa. O taeaō na sunui ai 'ava o le talalelei ma le faaolataga, lea ua ao ai Samoa ma le atulaulau, a lea ua hūlū ona nafināfī faa-kerisiano, ae sala ona la i afioaga eseese, ae a ni agaga mo lona malo e faavavau, foi la le viiga i le Atua. A o le taeaō sili, a lea ua afio mai le (*fāahupega o Leone*) e tali i le valaaulua ma le faatalauua atu o le malo, auā le faamanutuina o lou tutoatasi. Ia usi lea o le maimoa, se silasila malama, a o se tagai toto'a, se'i o matou sivasiva atu e faafafia i lo tatou aso, auā e faigata le paia maualuga lea ua epa i malae nei.

O se laolao lelei ma se laofie o i luma, tuuama le fua, tatala le filiali, pe silimea foi le seuga ma siliofe tauai o le gataifale, ia agalelei le Atua i le asō. Ia mamao ni lagilagīā, a o ni ao fēgasoloai ma ao tau-lia i lau afioga i le Kovana Sili ma le faletua. Ia mamao ni tuātafalu ma ni laumea e toli e le savili i lau afioga i le Sui Kovana ma le faletua. O le paia o le faigamalo a Samoa tutoatasī, pe a liliu le la ma pale le faamoemoe o le asō, auā nei afea le atua o le ala pe a toe laa i vasā i

E le vaea foi le fala ooto i le soifua lagilelei o le Usoga a Tu-mua ma Pule. O le paia lava lea ia Itau ma Alataua, Aiga i le Tai ma le Vaa o Fonoti. Tainane foi Tama ma o latou Aiga, o Aiga foi ma a latou Tama. A ou tu foi i le salefu ma matau le paia maualuga o lau

Sailili Atili

Tumuā. Ia tautai le Atua i le soifua o le faigamalo a Tutuila ma Manu'a, tainane le atunuu. La faatumu le sa'aga o le lauga, ina ia aua ai nei tuuaulafo le fue ma gausia le tootoo i faleupolu tototfi o Samoa. La taumasasua le utu o le folafola i ana auauna, ae ola se leo ma se faamatalaga i le alofa o le Atua.

Soifua ma ia manuia lenei aso.

Tusia ma Tuifatasia

*Tofa i le Matua – Teleiai Famaea C Ausage
Faioga ilu o le aganuu ma le gagana Samoa
Kolisi Tuifatasi o Amerika Samoa*

05 Mati, 2008.

Manatu anoa muamua – Aisea e mafua ai ona seu o lauga? Se aga-nuu ea le seu lauga?

Manatu anoa lona lua – O le a le vaega e matele i ai tulafale i le seu-ga o lauga?

Manatu anoa lona tolu – Aisea e seu ai lauga i taeao faitauina o le atunuu ma taeao o le talalelei?

Manatu anoa lona fa – E talafeagai le seuga o ni lauga i ni faalupega? Aisea?

Manatu anoa lona lima – E tatau ea i lauga usu ona mulimuli i se auivi ua taoto, pe pule lava le failauga ia i le faasologa o lana lauga?

Manatu anoa lona ono – E talafeagai lo tatou lava lauga i tagata tatou te aiga lelei? O le a le fesootaiga o nei mea o gafa ma faiā i lauga usu?

Manatu anoa lona fitu – Afai ae seu se lauga, e talafeagai ea ma on-omea ona faaaau pea, ae aua le ano fua i le seu lauga, po o le ava loa i le va tuu nonofo ma le tulafale o lo o seuinā le lauga ma faamaea loa le lauga i le vaega o le faamatafiga?

Lauga tali

O le tali fuaitau mai lea o se tulafale o le malaga. O le tali mai i le agaga o le faafetai i lē sa fai ma osi taulaga. E aofia i lea lauga tali le toe sauhalua o le faafetai i atua eseese, atoa ai ma le faafetai i ‘ava sa umia mai e le usu. E le toe faaluaina le lauga usu ua momoli e le osi taulaga. O le mafuaaga lena e ala ai ona faapena le lauga tali, ona e talitonu Samoa e tasi lava le osi taulaga o se taulaga faafetai.

Auivi

E tali tutusa lelei lava auivi o le lauga tali ma le lauga usu. Peitai, e i ai isi lauga usu e le tau tulia uma vaega e ono (6) e tali mai ai, ona o le manatu, e le hua ni lauga a le atunu, pe hua foi ni fai taulaga e momolia le faafetai i le Atua. O le mafuaaga lena e pījama ai lo latou taofi i ni vaega maotī se tolu (4), tau lava ina pa’i ai, ae o le la ua maea faailo e lauga usu, aua o le taulaga lea ua maea osia.

MATAUPU 6:

Lauga Tali

1. Folasaga (Upu faanogofie po o Upu faanofo filemu – paia/faalupega)
2. Faafetai (toe faaluaina le faafetai i le Atua)
3. ‘Ava (faafetai i ‘Ava)
4. Taeao (tau lava ina pa’i ai, ae o le la ua maea faailo e le lauga usu)
5. Auga (tau lava ina faailo)
6. Faamatafi (momoli i ai a outou faamanuiaga)

O le auivi lea e mamamu i ai le tele o lauga tali

1. Folasaga
2. Faafetai
3. ‘Ava
4. Faamatafi

Auiliiliga o le auivi o le lauga tali

Folasaga – E tatau ona faatomua i upu faanofo filemu i se mea ua maea lelei lona tapenaga. E ese laitiiti lava alagaupu ma muagagna e faaaoga i lauga tali, e faatususa i le lauga usu. E tatau foi ona foufou malie i ai ma paia ma faalupega o le itu usu.

Ava – O le gagana faafetai ma le faamalo i luma ‘ava sii ma le faaalo-lo faatupu, faaaloalo faafaleupolu, lea e tatau ona fetalai i ai le tulafale o le malaga. E tumuli foi lana vagana i le tau aaoina o ipu o le taeao fesilasilafai.

Faafetai – E leai se niu tuaoi e faagata ai n mea lelei. Pe sautua selau lava faafetai i le Atua i lea aso, ua tatau ma onomea, ana le seanoa le Atua, ua na o se foe e faaee i le tau, e taumate foi i le ete ma ausaga le tuvae lenei faamoemoe.

Taeao ma le Auga – E mafua aisea ona le toe ta’ua taeao ma le auga o le aso i se lauga tali? A lea ua maea vagana fetalai i ai le tulafale o le itu usu po o le alii taeao ma le usu faaaloalo. Afai ae toe ta’ua e se tulafale ia mea i sana lauga tali, o lona uiga, o lo o fāagau le malie i le tauлага na molia.

Faamatafi – E lautusi uma lava e tasi faamanuiaiga, faatoesega ma faamavaega. Pau lava lona eseeseega, o le faaaogaina o talitonuga o le Tusi Paia ma taofi maumauttu o le atunuu.

Lauga Tali

Faataitaiga

Tootoo: Falefaamaoi Availlepule.

O lea ua faaifo nei le tuamafa na fili i malae, i le vagana ma le fetalaiga i se ua seu-tuuua i le laumua nei o le Malie O lea foi ua ifo tonu le u o le tologa, i le fetalaiga au i lau tofa sa fai ma fataulaga e sua ai le Atua ma lona aao taitai Nuunuu la paia o le agalelei ma le aao laveai o lo tatou Tapauu Sili i ana auauna, o lo o tala faaauto ma faafalemalu i fata faiatalaga e fia ona ole Atua ma lona finagalo O paia foi o le Samoa o lea ua meaa tofi, tofa ma e tapena faatamaaitai toaga, e leai se isi e toe vavevave pe toe faatalafulu i ai se faamatalaga, aua o paia o Samoa o le fale o Pomaao, ua soo lona ta’iao ma e tulululu i tao, tulou, tulou, tulouna lava.

Faataalolo la paia o Samoa i Tama Matua ma Tootoo o le Motu Sa, au o lo latou tofi ma nafa tau si ia.

Ae mua le faafetai i le Atua, seanoa lona alofa e atafasaina faafuga o laau e toulu lenei mafutaga, ma o se foe foi e faaee i le tau ma e ausaga le tu aao, pe ana le o faatasi le fuitia ma le umele, o lona aao laveai ma lo tatou ola. A lea ua tatou aaeai nei sia manu ua ulu, ina ua sau le vaa na tiu tau mai i le vaa na tau, ao lo o lalago pea le vaa na faō afolau. Viiia la le Atua i lona agalelei.

Faafetai i le lumā-ava sii lea na alii taeao mai ai le Pule a’oga Ae usualele ma usu faaaloalo le mamalu o le laumua o le Malie Ava sa tofa i maota, ae moena’i i laoa Ava e le soona usu, e faigata, e oioi grātā Ae ua faigofie i le asō, ona o lo outou silasila i le Pule aoga o le laumua o le Toa ma le mamalu i alii ma tamaitai faiaoga Se taimi ona tau aao lea o ipu o le taeao festifafai Tapa se ipu i le susuga i le Pule a’oga o le laumua o le Malie Tapa se ipu i le susuga i le Pule a’oga o le laumua o le Toa Taumafa se avai i ou faleipolu Se ava ma toeainina nei A toteo se suā-alofi, ona saa fua lea ma le leo

Taeao o Samoa e le toe oo i ai se leo. O taeao o le pogisa ma le fefilitua a’i. Taeao o le toto masaa ma le tiā-vavau. Nuunuu i faleipolu o tofiga, aua o la latou matafai loi tau si vaatele lea. Taeao o le talalelei, ua ao Samoa ma ua mautu lona faavae papa faakerisiano i tovine eseese. Nuunuu i le au faigaluega totofi a le Atua. O le taeao sili, o lea ua tatou feiloi i luma o le nuu, ae le o tua o le nuu. Ua faō vaa o mala, ae ea sa o manū, ua tulia foi ala o manu, ae tuua lau lelei matagofie, tatou te feiloi ai.

O auga o lenei aso o lea ua maea ona e fetalai i ai, tatou tiu ia i la tasi ma ave i uta, aua le manulauti o lenei faamoemoe.

A tuuama le fua ma tatala le filialii, ia mayae i le mayaega i Fa-lepunaaoa, o manū e tete’ a ai, o manū foi e toe feiloi ai. Mamao ni

laumea e toli e le savili i le Susuga i le Pule aoga o le laumua o le Malie. Aua nei gausia le tootoo pe sosolo le fue ia toe outou o faleupolu, ae faagagaina e le Atua fetalai. Maua le lagi lelei ma le soifua tulu'i i le Susuga i le Pule aoga o le laumua nei o le Toa, ae tatou alo ava ia, au ua mai vai ae suamalie ava i le alofa o le Atua.

Sailiili Atili

Manatu anoa muamua – E le tatau ona toe lauga usu se tagata e lauga tali. O le talitonuga o le atunu, e tasi lava le faiataulaga, ua na o le itu o le usu, le alii taeao ma le usualele po o le usu faaaloalo. O le a sou taofi?

Soifua.

Manatu anoa lona lua – E fia ea vaega o le lauga tali? O le talitonuga o ni isi, e tutusa lelei lava veaga o le lauga usu ma le lauga tali. Peitai, e tolu lava ni vaega e sili ona taua i se lauga tali:

- Folasaga – upu faanofogofie ma upu faanofo filemu
- Faafetai le Atua
- Faafetai i ‘ava

Manatu anoa lona tolu – E leai se mea e toe lauga ai fua le tulafale o lo o lauga tali i ni taeao o le atunu ma taeao o le talalei, auu o le laua maea ona vagana fetatali i ai le tulafale o le itu usu.

Manatu anoa lona fa – Afai foi sa faamatafi e le tulafale na lauga usu le taeao fesilafai, ailoga e talafeagai ona toe faamatafi faaluua ni fesilafaiiga a le atunu. Sei vagana ua le faamatafia e le lauga usu le fesilafaiiga, ona onomea lea ma alagatatau ona faamatafi e le lauga tali.

Manatu anoa lona lima – O ni isi o taimi e leai se lauga tali e faia, ona o faia tutusa i le va nonofo o aiga. O le talitonuga o le atunu, e le mafai ona e toe lauga oe lava i lou lava uso, tuafafine, po o tagata e tau i ai gafa o aiga. O le a sou talitonuga i lea tulaga?

Vaaiiga Lautele

E taga eseese lava tulafale ma le mamanuina o a latou lauga i taimi o maliu. O le talitonuga o isi autalaia ma tootoo au o le atunu, e tali tutusa lelei lava le auivi o le lauga a le paolo ua maufalega i se maota ma le lauga a le paolo faiatulia ua tumalae so latou tootoo, sei vagana ai lag i ma toga e faoopopo i lauga ua tumalae, ae maise lava i paolo tu o se tuua o le malo i se tamalii, po o se usugafono foi o se tulafale. E ui lava ina eseese finagalo faaali o tootoo sinasina/ultili o le atunu, ae mafai lava ona maua tonu le ute o lauga o maliu i lona auivi o le a faataoto e tapasa ai sau tapenaga.

Auivi

1. Folasaga:
Upu faanofogofie po o Upu faanofo filemu
Paia/Faalupega–alalafaga, ekalesia, malae, mao-
ta, laoa
2. Aano/Autu:
Faia – paolo e tau i le gafa
Auala – paolo faakerisiano
3. Faamatafi:
Faamafanafanaga
Faamanuiaga

MATAUPU 7:

Lauga i Sii o Maliu

Auiliiliiga o le auivi o lauga o maliu
Folasaga – E ese ai lava vaogagana e faatatau i maliu na i lo isi faa-lavelave faa-Samoan. E tu matilatila lava vaogagana o maliu, ona o tai-mi faanoanoa ma le faavauvau. O le tele o upu e faaaoga i folasaga o maliu, e afua mai i ni mea e i ai le loiimata maligi, toto masaa ma le fe-filitua a'i.

Aano – So o se lauga lava o se tumalio o se tamalii, usufono o se tulafale, po o se maliu i se ta'uga lautele, e i ai lava lona autu, aano ma lona faapogai. E leai se sii po o se fesoasoani e alu fua e aunoa ma lona pogai mafua'a lelei. Pe aiga, pe le tau foi i ai, e tatau lava ona mani-no le mata o le vai i lona mafuaaga na ala ai ona solituina le lagi ma le

maota namu oli ma le namu asi.

tuavao mafua-malu, ona o le valaau paia a le Atua

Faamatafi – O le vaega lea o le lauga e momoli ai upu o faamafanafanaga ona o le finagalo faavaavau ma le ao pogisa o lo o uftia ai se aiga. O ni isi o taimi, e momoli upu a failauga i vaogagana o faamanuiaga. E le gata ina talotalo ina ia maua se nofoaga lelei o le lagia po o le tagata ua maliu, ae o le faamanuia foi i se tulafale o le a fetalai i ona faiva faafaleupolu i lea faamoemoe.

Lauga o Sii o Malu

Faataitaiga 1

Malu o Sagapolu, Mahelue – Iliili (29, Aperila, 2006)

Manaoaga o le tamaitai o Lupe, e tauala i lona uso o Tiana, o lo o nōfotane i se alo (Aperaamo) e faasino ia Mahiehue Sagapolu.

*Tootoo: Telei' ai Fanaea C Ausage
Faiaoga Sinia o le Gagana & Aganuu Samoa – ASCC.*

Ua tagiu'u nei le tautali i le laoa o le nofo faasaosao, le afioga i le faamaisino, le tofa i le Tagaloa, talofa, o le taurali sa tali ai manu e tua i ai Olosaia ma Papaloa, e affio ai le nofo-a-Sao. Ua nuti foi le kate o le toe aso i Lupelele, o le kate sa tuluma e momoe faatasi ai manua o le afioga ma le Ituala-uta. Ua lagona le leo i Rama, o le siufogaga sa tuvao ma paui ai le logologopuialii o le afioga, talofa, o lea ua le lagona ma ua le nofoia le nofoa o Tavita. O le mea taavili sa sagisagi liivaliva lea ua gausia ma ua tulouna ai nei le lagi, tulou.

Tulouna la paia o le lagi

Tulouna la paia o le lagi ma le lagi ma le lagi
Tulouna le peia o le taualuga o maota e fia e faasino i le Punefu ma le Nofo-a-Sao
Tulouna le gausia o le tootoo ma le sosolo o le fue i laoa e fia e faasino i le Tagaloa
Tulouna le tafea o le tauofe ma le gasolosolo o ao i le tupua tauasi i Lu-pele. Ae o le asō, se o lea ua aava nei le gataifale ma ua puaoa le

E talitonu le taofi, ua le o se tofa i paia o aiga, itu tetele ma itu taulagi, e leai. Ua le o se manatu foi i lenei itu o le maota, e leai foi O le finagalo le agaia o le Atua, o le afi faaniutu i le pogisa, ao le ao faaniutu i le malamalama; aua o lona finagalo, ua agi a o se matagi le moe, ua taumua le 'alo, ae pii fau le motu i lo outou soifua ma lo matou ola. E toli le pula, e fa'i foi le moto, aua o le aso lava ma le filiga, o le aso foi ma le mataiga tila

Nona ia la paia o le lagi lea i faleupolu tofia, o tootoo uli ma tootoo sinasina o le atunu, aua o lo latou nafā tauasi lea e malu ai Samoa

O paia o le aufāigaluega o le talalelei, o suli ma feoi o le Atua o lo o tala faauto i tafa e fia o le atunu, taalolo ma taoto faamaene i le tai loloto, aua o lea ua tala tua valu lau o le fo i mamalu ia, e pei o le asō ma lenei fesilafaiaga i le fusialo ma le loiifofoga pa'u.
la nuunuu la paia ia o le asō, papal e gae'e ma o le a ou le toeta i tua le tili auā, o lea ua taoto ti'a o le ulupaga, ua papae foi ti'a o le tautiaga nai Amoa.

Ae o le asō, nei malu le taufaanuu i lou finagalo ma le manino ai lo ta va nonofo i le auala o le soli vale o le maota ma le lagi lea, tulou lou gutu ma le afi Faafetai i le Atua, o ai na iluiliu ma talotalo o le a tau tupu sou gafsa sailimalo i se alo e faasino iina ma se tama fanau o lenei itu o le malu. Ailogaga e i ai se aoga o le teine nei e tautua i lau afioga i le Sao, a o le nei ua mapuepu le aiga nei, ona o gafaa usu matou te malu ai i itu e fia o Samoa.

O le ala lena o lo matou savalivali mai ma ou te talitonu ua pei o se mea e taatia i malae lau silasila i itu ia. O lea o le a taumafai atu lenei itu o le malu, afai o le a lau maimoa le tau i se taumafaiaga le a'u'u o le affio mai o Sa-Lefao, o le na Aliitu i ai le Itu, Faaoletoi ma Alalamalae, le mammalu i le Tui-atua o Tamapunefu o Fatiafoloa ma Auelua, tainane Malielegaoi, ia finagalo malie, ua pau o se mea ua i o matou lima i lenei vaitau. Ua le tuā le Matua'u, o le e matua i ai le

fāiva o le faatufugaga o le fāioa, tāinane le Auseepapa, ae a se matāfausa, ao se matālalaga, e tua i ai aso faapenei.

(Ave loa le sii/fesoasoani)

Faataitaiga 2
Usufono le Tofa i le Tama Matua ia Masanai – Vatia (Aperila 10th 2006)
Manoaga o le tausi o Moana, usuga muamua a le Matua, e toavalu (8) o la alo.

*Tootoo: Telei'ai Fanaea C Ausage
Faiaga Simia o le Gagana & Aganuu Samoa – ASCC
Sii – tu tootoo i le malae.*

Ua tu poupou nei le laoa, o le laoa e faasino i le Tama Matua, lea sa tua i ai Laloulu, talofa, ua lau i le asi, ae nanamu i le 'oli. Aua o le asō ua moni upu e fai i le faiva o le afioaga e faapea: Ua faapopo a ua o ni aso ua, o aso folau foi ua le tuua A oo i aso faapenei ona fia gagana lea o Faitolo O le sa matua i ai le tuu o le faamaluuga-sa o le Tui-Manua Ua ou fia soporia foi le pa i Fualaga na mayvae ai Saveasiuleo ma Nafanua i upu nei:

A pa ia le pa i Fualaga, ia sua le tulii auia le alii o aiga Ae faigata paia o le lagī lea, tulou, tulouna lava.

Talofa ua agi nei le matagi le agaia ma ua solo ai le fahute, ua tafefea ai pulu i le vai, ina ua masofa le fa sa aina, lea sa tua i ai Laulala, Faleulu ma Fatuateva, tulou Tulouna le lagī ma le lagī, tulou Toluna le lagia o ou maota e fia Tulouna le lagia o ou laoa e fia Tulouna le lagia o ou malae e fia Tulouna le tafea o le tauofe ma le gasolosolo o ao O le lagia lava lea o le afioaga e fio ai le Tamaitai o le Ao O le lagia foi lea o Tagoilelagi, le Nofo Fanau ma le Usosaiii O le gausia foi lea o le atipouniu au ma le lalafo o le faasau i Tama

Matua
Ole usu foi lea o le fono i le Saofaiga, o le autalaia o le afioaga, ae sila maimoa i le Lautinalaulei

O le asō, ou te talitonu ua faatainefu nei le gataifale ma ua fatiōo ma fatitoto le vasa lea ma ua laga ai peau vale, peau lagavaa, tainane peau ta tagata Se ua siliga talii i seu auma fati sisina, e pei o le upu i taeao faiatulia e ono o Samoa ia Fuluualematoto Ua le fati magalo foi le ava nai Taga, e pei o upu ia Salemuliaga, ae ua fati toto ina ua malolo le soifua o se tasi o pou tu toa o le afioaga i le fāfa

Talofa, ua le o se tofa sa a'e pe na moe manatu i ou tapaau na e afifio mai, po o se utaga fetututunai faamuniao i le nofo-a-faleupolu na e ala-fāfa Ua le o se manatu foi na tonu i lenei itu o le malae, ua leai lea Auā e le malae ese lena itu, malae ese lenei itu o le tupua ma le laoai Se lea lava ua fai tasi le finagalo o le Matai i luga, auā o la lava na fetalai, o Ia na te aumai, o Ia foi na te toe aveese Ae faafetai ua amia le totatasi, ae tunu i tatou uma O le finagalo lava lea o le Atua, o le maa e togi faato, o le mua e le futatia, o le tao e velo i le maninoa ma le u fanafana e le alofia Auā e fafai le matua, e lia'i foi le moto O le paia o aiga, itu tetele ma itu taulagi A oo i aso faapenei ona manatua lea i lou loto le malelega a le Malietoa e faapea:

"Samoa e, a tili tagata le vaaloa, ia feeli ia a outou fōe i le aufuefue o lo o i uta O outou tua le sami uli, sei gigili ifo le valoa i le alititai, ona outou mapu lea ma filemu" O le paia o aiga, to'ele ia i le Atua e fai ma aufuefue o le faamafanafanaga Ua na o Ia e gigili ese ai le vaaloa o tiga ma faigata i aso faapenei Avea o Ia e fai ma o tatou maluappā E matu ai le loi fosoga maligi ma le loimata pa'u ona o le faanoanoa Nei e taumate la faaliu o vaa o tarai le mafuaaga o le soli tu o le lagī lea, tulou

O le afio mai o Toomalatai, paia lava lea i Alo o Sina ma le Fufiale o Salevalasi, le Faletolu ma le Vainalelepa, tainane Aiga Sa-Malietoa ma Tuisamau e puipui i upu o Sinave ma Ulumotootua
E le toe pomaē ai lena itu, ua mutia lo ala
O le mafuaaga lena o lo tatou fesilafai i le asō

(O lea o le a taumafai atu lenei itu o le tupua.)
Tama Matua, a tutuu i le loloto o lo ta va nonofo, “e *Sali popo oe ma e masani e te fai salimata, ae ou te toto laufala ma tausi ou nafa faamatau'u ma le seepapa, o'a'u o le faioa o le atumu.*”

Tuiasosopo, ua ou tapa fua i lou suafa ua le o se tulu ua vale
E tasi a'u, e tasi foi la'u mea, e le lua e pei o le tala i le fafine Salega, e
lua ana mea, o le patu i le taligia ma lona sei aufie
Ua maea se taumafāiga vaivai, ae paga lea, ua na o manava o Maile'i a
o le sa tausi alii ia. Folasa, e fia maua ai ni mea se tele ae a aso faapenei
Ae paga, ua pau o le foai a le Atua i matou lima i lenei vaitau
Ua le tuua foi ni lelei, ae tau aao ni masei
O a'u upu o le a solomuli
Maua lau lauga ma saunia se nofoaga tumau o le lagi lea
Ae ou ola i le agalelei o lo tatou Matai

Manuia toe taimi o peau faamavae o lenei faamoemoe.

Soifua.

Sailili Atili

Manatu anoa muamua – Talanoa ma le vasega i ie igoa e faaaoga i maliu e masani ai le atumu. O a ie e tatau ona tapena e se sii e fua i le auaula o lo o sii ai?

Manatu anoa lona lua – O ai tonu ea le paolo latou te sauniga le ie o le Mavaega?

Manatu anoa lona tolu – E mafai ona aami se tagata ua maliu (tulou)?

Manatu anoa lona fa – O le masani a le atumu, o le aami lea o tamaitai i le ie toga, pe afai ua maliu lana tame, ae o lo o alala i le aiga o lona paolo po o le aiga o ona alo, tusa lava po o ua matua tausaga o lona soifua. Aisea ua le aamia ai faapena le itupa o alii pe a maliliu a latou ava?

Manatu anoa lona lima – O ai tonu e patino i ai le sauniga ma le tapenaga o le ie ua taua o le afuelo?

Manatu anoa lona ono – Aisea e mafua ai ona tapena ie ua taua o le ufi eleele ma le ie o le faamagaloga?

Manatu anoa lona fitu – Afai o se sii e alu, ae le i oo i le aso o le faamoemoe, e talafeagai ona tu tootoo, pe se iloga ua oo i le aso ua tu-upoina mo lea faamoemoe?

Auivi

1. Folasaga – Upu faanogofie po o Upu faanofo filemu
2. Faafetai i le afifio mai ma lo latou maau sa folasia i lumāmea
3. Fetalai i le teuga o le sii
4. Faamatafi

Auiliiliiga o le Auivi

Folasaga – E eseese upu, alagaupu po o ni muagagna e amata ai folasaga o lauga tali o paolo o maliu ma lauga e momoli ai sii po o sii alofa. O le a manino i faataitaiga o nei lauga tali le faapupulaga o upu e tatau ma talafeagai ona faaaoga e tali fuaiteau ai i se vagana a se tulafale lea na faamasausau i se sii a se paolo ua mae'a. O le lauga tali, ua na ona piamana i le autu o le faamoemoe, ae silisili ai le agaga faafetai ona o le manatu mai ma le fai aiga lelei i taimi o maliu po o se sii lava faalavelave faa-Samoa.

Lauga Tali i Paolo Esseese o Maliu MATAUPU 8:

Faafetai – E leai se isi mea e sili i le tulafale lea e talia aiga, nai lo le fetalai i le agaga faafetai. E mafua sea tulaga, ona ua le faigofie nei aso i le sailiga o tupe, toga ma mea e fai ai le faalavelave, ae le mafai lava le manatu laualuga i aiga ma le va tuutuu nonofo. O le upu masani a Samoa i taimi o faalavelave faapenei – “E *lelei lava le mativa fesagai.*”

Fetalai i le teuga o le sii – So o se tulafale mataalia, e le tau su'eina ni upu e laei ai le fetaitaiga e momoli ai le faaaloalo i se paolo sii mai, e tusa ma lo latou alolofa. O le paolo autu o le aso, o le paolo lea emulia'i ona teu, ona see faatuāgalu loa lea o le aiga i lona lotofale mo i latou sa alolofa atu foi i le faalavelave.

Faamatafi – O isi tulafale e fia faaali foi lo latou silafia i ni mavaega ma ni faamanuaga e faamatafi ai se lauga tali, tusa lava po o ua mae'a ona faamatafi e le tulafale sa fetalai i le sii. Peitai, e le o se tulafono lena mea, ae o le masani a isi tulafale, o le tiu loa i la tasi ma ave i uta ina ua fetau folo o sa o tupu, pe afai e toe tali fuaiteau i se lauga o se sii alofa.

Sii o Paolo ma Aiga**Faataitaiga 1**

Ua faaifo nei le naaloa, o le tuamafafilmalae i le vagana ma le fetalaiga. Ua taliga foi e fialogo le mauga i Salafai i le faalogologo atu a le aiga nei, a o lele e le seu a le tī'a lele malie i le utaga oo oo i lau fetalaiga. O paia o lenei aso, o lea ua e tapena faatamaitai toaga ma ua e faamanusina manamu o le taeao ma le aso. O se lagona e faapea, o le a taoto ia faamaene i le tai loloto ma fata i Mauga o Ao paia ia, auā e le mafai e sa'u faamatatalaga ona toe autaluina, e pei o faiva o le tuāvao mammalu ia. Ae o le faaaloalo maualuga lea, se o le mea moni, ua malie o, ua malie malo i so'u paolo ma se gafā na saili i lagī, ua mafua ai le-nei fesilafaiga. Alo maia, o lea o le a taumafai atu paia i aiga. Afai e le soo lou titi ma le a'u lou pale i sau silasila, a o se maimoa le tau i lenei aso, matou te momoli mālu i puega ma faamalulu atu, ua le tuua lava ni lelei, ae aumaiā ni masei.

(Teu loa le sii – Oketopa 28, 2006, Samoan Language and Culture, ASCC)

Faataitaiga 2

Ua mapu nei i le sasaga le fetalaiga ma ua ifo foi le u o le tologa i le vagana i lau tofa i le tootoo. Ua ifo foi i le Namo nai le Tuamasaga le utaga fetalai. O lea ua e faalele fulu i le lupe mua ma ua mae'a papae ti'a o le tautiaga i paia tifa to ma mammalu va i vanu o lenei aso. E ui lava ua tatou fesilafai i le fusialo male loifofoga pa'ū, ae le afāina, o lea ua fai lava le fimagalo o le Atua Sili Sili Ese, auā o lona finagalo o le ti'a e le seu, o le maa togi faato, o le tao e velo i le maninoa, ma le u fānafana e le alofia, auā e toli le pula, e fā'i foi le moto. O le affio mai ma le tala mai o aao, se o lea ua manufulu'u la ai e tasi le asō ma ua malama i lagī, e pei o le suafa taupou i atuu le aso faapitoa o le tuafafine ia Mena. Ae o le faaaloalo maualuga lea, palalau maia īinei. A o lenei taimi, alo maia, o lea o le a taumafai atu aiga na luga, itu tetele ma itu taulagi, auā e faigata lo outou affio mai. Faamalulu atu foi pe afai e le tau lau i sau silasila, a o se tagai le a'ua'u i le taumafaiga vaivai,

ona ua soata ma tuietu lenei itu o le aiga. Ae o le lagona maualuga, o le tauosa faatasī o le avega, e mama ai mea uma i aso faapenei. E matou te le 'alo i se ataata o se laau, ua pau o le foai a le Atua i lenei vaitau, ua muafale i moana, ae tuafale i papa. E ui lava ina itiiti le taumafai atu a lenei itu o le aiga, "itiiti ia a lega mea", pei o upu i le Alataua i le Falesefulu ma paupaua ia ae auau i Lepaea, e pei o upu i le Tuamasaga, ae tau ia o se mea e iloa ai Mu ma Vē'a i faalagamaea a le atunuu, ona o lenei faamoemoe.

(Teu loa le sii – Oketopa 28, 2006, Samoan Language and Culture, ASCC)

Faataitaiga 3

O le fetalaiga i le asō ua moni ai upu o le faiva o le tologa e faapea: "Ua le o le fisiga, pe fisiga, ae o le niusina." E mafua aisea ona ou faia o ia faamatatalaga? Auā o le fetalaiga sa faataumuavaa i le asō, lea ua e paepae ai faaulufanua paia o le aso ma le taeao, e i ai le lagona o lea ua tau tonu i le niusina lona manulauti. O le laualuga o ni lagona e faapea: o paia faataotooto o le asō, pāpā le gae'e ma o le a ou le toe tālia tulāfāna pe toe ta i tua le tīli āua, auā o lea ua mae'a paelago mamahu ia, o paia e lipoi faaanavatāu e faleupolu totofi o le atunu, auā o lo latou nafa tausi lea. A o lenei aso ma le affio mai, faamalo, faafe-tai i lo outou fai aiga lelei ma le manatu mai i lenei aso. E ui ina ua tatou feiloai i aso o le louloua ma le malu mai o le taufanuu ona o le malaga sauā a le maliu ma le oti, ae faafetai i le Atua, ua amia le toatasi, ae ua ia tuua i tatou e toatele. Ni aleu o Mena i le va nonofo ai ma lena itu, ia o upu e masani ai le atunu, o faiva o Fiti ia līlīlo ma o Laloifi lava lenei, ina ia auā nei liaina i ala so matou masei. O le a taumafai atu paia i aiga ia. Pe afai e le tau sau maimoa faatupu ma le saa usi lau silasila, ia fāfotā malie, ua le masino nei vaitau i le anoanoai o le mau faalavelave, ua tau mai luma, tau mai tua mea e tutupu i le soifugaga nei, ae o le mea sili, o lo tatou nonofo fealofani ma ferausi a'i.

(Teu loa le sii – Oketopa 28, 2006, Samoan Language and Culture, ASCC)

Faataitaiga 4

Ua silimea nei le seuga a aliseu ma siliose tautai o le gataifale i le vagana fetalai i lau tofa i le failauga. Ua eleele le malie i vai le fia faalogo atu o lenei inu o le malu a o folau lou sa i le malū o le tai traeo. O lea ua e momoli le aimiu o le maea e ala i le faatofalaiga i paia saturday o le asō. O le lagona maualuga la e faapea: o le a ou le toe lo-toiā le lautai fatulalo pe toe ulumatālauina paia totofi ia, o le maota o le atunuu, auā o lea ua taoto lona iviā'a, o le fale o Ao ma Po ua soo lona tiaiao ma e tulutulu i tao. O le affijo mai o le paia o Aiga Satuala, o le aiga faalagilagi o Samoa ma le mammu i Aiga o Mavaega, e puipui malu e le Faletolu, o lau fetalaiga Leulumoega le Tumua, ae a Maauga ma Niuaussala, faafetai i lo outou auvasa mamao mai. O lea ua faiā tu i moana le faaaloalo ae a le asō ma le faamoemoe. Ua moni upu e fai i le gataifale ma le faiva o le alofaga e faapea: "E le tau laeia le *maa piittia ma e le tau faasega ma faafuluna le pa osofia.*" Ua tala foi le Natunatu ma le Nafinifi, o le Falaseesee o Tamalelagi sa leo ai Vaifoa, lea ua tatala i Laloifi ma Falesau, o Fale-lava-o-mavaega, ona o lo outou silasila i aso faapenei. Ailogia e i ai se aoga o Mena i lena itu o so matou paolo tupu, paolo tamalii. Ae faafetai i lo outou aga faatausala, o lea ua faamanava e le Atua galuega a le tuafafine, o lo o sologa lelei lo tatou va nonofo, ona o le tausiga o nei mea o aiga ma ua mutia le ala o la ta sootaga. Talisca ia ma alo maia so matou paolo tupu, o lea o le a taumafai atu aiga, auā e faigata le asō ma le laulua fesilafaiga. Afai e le niusina le maimoa ma le mafai ona su'i tonu le mata o le niu i le taumafaiga e saa usi ai le silasila i le asō, ou te faamalulu atu. Ua manatua e lo'u loto le upu e fai i le tamaitai o le Alataua i Salafai e faapea: "*Ua na o manava o Mailei'a e fia manu ni mea se tele, ae a aso faapenei i lo outou affijo mai.*" Ua siliga foi tali-i-seu ni fomai popoto auā se fofo ma se vailau aoga o lenei faamai o le mativa le tagolima. Ae faafetai i le paia o so matou paolo, ua tatou matitiva fesagai, ona o lenei faamoemoe. O lea o le a taumafai atu le paia i aiga.

(Teu loa le sii – Oketopa 28, 2006, Samoan Language and Culture, ASCC)

Faataitaiga 5

Ua o se i'a e moe mauga o Salafai i le vagana tumalele lea ua ma-puepu ai le malu i le taeao ma le aso. Ua o se ligoligo logo malie foi le fetalaina lea sa faamasausau i le vasaloloa, ua afua ai ona mafanafana lenei itu o le aiga, e ui ina tatou fesilafai i le fusialo ma le loi fofo ga p'ū ona o le valaau a le Silisili Ese. O paia o lenei aso o le a nona i le autalaia ma tootoo au o le atunu, e le tau laeia le maa piittia ma e le tau faasegaina pe faafuluna le pa osofia i lagona o le faafetai i lo outou maau ma le milosia lea ua opea i le maota ma ua mattau e sulu o le tino i le asō lo outou gapatia ma le auvasa mamao mai. O lea ua vaavaii atu le paia o aiga i lau faaaloalo faatupu lea ua e faamanusina, faamalo, faafetai. Faataalolo la le leo o le tamaloa o Telei'ai, e le toe auhiliihina ma autala faapao go ou mammalu ma faigata, auā ua manino le suo tulutulu o lo ta fāia ma le va nonofo.

(Alo maia, o lea o le a taumafai atu aiga – Novema 26, 2008, NUS, Samoan)

Faataitaiga 6

O lagona sa fesiliglia i le asō pe tua ma ni a faiva o Pa'usisi. A lea ua atoa tipe i le fafao, ua atoa foi tipe i le fala, e pei o upu i le faiva o le taulafoga. Aisea? A lea ua agiga i le tupua ma le laoai lo outou faamaloulou mai ma le sii mai o le fala siigata, ua tu maualuga ai lenei aso ma la tatou fesilafaiga. O lou fui susau ma lau feralaiga au lea ua tu tonu i le niusina e pei o upu i le faiva o le tologa, e le toe fono faapi-pi pe piama i ai se manatu o Telei'ai. O le lagona maualuga, o lea ua taoto paia ia o Samoa ae o se ala oo, o mammal le popo ma pa le solo, e le toe sii foi i ai se matalalaga pe faufau se isi ala fausa, e pei o upu i le Matuuuu ma lona aiga. Seepapa. O aso lava faapenei ua na o manava o Mailei'a e fia sua le lau eelele ma gagau le vao lea. E i ai foi le agaga e fuli le mauga lea ma faaa'e le tai i sa matou talimattū, auā faiga le faaaloalo lea ua e faailo le falevai i le fogatia, peitai, ua pau o le foai a le Atua e talimasineia ai ua tatou feiloi.

(Alo maia, o lea o le a taumafai atu aiga – Novema 26, 2008, NUS, Samoan)

Faataitaiga 7

O le igoa lava o le toga masani a le atunu – Se! o le Tasi ae Afē. O le matau lena a sulu o le tino, auā o lea ua fafati mai pou o le maota (*igoa o le maota e faasino i le paolo*) e faasa' osa' o ai lau afioga i le Sa'o (*igoa o le Sa' o lo o ofio mai i le paolo*) ua afua ai ona tasi ae le asō. O le asō, e ui lava ina pouliuli le nuu ma uifitia lenei itu o le aiga i le ao pogisa, se ua manino lagona ona o lo outou affio mai ma le tala mai o aao. Malo le fetalai ma le vagnana na malele i lau tofa (*igoa o le tulafale*) o le sa tu i le foe ma fai ma fosoga o le faamoemoe. O lea ua outou tili alualu mai, aisea?, auā ua sopolemalama le alofa ma le manatu i aiga i aso faapenei, faamalo, faafetai. O paia o lenei aso, e le toe ulumata'lauina i se leo o Telei'ai, auā ua mae'a papae faatulumu o le lagi malofie le maota o le atunu e tulutulu i tao ma ua soo lona taiao, faataalolo mamalu ia.

(Alo maia, o lea o le a taumafai atu aiga – Novema 26, 2008, NUS, Samoa)

Faataitaiga 8

E le fetaa'i faalou le magā ma e le saetia fua le maaveave le fua i lo tatou sootaga, auā e va lalata toe saoo lona soo tulutulu, o uafalaumanaveave na o le nonofa faatasi o nei mea o aiga, e pei o aso faapenei. Taoto la faamaene i le tai loloto paia o lenei aso, auā o le fue lavelave, o le vao filifili ma le i'a iviviva, o lea ua e fetalai pito tasi i ai ma ua mae'a tapena i le nei aso. O le masii mai o so'u paolo ma so'u faamaluuga e fai ma o'u maluapapa, tainane lo outou faaaloalo fatupu lea ua i maota, se o le mea moni ua susū'u, ua 'afu foi ma le luluu lenei itu o le aiga ma la matou matau i le asō. Aisea? a lea ua outou tatala le toga tala gatā. O ie sa tofa i maota ae moenai i laoa lea ua faamanusina i le asō, ona o lo outou silasila i lo tatou va nonofo a'i. Ua le o toe faigofie nei aso, auā ua tau mai luma, tau mai tua le mau faalavelave. Peitai, ua le avea lea ma mea e 'alo ai i se paolo o le laau mafala ma outou le alofia ai le tutuu laau mai i le ala ma le aau mai i vasa e fia, lea ua tu maualuga ai lenei faamoemoe.

(Alo maia, o lea o le a taumafai atu aiga – Novema 26, 2008, NUS, Samoa)

Faataitaiga 9

E ui lava ina lilo malaē i le vaai e pei o upu i le faiva o le alofaga, peitai, o lea ua ite fanua a lalo ma ua sina le galu i o matou tagata talu lo outou faamaloulou mai ma le tala mai o aao. O le su'e fuesue o le tai ma le le toe tu o se ola i le lukaluka o le savili i le gataifale ona o ou paia faufigatā ma mamaulu sautauao o lenei aso, e le toe faafuataina i se leo vaivai o Telei'ai, aua e lelei ona ou seu malie lupe o le foaga, a o agi mālū le fisaga i mauga seu ma tia maualuluga o alii. O lea ua tau-muatasi la outou faaaloalo ma ua malama i lagī ma matamata nonofo le maota lau i asi ma namamu 'oli, ao silatoga ma silamalo i lau faatupu ma lau aga faafaleupolu, faamalo, faafetai. O lea ua malie le faga i foa ma le faga i lalau, o le papaialagala ma le papa o le faatolotologatama, ua lele foi le se, ae taele ma 'au'au le pepe ona o lau faaaloalo ua tōtetele, se ua matou sapaiā fatu e o eleele.

(Alo maia, o lea o le a taumafai atu aiga – Novema 26, 2008, NUS, Samoa)

Faataitaiga 10

Ua pei lava o le namamu sasala o le pua tau pea ma le mumutu i le lolosha o tupu lagona fiafia e totogo a'e ima ua tatou feiloi. A o ni ufi foi e tutupu i tino matagi lelei ma le agaga fiafia e maunu faatapua o le gaataifale le lagona o le meemee, auā o ai ea na illu ma tatalu tatou te feiloi i aso faapenei. E ui ina leai se taupaleu'u ma le finagalo o le Atua, auā o le mua e le fumatia, o le tao e velo i le manimoa, o le ta e le agaia, o le matagi e agi le soā, o le ti'a e le sua, o le maa e togi faato ma le ufanafana e le alofia, peitai, faafetai ua la amia le toatasi ae tuua i tatou e toatele. O paia o lenei aso, e le toe alautaina ma tolovaea i sa'u famatлага, auā e le ogē maa le sami, e lelei ona taoto i tootoo uli matootoo sinasina o Samoa, auā o lo latou nafa tausi vatele lea i ai. O le fesilafaiaga i le asō, e le tau matematea faaliu o vaa o tautai lona mafaaaga, auā o lena ua nofo fale Sa-Tuiamaa i o outou finagalo lo tatou faī ma le sootaga, auā ua mutua le ala.

(Alo maia, o lea o le a taumafai atu aiga – Novema 26, 2008, NUS, Samoa)

Faataitaiga 11
E le fesiliga ni mulivai fetafea'i ma ni taupega afa na aami i lagī, le pogai ua afua ai ona tatou umufono talatala i le loi fofofa pa'ū ma ulu mea fatu fala i le agaga faanoanoa. E ui lava ina ua seei le faifailii ma le see i ona nafa i lenei maota namu 'oli ma le fale ua lau i le asi, e talitonu le manatu, e leai se isi e tau masina ma le finagalo o le Tapaua i le Lagi, auā e toli lava le pula, e fafā'i foi le moto. Faamalo le fetalai, o lea lava ua taliga fialogo le mauga o Matautia i le faalologo atu o lenei itu o le aiga. O lo outou aao ulufia ma lo outou noonooia lea ua folasia i lumānea, lea ua olua luuluu ai le asō ma toe taimi o le peau faamavae o le lagī lea (*igoa o le tagata malu*), faamalo, faafetai. O lea ua e tatala ie o auafā sa tofa i maotaga, ua agiga foi moega lafo sa moenai i laoa, o ie sa faapolopolo faamatuua moepo, o ie e tatala gatā, se o lea ua silamalo ma silatoga i malae ma maota, ona o lo outou si-lasila i lenei faamoemoe.

(Alo maiā, o lea o le a taumafai atu aiga – Novema 26, 2008, NUS, Samoa)

Faataitaiga 12

O le paia o le asō o lea ua mae'a paniniu e lou fofofa lafo ma le vagana fetalai. E le o i a Telei'ai foi la se agatonu po o se atamai faatufuga e fialima ma'cae'a e toe apaapa ai i paia ma mammalu sautualasi o Samoa, auā o lea ua taoto lona iviā'a, e leai se vave na te toe auauina. O lo outou affio mai ma le tala mai o aao, a lea ua malumaunu ma savei-oloolo ai le maota ma le laoai. O la outou faaaloalo maualuga lea ua matou matau manino ma le toto'a, lea ua maalo faaiu ofe o tantai le faaaloalo lea i la matou vaai. O lea foi ua malama paia o aiga i au teu-ga ia, se ua le 'ole lava lea, auā o lea ua manufulu 'ula e tasi au tu ma aga faatupu i le asō, faamalo, faafetai.
(Alo maiā, o lea o le a taumafai atu aiga – Novema 26, 2008, NUS, Samo)

Faataitaiga

E ui ina eseese lanalo tatou te ifo mai ai, tulou, e le o oe o se Saumani Afaese, o oe lava o le suli ma feoi o le Aiga Sa-Saumani; o le tama foi a Tutula ma Tutula, auā e le o se futu na tafea, ae o le futu na tupu olaola i le faasinomaga lenei talu le Atua ma le talalelei, ua o tatou oaoa ai i faleseu ae saa i maa o malie. O so'u paolo ma so'u faamalumaluga faa-kerisiano, a lea ua ou malu ai i itu e fia o Samoa ma le atu laulau. Taoto ia faagalu le fati paia o le asō, auā o lea ua tuluma e momoe faatasi i le tupua ma le maota lenei, e leai se maemae o Telei'ai e toe atofuli faa-le-atoa ma fetuwai faamuniao paia o Samoa, auā o le ao mamala ma le fāasouga o ao i le atu folasa. A o le asō, ailogā e faupu'e ma ola fetitii se tautua a le lagī lea, tulou (*tagata lea ua oti, po o le tagata e tauala mai ai le sii a le matagaluega*) a o lea lava ua outou faatietie Asomua i le mauga ma ua outou le silasila i ni masei, ae ua outou eleelea ma lefulefua, timuia ma sautia, ona o le agaga fetausia'i ma lo outou valevale alofa i le mafutaga faa-le-galuega.

Faataitaiga
(Alo maiā, o lea o le a taumafai atu aiga – Novema 26, 2008, NUS, Samo)

Sii o le Paolo Faa-le-Ekalesia

Faataitaiga
E le o ta'ua o ni suli taufegai e mamate ai i mea lilo ma tau tuu fesili faaliu o vaa o tautai lo ta sootaga, e leai. O oe lava o lo'u uso tuofe, auā ta te taaalo fua, o ta'ua lava o le au uso, e pei o le malelega a le tupu o Muaguititia. E tasi lo ta pito 'afu, e tasi lo ta ali, ta te aluluga i le lima e tasi, e tasi foi le susu ta te fesusui ai, e ala i le talalelei, o le taeao o Mataniufeagaimaleata, o Faleu ma Utuagiagi, o Malaeola ma Gafoga (*tæeo o isi ekalesia*) lea ua nofofale Sa-Tuimaa i o outou finagalo ma o matou faamoemoe. Aisea? o upu lava o le mavaega i le Maluapapa, see ia i la i muliau o iu galu paia o le atunu, ae muaau i ulu galu paia o le aufaigaluega togia, o le aiga lea o Sa-Levi. E le toe faalanuina la paia o le atunu i se upu auā e fata lele lava ma fata folā

mamalu le avea ma sa le toesea o Samoa mai le vavau e oo i le faavau. E le tau laeia faa-fatu osoria manatu tuu mumusu nei sii ma tnu, ae o le agaga faafetai i lo outou affio mai ma le tala mai o aao, ua mauluuga ai le asō ma la tatou mafuttaga.

(Alo maia, o lea o le a taumafai atu aiga – Novema 26, 2008, NUS, Samoa)

Isi lauga tali e fai ai lau tapenaga

Faataitaiga 1

Ua matamata nonofo le maimoa a le aiga nei a o fofola lou maua ma lau faatamalii. Talofa ua e le aumaia le iula. Ua le o le ulula foi lea ua e maua i ai, ae ua au lava ina e faafetai folia o Sa o tupu i Pomaseseme, ae se'i tatala le Lautaaamu tafea. E le gata i lea, ae ua e apo foi le laulau -i-vasā o le alofi i le vasaloloa e ala i le malo sa auafā i maota/malae (Aiga Sa-Mahietoa) – To le Timu.

Faataitaiga 2

Ua silaloa le mammal o le aiga nei i lau faaaloalo. Le faamoemoe sa lafo i le Atua o malo pe tua i ni a? A lea ua faamaloulou mai so'u pao-lo e, ou te malu ai. Faafetai ua e le Sii ma Tuu, ae ua e sii le tuu, ai o lou silasila i le tupu o Fonoti. O so'u paolo e ma so'u ala i malo, e le gata ina ou faalogo i lou siufogfa, a o lenei foi ua ou vaai au i ou fosoga, tulou, ou te taulagi pea lou suafa, o oe o lo'u faamalumaluga (Aiga Taulagi) – Ua tafea/motu le moli.

Faataitaiga 3

Tuula ea ma lou faitama ua aliali. E alilioaiga oe lea ou te faalagi! Ae o le asō ma lo outou affio mai, se! ua e tatala le Natunatu ma le Nafinafi ona o lou sailimalo i le apuhupulusia o tofaga ma le taoto ai i falaefu o le Tupu Tamaitai o Salamasina/Tafaifā. Le tautua faatupu ma lau tautua le gāse lenei ua ou pale, ua ou titi. Ua ta imu ua malie, ua 'ai foi ma le tuu malie, lau faaaloalo lea ua 'afu ai nei ita le tufanua, ae fai ma luuga ma te mau faatasi i le maota/tupua nei (Aiga Sa Tuula) – Ua gau Olosaa.

Faataitaiga 4

A o le matagi sa agi salululu lea ua fai ma matagi to'a. Le vai foi o le tama sa fulu-ma-sou lea ua fulu-'ula-ma-seu silasila i lau faaaloalo i le asō. Le tama sa taufaanofo a o ai sona aiga. Le aiga na saesae laufai ai Tumua i le Tupuauiavailili, ina ua gafa-e-tasi Sa Tupua ma Sa Malietoa i lona faasinomaga, ae fafa i tua Sa Fenunuivao (Sa Fenunuivao) – Ua Gasolosolo Ao/Taape Pāpā.

Faataitaiga 5

E ui lava sa tupu i le fusi le soo'ula o aso lelei i Faupi'o, talofa ua le logo malie le pese i Laloifi ma Falesau o Faleomavaega, ona o le motu o le asoa ia Tofoiopupu ma le toulu o 'auta ia llaoa ma Toomata e faasi-no i le Faatui o le Motu. Peitai, o le sii mai o le fala siigata i lau afioga i le Alo o Salamasina, e manatuai ai Tapumanaiā ma ona tafai i Iu o Atua – a! se mea ina matagofie o le mafuta faatasi tupu i aso o le faauvau. O lea foi ua e faamanusina le Pulou o le Ola sa tao tasi i Aso-tau, se ua le 'ole lava lea.

Faataitaiga 6

O lea ua tēfa le tauuala ina ua tau to'a le finagalo faitasi o le Atua sa matagitogaina, ai le aiga nei. E ui i le loto nuti momoa ona o le faamalumalu o le taufaanuu i le Alataua ma le nuu nei, ae manatuai i lo'u loto le malelega a le Malietoa i aso o le pogisa ma le fefilitua a'i o Samoa anamua, e faapea: *Samoa e, a tili tagata le vaaloa, feeli ia a outou fo'e i le aufuefue o lo o i uta. O i outou tua le sami uli. Se'i gigili ifo le vaaloa o agaga i le alittai, ona outou mapu lea ma filemu.* O lagona lena o aiga o lo o faavaotutu i le Faupi'o, auā ua fa'i mai le pou o le talaga i lau afioga i le Tupufia, o le sa tali i manū ina ua tafea le utu a Taufau ia Tupuivao lea sa talia lupe o pupula, o lupe o maunu, ao luke foi o le tuumoe. Le Pepevea sa afuafua i Aana, Maauga ma Nuuausala, ae faaifo i Alo i Tafuna, se lea ua faalelea ma silamalo i ai Laloifi ma Falesau.

Faataitaiga 7

E ui lava ina moe i le ufu lagona tiga ma le mafatia o le aiga nei, o lea ua to'a i le paipai ona o le mafanafana o le Atua. E sili i lo lena, talofa i le Aiga Paia na fai seagaiga i ai le tupu o Tuiaana Tamalelagi, ina ua

atugalu i le Vai Utiao, ae fataata i Maauga ma Nuuausalma mafua ai ona suia ia Sooa' emalelagi lona suafa. Talofa Levalasi, e ui lava o ou tulaga tupu, ae o ou nafa faioa na afua mai ia Matuasaasaa ma Matiu, e matua i ai le faautufugaga ia Matiuau ma le Auseepapa. A lea le Pulu ma le Leuleu sa moe faamatu moepo i Mulifusi ma Tanumaleu lea ua e faamanusina. E moni lava e matua le tuu o aiga o Samoa ia te oe, ua afua ai ona mātu loimata o aiga i Faupi'o ona o le maua lea ua opea(Aiga Sa-Levalasi) – Ua pa'ū le Masina.

Sailili Atili

Manatu anoa muamua – E talafeagai ea le toe lauga umi o se tagata e tali fuaiteau i se lauga o se sii, pe na o le piama ma pioa o lona sa i le tulafale lea ua mae'a fetalai?

Manatu anoa lona lua – O le taua o le lauga tali, o lou faaacogaina lea o le vaogagana o ni pine faamau ma ni lagisofua o ni mea na tutupu i le nuu e agai mai ai paolo tairasi. So o se tulafale atamai, na te faaacogaina ni alagaupu ma ni muagagana na afua mai i lea aifoaga. O lea faiga, e faailoa mai ai le tulafale o lo o nofo tapena ma saumiumi lelei, a o folifoli mai le faalavelave. Se'i faaali mai sou taofi i lea mau.

Manatu anoa lona tolu – E i ai ni isi faalavelave ua matauina le tai-toalua o tulafale e talima sii o paolo po o le sii alofa mai o aiga, uo ma aumeamamae. E i ai se afaina o lea faiga po o ua tatou see faatuagalu ma 'aloese mai le faavae na masani ai Samoa anamu?

Manatu ano lona fa – O ni isi o taimi e matauina le faalalolalo mai o se tulafale o se paolo pe a oo le lauga tali a le isi tulafale e faafetai ai i toga igoā o Aiga tetele o Samoa. Ft: O Aiga Sa Malietoa, o le Lau-taamu tafea; O Sa Levalasi, o le Pulu ma le Leulen; o Sa Tuala, o le Natunatu ma le Nafinafi ma isi toga e patino i aiga tetele o le atunu. E mafua aisea ona faalalolalo mai le tulafale o le paolo lea e sii mai?

Manatu ano lona lima – E masani foi ona faalavelave le tulafale o le paolo i le lauga tali fuaiteau a le tulafale o lo o tupu ai le faalavelave, pe a oo lana vagana e toe talanoa ai i lagis Samoa. E mafua aisea lea tulaga ma o le a foi lou taofi?

Talaga Teu

E tali tutusa lava le vaogagana o lauga o se talaga teu, po o se liu tofaga foi ma vaogagana o lauga o maliu. E ui lava ina eseese talitonuga o le atunu i talaga teu lea e faatino ina ua mae'a se tausaga talu ona tuanai se maliu o se tagata o se aiga, ae auga lava i le uite tasi, auā e lautusi lava e tasi le maliu, talaga teu ma le liu tofaga. O ni isi o afioaga e ta'ua lea tu ma aga o le talaga 'ofu. O ni isi foi o tuua o afioaga e saili i ai le tofa a le atunu, e talitonu o le talaga teu ua o se tu ma se aga o le tatalaga o le tausaga o le faanoanoa, ua patino lava na o tamalii. Peitai, o nei aso ua i ai suiga ma ua faatino lava i so o se tagata. E foliga mai i nei lava aso, e fua i le malosi o se tamaoaiga o se aiga. E taofi isi o talaga teu e le tutusa le faiga ma le maliu i le uluai taimi na osia ai le lagi o le tagata lea. Peitai, o isi lava aiga, e tutusa lelelava le talaga teu ma le faiga o le maliu.

MATAUPU 9:

Lauga o Talaga Teu ma Liu Tofaga

Liu Tofaga

O le liu tofaga, o le toe eliina lea o le tino o le tagata ua leva ona maliuma toe tuu atu e taooto fatasi ma se isi tagata e finagalo i ai le aiga. Etalatuu mai faiga 'ai ma faaaloaloga i se liu tofaga, auā ua loa aso taluona i le tuugamau le tagata lea ua toe sua le mea e teu ai. O ni isi oaiga ua na o se taumafataga, po o se inuga ti. E faataeelelei ivi i le sami po o le faaaoga foi o se fasimoli e fufulu lelei ai, e pei lava o se faiga o se tagata o lo o sofisua pea. E uu lelel i le faguu ma ta'ui pe 'au'i se siapo ona tuu lea i le tuugamau o le tagata lea o le a la taooto fatasi.

Auivi

1. Folasaga
Upu faano fogofie po o Upu faanofo filemu
Paia/Mamalu
2. Aano/Autu
3. Faamatafi

Auiliiga o le Auivi

Folasaga – O upu ia e faanofogofie ai le aofia ua tuluma e momoe faatasí ma ulu mea fatu fala i se faamoemoe. O le tele lava o upu nei e faaaoga i nei ituaiga folasaga, ua o ni alagaupu ma muagagana. O fava lava o le tuāvao ma le tuāau lea e matele i ai failauga e faaaoga i a latou lauga i faalavelave fāapenei o le atunuu. E aofia i totomu o lea folasaga le faalupeina o paia ma mamalu, lea ua poto moli i lona futiafu i lea aso tuupoina.

Aano/Autu – So o se faalavelave lava e fai, e tatau lava ona i ai se faapogai ma se autu e masi ai se paolo, o se sii alofa, faatasi ai ma i latou e tauaaoina ni fesoasoani i lea faalavelave. E leai se mea e ono tupu fua, e pei o upu masani a le atunuu, e le falala fua le niu, se'i vagana ua agi le savili. E faapena le atunuu lenei, auā e i ai uma lava ‘augia o mea e tutupu i o tatou laufanua ma faasinomaga.

Faamatafi – O se mea masani lava lea i so o se lauga. Peitai, e i ai isi lauga e le faamatafia, ona o lo o i ai isi taimi o le mafutaga o lo o totoe. O faamatafiga, e aofia ai faamaniuiga, faatoesega, ma faamavaega, e pei o lauga masani a le atunuu i so o se faalavelave.

Lauga o le Talaga Teu

Faataitaiga

A alofaiva se tapuaiga ina ua masii se alofaga a se afioaga a le tautai, le tauta ma lona aiga tautai, ona faapea lea o upu a toeaiina, “*se o le aso ma le filiga.*” A aao gagase le fale tapuai ona o le fitaituga i le se’iina o le moia’ā, filitagaga le faataa, ae filifā matofī lelei, ona talaleu lea o le maota ma tau falo po o ua tau seseu mai se tila o le fua o le aau i fanua ma faapea a latou upu, “*se o le aso foi ma le matigatila.*” O le asō e moni ai upu a le au ositaulaga, o le aso ma le mea e tupu ai. E faatulou atu ai le paia maualuga ua manūtiao i lenei aso.

(Faatulou i paia ma le mamalu ua aofia)

E le toe tau tapue faataau ola ma toe sopoutu foi faavai fetafea’i i tuaoi le auga ua mamamu tupito i ai le asō ma le faamoemoe. Aisea? O lea ua tatafi malie ese atu le tausaga o le mafutaga ma le sa pele ma mamae pogisa ai lagona, talu le motusia o le mafutaga ma le sa pele ma mamae i lenei soifuaga, ae ua motusia ona o le malaga sauā a le maliu ma le oti. E ui i se manatu e fia mafutua pea, peitai, e pule toatasi le Tama o i Lagi, auā o Ia e ou le faasoa i lo outou soifua ma lo tatou ola. O lenei la aso, o lea ua fatou molimauiua lenei faamoemoe, na o le agaga e faafetai ai i le Atua o Malo, auā ua atoalio o le masina le maualuga o lo outou soifua, lea ua mafai ai ona tatou fesilafai.

A saausi le faamoemoe i le asō, aoauli sau se itula, siimea le seuga, siliofe tautai o le gataifale, ae silissaaga lenei mafutaga, Ieova Irae, puipui malu le soifua i le toe taliu atu o le uto i fanua, i aiga o lo o tapuai mai ma tu’i o le mulipapaga. La maua le tofa faa-le-Atua i tamalii ia ma tapaau. Mamao ni laumea e toulu i le savili ma ni tuātafalu e folfoli mai. La faagaganaina e le Atua o upu le lauga ia te outou o faleupolu tofia o le aiga ma le nuu. A tatou mavae i le asō, o manū na, o manū nei. Soifua maloloina lenei itu o le aiga, ae ou ola i le alofa o le Atua.

Lauga o le Liu Tofaga

Faataitaiga

A poia faamanu i ofaga ni malo i se afioaga, a o lo o faauilulito le taufaanuu ma loloma le totō mai o uaga, e masii lava le fua a le aiga tautai. A fau ao fau po se malaga, ae ua le ulimasa le aso faamoe-moeina ona o tulaga louloua o le tau, e tuu a i tai le vaatele ma sauni e folau ma le matauga o peau, ona faapea lea o upu “*ua jaapopo a ua o ni aso ua, o aso folau foi ua le tuua.*” O lagona molitino na o le asō, auā ua mapue tiasa, ua nofoia foi tia maualuga, i le paia tele lea ua malutuae i le asō.

(Faatulou i paia ma le mamalu ua aofia)

E ui lava ina agi salululu le finagalo fāitoatasi o le Atua, o le

Sailili Atili

matajagi le soā eoso faata'uta'u e le matineia, ae ua loa tausaga ua mavae ma aso e tele ua tuanai, o lo o matau pea e sulu o le tino lona agalelei ma lona aao taitai. O lenei aso ma le faamoemoe, o lea ua i aai o outou finagalo lona mafiuaga ua tatou laulau fesilafai ai. E ui lava ina ua moru faaasoa le mafutaga ma e ua pele ma i tatou, o le Atua lava le pule i lo outou soifua ma lo tatou ola. Ae faafetai, o lea lava e maualuga le atoalio o le masina i le soifua o le aiga i le asō, e le gata o toe uluitaia o lo o mammalu ai le aitu o ole aoa i le aiga i nei vaitau, a o le aotelega o le aiga i le salafa o ona tulaga faalupue. O le matuitui o le oti, ua suia nei i taeao o le talalelei, i Mataniufeagaimaleata, Faleu ma Utuagiagi, Malaeoila ma Gafoga, ae silisili ai ona fo'a o outou finagalo ma filemu o tatou loto i le Agaga Paia o le Atua i le taeao sili o le talalelei ma la tatou talitonuga, le taeao i Sinave ma Ulumotootua, lea ua o tatou sapi ai nei i maa o malie ma oaoa ai i faleseu. Nona la ia le agalelei o le Atua i ana auauna, o lo o faatunapaulia i afioaga eseese, ona o le utuga taufa ia Keriso ma lana faaolataga.

Se laofie lelei taape le fuamanusina, ia taape a fatuati le mafutaga. Ia faamaniua le Atua i lau susuga i le Faafeagaiga Taulagi ma louna nafa tausi, ae a le finagalo o le Atua i lenei niu. Soifua maloloina tamalii o le aiga. Maua le lauga ia te outou o tula o le aiga ma le salafa o le nofoasufa, ae ola se vaivai o Tele'i ai i le agalelei o le Tama o i le Lagi.

Manatu anoa lona muamua – E tutusa ea le faiga o maliu ma le faiga o talaga teu?

Manatu anoa lona lua – O se aganuu ea a Samoa le talaga teu po o se aganuu lautele a le Atu Polenia?

Manatu anoa lona tolu – Aisea e ta'u ai e le atunuul le uluui tausaga o se tagata ua maliu, o le tausaga o le faanoanoa?

Manatu anoa lona fa – E i ai se taimi faatulagaina e liu tofaga ai e le atunuul tagata o latou aiga, pe seiloga ua talafeagai ma se tofa i le paia o aiga?

Manatu anoa lona lima – E i ai se talitonuga masani o le atunuul i le fausiania o tuugamau ma lona faatulagaina i aso anamua? Faamata ua i ai se suiga o lea faavae i nei aso?

Manatu anoa lona ono – Aisea e tutusa lelei ai ma le palapala le fausaga o tuugamau i aso ua mavae, ae vagana ai tia o tamalii iloga o aiga e fau faamaualuga? E i ai se oa natia faaleaganuu o lo o ataataa mai i nei faiga faavae anamua?

Manatu anoa lona fitu – E i ai ni suiga o le fausaga o tuugamau i nei aso? O le a sona fesootaiga i le talalelei? Aisea?

Auivi

1. Folasaga:
Upu faanofogofie po o Upu faanofo filemu
(paia/faalupega)
2. Aano/Autu
3. Faamatafi:
Faamanuiaga/Faatoesege/Faamavaega.

Auiliiliga o le auivi

Folasaga – Faaoga lava upu o nunuavaga/faaipoipoga po o upu o le faasinomaga o lo o fai ai le faaipoipoga. O lea faamoemoe sa faatino i le afioaga o Saleimoa, e pei ona tagai i ai i le uluai laina o le lauga. O le avanoa lea i le aiga o le alii faatoafaiāva, e pei ona outou silasila i ai ile faataitaiga o lo o i lalo.

Aano/Autu – Lauga tonu i le manulauti o le aso. Faaaoga suafa sa'o aumaga o le aiga o le faatoafaiāva ma le suafa sa'o tamaitai o le aiga o le faatoanofotane, e mamantu ai le lauga ia susua lelei i le faafofoga a le aofia.

MATAUPU 10:

Lauga o Nunuavaga ma Faaipoipoga

Faamatafi – O le faamae'aina lava ia o lauga e pule lava le tulafale po o fea o mea ia e tolu e fauma ai lana lauga, po o le faaaoga uma foi. E leai se tulafono pe faaaoga uma pe faaaoga na o le tasi.

Lauga o le Nunuavaga/Faaipoipoga

Faataltaiga

Tootoo – Papu Toleafoa (SAM 26I, ASCC)

Ae ou te le i so'aina le loto na i le Itu-tolu o Sagaga ma le Fale-ono o le Atigana, Faleata ma le Gafa, e pei o le upu e fai i le afioaga lenei ma le Fale Tuamasaga, ae ou te le i faapoipoi lili'a faalaau tu i vanu, e pei o le upu ia Lemalu ma Lemamea ma lo la fale na toesea, e muamua ona faetefimalie le vaogagana ma ou faatulou e tapui ai le

tapu o Tupolesava le aloalii i paia sausaugata lea ua malutauee ma tini-
tauao i le asō, tulou, tulouna lava.

Faatoulou loa i faahupega:

Faifeau

Au valaaulia

Aiga na hua, i ona itu tetele ma ona itu tau lagi

O paia o le aufaigaluega a le Atua o le a faataalolo i fata
fataulaga e fia, o lo o nōnō manū ai suli ma feoi o Sa-Levi, auā se
manuia o Samoa. O paia o le atumuu mai Malaetele na maape ai tofiga
o Samoa, se ia pa ia Filimapuletuu na tauilo ai malo o le Malietoa, e i
ai le lagona o le a nona ma faalelepa ia. Tumua ma Pule, o le au tolo
popoto ma le au talaiā o Samoa, auā o lo latou nafā tausī lea.

E faataumuavaa se manatu i le manulauti o lenei nunuavaga i le
afioga (*Sa'o aumaga – o le aiga o le tama*) ma le afioga ia (*Sa'o –*
aualuma o le aiga o le teine). O le feagaiga o le sakarameta paia lea ua
osia i le va o (*faahupega o aiga o le tama*) ma (*faalupega o le aiga o le*
teine). Faafetai o lea ua le faletautu faaahuolu, ae ua talia le fale na
fuafua, ae o se aumoega ma le faletautu i le afioga ia (*igoa o le tama/*
sa'o aumaga) sa toai taunuu i le tupuatausi lenei (*malaefono o Salei-*
moa).

Faafetai i le aufaigaluega

O le paia i le aufaigaluega nofo tatalo, o la outou pito laau i le
asō, se ua malie mata e vaai, ua malie taliga e faalogo, ua faamalo le
fai o le faiva. O lo outou tuutuu laau faamanuiti mai e ala i upu
apoapoi i le ulugali fou, e i ai le lagona ua lava taoso ai i laau, auā le
soifuauga lenei. La faatumu e le Atua le utu o le folafola, ae a le galuega
fita o lo o feagai ai ma outou susuga.

Faafetai i le auvalaaulia

O le paia o le auvalaaulia, faamalo i lo outou affio mai, le tala
mai o aao ma lo outou faamaloulou mai. E i ai le lagona maualuga, e
tele a outou tuutuanoa, o tiute ma faiva e feagai ai i lenei aso, ae ua
outou le 'alo lava i le ataata o le laau, talu lo matou faatalauula atu, ae

tainane lo outou faitama e ala i le faamoemoe o le fanau lea. La tafī-
mala e le Atua le toe taliu atu o le uto i aiga ma nuu. La mamao ni lagī-
lagia i tapaau ma tupu o le atumuu. La maua la outou lauga i le paia i le
nofo-ar-faleupolu. Soifua laulelei le lautele o le aofia.

Upu faamanua i le ulugali fou
la manuia le ulugali fou. La fua fetitii ma fua tele le niu.

Faamatatfiga o le aso

- | | |
|----|-------------|
| 1. | Faifeau |
| 2. | Aiga na lua |
| 3. | Auvalaaulia |

Ae ola le leo o Toleafoa i le agailei o le Atua.

Manatu anoa lona lua – O le a lea mea e ta'ua o le faletautu po o le aumoega?

Manatu anoa lona tolu – O le a le umi e faatino ai lea faiga masani a Samoa, a o ai foi tagata e tatau ma onomea ona aafia ai lea faiga?

Manatu anoa lona fa – O le Faletautu Faauluualuo, o le aumoega po o le faletautu ua le talia. E i ai se isi ta'uuga o leat tulaga?

Manatu anoa lona lima – O le a le fesootaiga o faaipoipoga ma le ulumoega? Ae faapefea le upu o le Faafaillelegatama po o le Faafaillelegapepe?

Manatu anoa lona ono – O le a mea e tauaaao mai e se ulumoega, a o le lona fia foi o tamaiti e faatino ai lea aga masani a Samoa?

Manatu anoa lona fitu – Faamatala le uiga tonu ma le aano o upu nei:

- Numuavaga
- Soa
- Faamasei'au
- Tini o Tausala
- Sasae le mata o le aitu
- Aiaavā

MATAUPU 11:

Lauga o Umusaga & Faaulufalega

- Umusaga o Pale
- Umusaga o Tatau
- Umusaga o Vaa

- Auvio lauga o Umusaga – Fale (faaulufalega), Tatau, Vaa**
1. Folasaga – Upu faanofofogie/ Upu faanofo filemu
 2. Faalupega/Paia
 3. Aano/autu o le aso
 4. Faamatafi

Umusaga o Fale

Faataitaiga

AE ou te le i folau i le siu matagi, pe faatutila lo'u vaa i le tatafousou o le au i ou paia sausaugatā Samoa le atunuu tofi, e muamuaona ou fatinī le u o le tologa ma ou tapui tapuafanua sa o ou tupuatausī ma laoai tumaū (*igoa madae*), auā ua tagata loaloa le vao ina ua sāsāle aveo, se o le tala ave, ua sa le pisa, ua sa fōi le pā'ō, tulou.

O lea ua ulimasao ma ua tafesilafai le taeao ‘ula ae pou i toa, epei o le upu i le itulagi nai le tafai ma le siu Amoa. Ua le o se taeao ose faauluuto pe o se faamategatau, auā o lea ua feiloai i pue o mafaufau, ae le o le pue o le timu to ma le agaga faavaauvau. Ua feiloai i pue o le alofi sa ae le o pue o matagia. O lea ua totō le fūfū i letaeao, ua talaga pasina foi le mafua alii, ina ua taa fanua le igafō o le tuāau, auā ua tuluma e momoe faatasī sa ma faiga o Samoa ua potopoto, ina ua tatou umufono talatala i manū, feiloai i le ava fatafata ma letotogo o malama, tulou, tulou, tulouna lava.

Faatulou i paia masani – fājfeau ma le au valaauia

Faataitaiga

Tulouna lau afioga i le agaiotupu Tulouna le matua o faiva o le faatuifugaga o maota o le atunuu Tulouna le falefa o lou aiga na malamalama ai Samoa Le falefa ia Selefuti, Segi, Leifi ma Moe, o le aiga lava o Samalamama Lemalamama Tulouna lau meanai-na-taua Tulouna lou apisa Tulouna le tafili o le vao ma lou asaasa mamao

- Tulouna lou fale lauvao ma lou fale laufao
Tulouna lou faleta
Tulouna lau sausau ma lou toi fafau
Tulouna le silā, le ulaoge ma le toū
Tulouna lau laina, le timuia, ma lou oolooloia
Tulouna ou sa ma faigata

AE o le taeao ma le aso e manatua i lo'u loto le fale o Po ma Ao ua soo tajao le atua ma ua tulutulu fōi i tao. Ou te manatua le maota o le atua fafine o taua, lea na au ai le inailau a tamaitai, ae talisoa le i'a a Nafanua. Ou te manatua le maota o le Tui Aana i Mauga ma Nuuausala, lea na laga aile muli pou ae aumai le i'a a le Ao o Salafai ma faapea ai le faamatatalaga: Aua le poia Paleolō, le maota na malama ai Samoa ina ua velosai lona uluai 'aso ma to ai le matupalapala o le aiga tufuga, lea e oaoa ai nei i faleseu ae saa i maa o malie e oo mai i le asō. Peitai, o lea ua atoalio o le masina le taualuga o le maota, aeseigia le mauhi i lona tulutulu ua o se atiati, auā ua i sīui le faamoe o le agaiotupu ma lona aiga, tainane le ekalesia, i le fausiaina o le maota tapuai ma le fale fetafai o Ieova, e nōnō manū ai ma le Atua i taimi o tapuaiga.

Auala o le sii – asiga o le galuega po o le umusaga o le maota
Faamatafi

Umusaga o Tatou (Samaga)

Faataitaiga

O lea ua feagai nei Olofaga ma Matatala, o Sa-Tunumafono le Aiga Malosi mā le Alataua o Saffata, o le faasinomaga o le Tui Aana Tamalelagi le uluai tatau a Samoa. E ui lana ina faitau eseese o Tutuila ma Apē ina ua atoalio le masina ae o se atiati, na atoa lava paia i Tongamau ma Siulepa, ina ua ifo i Tanumalala ae faatata i Mauga ma Nuuausala, ina ua tau lau o lo la ‘ai alii, ae pa'ū le utugaluia i le tupu, talu faiva o Pauli, Su'a ma le aiga o Sa Su'a. O lea ua sa taputupu nei Lalotarie, ae o se fala fōi e le ososia i Faamafi, ina ua oia le vao i Fagalele, auā o ou paia o le oneone lava e le uititia, e le tau faalatanu fōi i

se upu, tulou, tulou, tulouna lava.

Tulouna paia ua tuluma e momoe faatasi
(*Faatulou loa paia o le auvalaaulia – faifeau ma isi*)

Faatulou paia o le tuifuga, o ona sa ma ona faigata)

Tulouna Su'a ma lou Faletasi

Tulouna Su'a ma lou Falelua

Tulouna Su'a ma lou matupalapala na to, ae a lou Faletolu

Tulouna lau Tuluma na momoe faatasi

Tulouna lau Pupu lama na susunu, ae a aso faapenei

Tulouna lau au teu ma lou au mono

Tulouna lau au sogi 'aso

Tulouna lau au tapulu

Tulouna lau sausau

Tulouna lou apisa ma lou masiofo

Tulouna lou olooloia ma lou noonooia

Tulouna ou sa ma ou faigā

Tulouna lou maota tapuai ma ou tupuatausi

Tulouna le ulufia o ou aao ma lou lavalima ata mamao

Faalelepa la paia ia i le au tolo popoto ma le au fueloloa o Samoa, o lo latou nafa taus i vaatele lea i ai.

O lenei aso o lea ua p'aū le utugaluia i tamalii ia, ae o le talipisi i le nofoatula ma le nofoatoo o lenei aiga. Malo le sausau, malo le tao-to, faafetai le tapuai, o lea ua tini lau o le lagi malofie, ina ua sana se mago, ae fusiita toa nei o aiga, auā ua sososo le fau ma le fau, e le isia i ni tuimanau, e tutu mau e faavavau, e te otu ma oe i le tuugamau si au lava tatau.

(Faaaauau loa i au lava upu)

Umusaga o Vaa
Faataitaiga

O lea ua ee i vaatapu le galegalea o le fausina ma e ao ina paepae faauulufanua le ma'ae'ae o le folaga tofa ma le paū o le tupua

ma laoai, auā ua maualuga le taeao ma le aso. A lea ua 'ele le fissaga i lau faasuaga ae te'a ane ia i sa o ta'ele o vaatetele, ou paia sautuaao ma ou mammalu sautuaafafa, a o tua lava o (*igoa malae*) e ta liu ai i le to'a ae popoe le taofī ina nei pisia taumuli o sa o tamalii i sau faafogaga le tau ma lau silasila le a'u u, tulou.

Ae tau ia la o se puipuiua ma ou faatulou le paia maualuga, ina ne'i ponapona le toa i se finagalo, auā e leai se tasi na te toe seu taflilia le naa, ae ao ima seu matāoaga, auā ua lupepe le taumani'ula, ua manusina foi e le soā le manu folau, auā e seu lava le manu, ae tagai i le galu, i ou paia faataototo e i ai le asō, tulou.

Faatulou i paia masani – faiseau, faalupega o le mu, au valaaulia

Faatulou loa i le tuifuga ma lona aiga
Tulouna lau afioga i le Siisialafia ma lou aiga Salevaiolo
Tulouna lou aiga tuifuga i a Fuafua mamao, Fuafua mea, Fuafua tutu
ma Fuafua nonofo
Tulouna lou apisa
Tulouna le tafili o laau o le vao ma lou asaasa mamao
Tulouna lou lagosee ma lou lagota
Tulouna lou faleta
Tulouna le malamalafiti ma le malamalapipi
Tulouna lou läina, le timuia, le olooiloia ma le aao ulufia
Tulouna le silā, le 'ulaoge, le toi fefau ma lou sausau
Tulouna ou sa ma faigā, o paia ma faigata, tulou, tulouna lava
Nuunuu la faatini o poula lagi malie i se nunuavaga paia sautuae i le autalaia ma tootoo au o le atunu, lea latou te puipuimalu ma nafatau-lima i la latou matafaioi tauis.

Ae manatua i lo'u loto le tulāfāna o le ta-ile-tai ma le ta-ile-vai a Funefefai, a o tu lona malo. E manatua i lo'u loto Matuutaotao ma Faafieloa, e afua ai ona lotoa le finagalo o Lata ma ia fau le uluui vaa i le Motu Sa. E manatua i lo'u loto Aiga i le Tai ma le fua ta'uta'ua o le tuuāu, ae a le Vaa o Fonoti ma le Too o le fua i taimi o le tatu'i-j-vasā. E manatua i lo'u loto le vaa o le atua o taua o Nafanua ma lana sailiga malo. Peitai ua le o lea le faamoemoe o le asō. O lea o le a tau i tai le

vaatele, o le Pua e lele i le vateatea, saili ai se tautai matapalapa ma le mataalia, ae a le fua o le a alei i gataifale o le Launiusaelu, e sailimalo ae a le tapuaiga mamau a le (*faalupega o le mun*).

Omai laia tatou patipatia faaalofi sa o tupu, ina ua sula ae ua 'ula, ua sula ae ua maua, ua sula ina ua afua, ua sula ae āfī fala o Leie, ina ua tapai tataga le pilia le faamoemoe, ua togi foi pa tau i le ave, ina ua tau 'ai o le tapalega, i le galuega tele e pei ona i ai le asō.

Ae faapea se faamatatalaga, (fai loa le auala o le sii)

Manū faaifo mai lagi le agalelei o le Atua i lenei faamoemoe. Ia faatumu le utu o le folafola i suli ma feoi o le aiga o Sa-Levi, o lo o nōnō manū auā manua o aiga, nuu ma le malo. Mamao ni tuatafalu ma le laumea e toulu i le savili i (*tamalii o le mun*). Aua nei gausia le atipouniu ma sosolo le fue i le faasau ma le upega lauga i Tama Matua, tainane le mammalu i le Saofaiga. Maua le maratu o le Lautimalaulei, ae ola so matou vaivai i le agalelei o le Atua.

Soifua

Sailili Atili

Manatu anoa muamua – O le faalupega o le toalua o le tufuga fafale, o le Meanaitaua. E mafai ona faalupe ai le toalua o le tufuga ta tatau ma le tufuga ta vaa?

Manatu anoa lona luu – O le faalagiga o le tufuga fau fale o le agaiotupu. E mafai ona faalagi ai le tufuga ta tatau ma le tufuga ta vaa?

Manatu anoa lona tolu – E i ai ni suiga ua i ai i nei faatufugaga e tolu i nei aso?

Manatu anoa lona fa – Fai ni saililiiga po o fea na maua ai faalupega o tufuga nei e tolu. Aumai ni lagī soifua ma ni pine faamau e fai ma faamaoniga.

Manatu anoa lona lima – E i ai ni isi faatufugaga a Samoa e ese mai le tolu ua ta'ua i luga? E faapefea le suiga o upega ma le fauga o pagota, taaga o auupega o taua, falelalaga a le aualuma i le Matiuau ma le Auseepapa?

Manatu anoa lona ono – O a vaogagana, alagaupu, muagagana e maua mai nei faatufugaga? Talanoa ma faasoaa ma tagata a'oga.

Manatu anoa lona fitu – O le tuluma le ato a le tufuga ta tatau. O le tagausi le ato a le tufuga fau fale. O le a le igoa o le ato a le tufuga ta vaa?

Manatu anoa lona valu – E i ai se faalupega ta tatau e faapea: “*Susu mai Sui'a ma lona fale tasi?*” Ae faapefea le faalupega ta vaa e faapea: “*Maiiu mai le Siisiialefia ma le falefa o le aiga Salevaiolo?*” Faasoaa ma tagata a'oga.

Usu Gasegase

O le usu lea a le nuu e alu i se tamalii iloga o le nuu ua pulapula la goto le soifua ma ua toe o se aga ona ifo lea o le taulaumea o le soifua rautua tuāvae i le nuu ma le eklesia. E usu i ai le nuu ma 'ava ma uu i se uu sa, o faailoga ia o le manuia ma le folau i lagj ma, pe a faamanava e le Atua ana galuega ma amia ai i le fafā lona sofia galue. O le talitonuga o Samoa, e le taataa mala le maliu o lea matai iloga o le nuu, auā ua mae'a faatinō nafā ma aganuu masani a Samoa.

Auivi

1. Folasaga – Upu faanofogofie po o Upu faanofo filemu
2. Paia/Faalupega
3. Aano
4. Upu faamanuia
5. Faamatafi

Auililiga o le Auivi

Lauga o Usu Gasegase

MATAUPU 12:

Upu faanofogofie – E tai leo tutusa lelei le vaogagana lea ma le vaogagana e faaaoga i maliu. E pau lava lona eseeseaga, o le lauga o le usu gasegase, e le faaaogaina ai ni upui i se tagata ua maliu (tulou). E moni lava e tai leo tutusa, ae fai lava sina tele o lona eseesega pe a e tagai toto'a lelei ai lava oe lea o le failauga mo au tapenaga.

Paia/Faalupega – E faaaoga lava faalupega o le nuu lea e i ai le gasegase po o le igoa o malae faiatulia o le nuu, po o igoa foi o le maota/iaoa.

Aano – Ia tumau pea le faavae o lau lauga i le aano o le aso ma le faamoemoe, o le lauga o le usu gasegase i se tamalii, lea ua tauau ina mou malie atu lona sofia.

Upu faamanuia – O faamanuiaga a o le i oo mai le valaau a le Matai

Faamatafi – Faamatafiga o le malaga i le Fafa po o Pulu. Ia tatalo

mo se malaga lelei ma tua i manū, taffi mala ni mea e tutupu faafuasei, ae saunia se nofoaga lelei pe a oo mai le valaau a le Atua.

Lauga o le Usu Gasegase

Faataitaiga 1 *Tootoo – Namulaulu Lanfou Setefano Siaosi*

A lagia le tupua ma le laoai i Lupelele, ona 'i lea faataamilo i tuasivi o le aai le manu tului. A lagia foi Siliaga ma Tupapa, ona so-loai lea o mauga ma iloa faailo i le aai, e tapisa foi i le tuneva o le po, ae au lava ina mou atu i le pogisa o le vasa, e pei o le upu e fai i Mat-uelo. O le asō, ua toe nei o se aga e pei o le upu i le Matuau' u ma le 'Auseepapa ona auaoa lea o Fuiifatu. Ua leai foi se mataālagaa pe toe faufau se isi alafausa i le soifua o lau afioaga (*igoa & faahupega o le tagata o lo o ma'i*), auā ua malu le taufaanuu o le oi ma le mafatia, o le tagata matua ma le ifo o le taulaumea i le soifua tautua tuāvae, tulou, tulou, tulouma lava.

Tulouna lou lagi faatafa ma le apulupulusia o ou tofaga

Tulouna le malomaloa o lou gasegase ma le taotoga i falaefu

Tulouna le oia o le maota (*igoa o le maota*), tainane maota e fia o le afioaga (*igoa maota o le nuu*)

Tulouna le tuu gaogao o le laoa (igoa o le laoa o le tuna), tainane laoa e fia (igoa laoa o le nuu) o le afioaga e puipuimalu i Fuiifatu

Tulouna le lefulefua o Fuiifatu, auā o le lupe sa olo tu ua toetoe a le lagona

Tulouna le tifa o le asoa o le a tauau ina motusia

Tulouna auta ua galemu ua le toe gafatia o se leo

Tulouna foi le avei lele o le a tafea e pei o pulu i le vai

Tulouna le afioaga (*faahupega o le nuu*)

Niuunuu la ma nona paia ia i tootoo au o le afioaga, auā o lo latou nafa tausi vaatele lea i paia faaufigatā o Samoa.

O paia faatalalelei, faalelepa i ana auaua o fata faitaulaga e fia o le afioaga, o lo o nōnō manū ae a se manua o le nuu nei ma ona tagata

lo o ma'i tigaina)

Talofa i le tinumasalasala lele ua malepe, e pei o le ta'uui mau ua solo lava a o se falute

Talofa o le a tafea le faasau o le upega lauga, a o le gausia o le ati pouniu, o tootoo tumalelea i le vaa seelua ia Namulaulu ma Tuilagi, o le matua i le usoga a Pule e ono o le aiga o Lafai, le aiga Sa-Lafai Talofa ua taape faalaumea i le vasa le tuiveeveye sa tu malele ai le vagana ma le fetalaiiga i Fuiifatu

Lele o le a le toe iloa ma tafea i le auau o peau e alu e le toe sau Lele o le a le toe lagona ma leleia i le siuamouli pe a oo ina segia o lona mauli

Lele o le a ifo i le vaaloa pe a apoia i le papa osofia ma agai i le lualoto o alii i eleele sa o le Alataua Lele o le a le toe nofoia le nofoia o Tavita, pe a oo ina faamuta e le Atua galuega a le auaua lelei ma le faamaoni

O le a lagona nei le leo i Rama

Ole a le susua nei vai alia ma le tatafe vai papa

Ole a le livaliva nei le meataavili ina ua gausia le matavana O le kate ma le tautali sa talitali ai manū e tua i ai le afioaga lea o le meleia

Ina ua agi salulululu le savili ma peia ai le taualuga o Manu'a ona o le pule fai toatasi a le Silisili 'Ese, o le mua lava e le fuitia, o le tao e velo i le manimoa, o le matagi e agi le soā, ma le maa togī faato, e toli lava le pula, e fā'i foi le moto.

E i ai le lagona, ua le o se finagalo i le paia o aiga, i ona itu te-tele ma itu tauilagi

Ua le o se manatu foi i (*faahupega o alii ma tulafale o le nuu*)

O le finagalo lava o le Atua.

Pe tua ma ni a le faatafa gasegase o lana afioaga (*igoa o le tamaii ma lona faalagiga*) Tatou onosai ma tatalo, e saunia e lo tatou Matai Sili se nofoaga tumau (*igoa o le tamaii*) i lona malo tumau.

O le malelega lava a le Malietoa i Samoa e faapea: "A tili tagata le vaaloa, feeli ia a outou foie i le aufuefue o lo o i uta, o outou tua le

sami ulti, se'i gigili ifo le valoaa o agaga i le alittai, ona outou mapu
lea ma filemu." Le paia tele i aiga, ua na o le Atua le aufuefue sili
tatou te mapu ai, ma matu ai le loi fosoga pa'ū ma le loimata malij,
ona o le gasegase o le tama.

Faataitaiga 2

Ina ua malomaloa le gasegase o le uluai tupu tafaifa i Mulifusi
ma Tanumaleu, na to ai matupalapala o le Pulu ma le Leuleu i le Aiga
Paia, o le Aiga lava o Levalasi, Sooa'emalelagi, tainane le Natumau
ma le Nafinafi i le Aiga Faalagilagi, o le Aiga lava o Tuual, le ali-
ioaga, e fai lea ma igoa o a outou toga. A o malomaloa foi le faatafa o
le tupu o Fonoti, na tau lagi ai e Toleafoa le asiga o le tupu ma toe tuu,
taulagi ma toe tuu, e afua ai lo latou matupalapala o le Sii ma Tuu ma
le igoa o lo latou aiga, o le aiga Taulagi. O le asō, ua le o ni toina o ni
matupalapala o ni ie o au'afa e tofa i maota ae faamanusina i malae
faitauina o le atunu. Ua le sii foi ma tuu e pei o le taulagi, ae ua sii
lava le tuu. O le mafiuaga lena o le see faatuagalu o lo'u vaa, auā ua
toetoe lava a faatainefu le alittai pe a oo ina fati toto peau o le vasa,
talu le taotoga i falaefu, le apulupulusia o tofaga e pei o upu i le lagj
malofie, tainane le malomaloa o lou gasegase faatafa, tulou, tulou,
louna lava.

Manatu anoa muamua – Faia ni saililiiga po o ai tonu lava le ituaiiga
tagata/matai e faatino i ai lea aganuu masani a Samoa?

Manatu anoa lona tolu – O a ni mea e faaaoga e faatino ai lea ituaiiga
aganuu?

Manatu anoa lona fa – E mafua aisea ona faatino e Samoa lea aganuu
taua i aso ua mavae?

Manatu anoa lona lima – Aisea ua le toe faatinoa ai lea aganuu masa-
ni, po o ua seāseā foi ona tupu i nei auga tupulaga? Talanoa ma tagata
a'oga.

Faaaliga: Faaauau loa ona faatulou i paia, e pei o le lauga muamua.

Auivi

1. Folasaga
Upu faanofogofie po o Upu faanofo filemu
(paia/faalupega)
2. Autu/Aano
3. Faamatafi

Auiliiga o le Auivi

Folasaga – Faaoga upu o saofai, le faafotu tupu, le faafotu alii, le faafotu o le vaaulu ma le sao i matau. O upu o le fiafia, le agaga meemee ma le fagaetia.

Autu/Aano – La matuā manino le auala ma le faapogai na afua ai ona masii mai le paolo. Afai o ni mulivai fetafea'i i usuga, ia faaali lelei ma le toto'a. Afai o ni faigaou, ia faapena foi le manino o lona faapupulaga.

Faamatafiga – O le failauga atamai lava, o le isi lea vaega o le lauga e matuā maati ai lava le toe tului mai o ana upu, auā o lona taimi mulimuli lea e fetalai ai ona o le faamoemoe.

Lauga o le Saofai

Faataitaiga Folasaga

Ae ou te le i asaina le vao filifili i ou paia sausaugatā ma ou talatalaina le fue lavelave o ou sa ma faigā, e muamua ona ou seu malie lupe o le foaga, a o agi mālu le fisaga, ne'i vale sa matou faamatatalaga ona matau lea o se aleu, tulou.

Tulouna le afio o Satele

Tulou le susū o maopu ma le tamaitai

Tulou le susū mai o Tagaloa, Tupuivao, Puaauli ma Sogimaletavai

Tulou lo ouluua vaa see lua i goa matua

O le mammalu i fetalaiga, o le mamalu ia Samatuafaiga ma le Fatuala ma

MATAUPU 13:

Lauga o Saofai

Faafotu tupu ma le Faafotu alii
Faafotu o le vaaulu ma le Sao i Matau

upu i le Vaifanua ma le Saoleuta
O paia ia o le a faatalolo, auā e le mafai e se faamatalaga ona toe autala
paia va i vanu ma le tifa to o le afioaga.

Auala

E le tulolo fua laau o le vao. E mafua ona tulolo ona ua agi faasulusulu le lai. O le asō, e le toe matemate lima la tatou fesilafaiga, i paolo ma gafā, o aiga i ona itu tetele ma itu taulagi e faalupe ma sausausema ai o outou mammal ua etiu ai faamatalaoai i itu e fia o Samaoa. O le asō, ua le o se faafotu tupu po o se faafotu alii o se suafa Faasuga e faamatuatumu i ai le Falesefulu, tainane le Vaifanua, tulou, ae o le faafotu o le vaa ulu ma le sao i matau i le *fetalaiga i suaftaua po o igoa matua i le suafa Leelao*, e tauasi vaatele i upu, le faau-tautaga liuliu ma le tofa mamao ma le moe alualu o le vaogagana, e tua i ai Malaeovesi ma Malaeaniu, le afioaga ma le itumalo.

Fai loa le sii

E le faamatafauloaina se faamatalaga a Moefauao. Na o loita nanau i aso faapenei e pei o upu a le fafine o Mailei'a i Salafai. "Ua na o manava o Mailei'a e fia matua ni mea se tele ae a le asō" Pagā lea, ua muafale i moana, ae tuafale i papa le aiga nei. Ua le susua galuega o le Matuauu ma le Auseepapa, ae a se ie o le nofo ma le faafotu o le vaa ulu i le fetalaiga i suaftaua matua. Ae alo maia, o lea o le a taumafai atu se laufala vao, a o se laufala patapata, na savalivali mai ma lenei itu o le aiga.

Sailili Atili

Manatu anoa lona luu – Aisea e ala ai ona eseese le vaogagana o le ta'uga o saofai a tamalii ma saofai a tulafale?

Manatu anoa lona isi – E i ai ni isi ie o saofai e ese mai nai lo le ie o le nofo ma le ie o le malae? O a ni o latou igoa?

Manatu anoa lona tolu – E tatau ea ona nofo tasi pea suafa o aiga i ni saofai, pe ua talafeagai ea ona salafā mo le maliliaga o aiga, ona ua tupu ma ola i le taimi nei?

Manatu anoa lona fa – Faaali sou finagalo i le matai o tamaitai. O a suafa e talafeagai ia i latou? Tamalii pe tulafale?

Manatu anoa lona lima – O saofai i le Falesefulu e patino lava i suaftetele, ae momoli faatoonai suafa faavaipou po o le lauti na laulelei. Peitai, o saofai i Tumua ma Pule, e matuā aloaia lava so o se suafa i ni saofai. O le a lona eseesea?

Manatu anoa lona ono – O lea ua muamua tatala polokalama o saofai i se sauniga lotu i se malumalu po o le maota faatulagaina o le saofai. O se tu talafeagai lea faiga? Ae sa faapeflea ona tatala uluai polokalama o saofai i aso ua mavae?

Manatu anoa lona fitu – O le a le sao o malo usu i nei mea o saofai?

- Ie o le nofo – le faafotu o le vaa ulu ma le sao i mattau
- Pule oe pe fai ni tofā a ni tamalii/faifeau ma ni lafo o ni tulafale Tutuila nei?

Auivi

1. Folasaga
Upu faanofogofie po o Upu faanofo filemu
(paia/faahupega)
2. Autu/Aano
3. Faatoesega
4. Faamatifi.

Auiliiliga o le Auivi

Folasaga – Upu faanofogofie e atagia ai le loto salamō, le agaga o le faasifoga, ma upu e molitino ma molitai ai le agaga ua maulalo ma le nutimomoia.

MATAUPU 14:

Lauga o Ifoga

Autu/Aano – Faatoese e faalagilagi ai faalupega.

Faatoesega – Sii i luga le itu o lo o i ai le tagata ua fano ma masaa loana toto i le eleeli talu le faatamala ma le le magafagaifa lelei o la outou itu. La tumau pea le olopalaina o la outou itu, ae auu le faavivivia, nei mea ane ua toe afaina finagalo tupu o le itu o lo o pagatia, talu lo latou totino ua tagatavaleina.

Faamatifi – la lelei ona faamatafi nei ituaiga lauga ma ia sauni lelei nitoga, tupe ma le saumolia, e faailoa ai lo outou agaga faanoanoa ma le toilalo popo, ona o nei mea o fanau ola le taupulea.

Lauga o le Ifoga

Faataitaiga

*Tuumalo Vui Umumahu – Lavea i le taavale a le atalii o Tofa
Lauga i le Ifoga a le Aiga Taulagi na ahu i le Aiga Sa Tuula.
Tootoo – Lafai F Tofa (SAM 172, 261, ASCC).*

Ua to nei le faauli ma ua tatai faō le fale nai le Siu-o-Amoa. Ua atu ē foi le atu piilii, ae tagi famo Salevao, o le tama na fofoa i ou

vaihanua. Ua ata fasia le malama o liga ma Falenaoti. O lele foi ua tagi fesaeai le tamaitai ma tau sema sona taeaō i a Salemuliaga, talu Faatuliaupolu ua fasia i le ala. E! ua mai ou vai Sa Tuula, ae tagi le fatu i ou eelele. Talofa ua taumuu le upu e fai i ou gataifale: "Paga lea ua fati toto le ava nai Uhulamalamalemele."

Tulouna oe Talalupelele, ave, ua le tu tula, tu lima lau luge, ae ua tu eelele

Tulouna Matofa
Tulouna Moana loa ma le Atu Samoa

Ua ata fasia lou taeaō Sa Tuula, o oe o le alii-o-aiga, o le Fasesefulu a le Tuiiana Tama-a-le-lagi.
Ioe, o le tatou tuutuu nonofo e mammala, auā o oe o le ulu gafa, o le ulu ai Aiga tauasi e Tumua.

E sa foi oe Sa Tuula ona sii i ai le ta a le Taulagi, pe sa foi i le Taulagi ona fai oe fāatufanua i le ala.
E sa, sa taputapu. Aisea? Ua e lailoa e saili malo, auā e paia ma mamalu, e faalagilagi oe i le pau mai Saua, pau mai Analega.
Le Falefa o Sa Vui, ave ua Gauolosaa
Ua motu le asoa ia te oe Falenaoti ma ua le mātu loifofoga o Taeleasaasa, o lau feagaiga tauasi.

O lau Natunatu ma le Nafinafi, o lele ua tali toto i le palapala Malaeuu ua hūlū le fau ma le anava, o lele ua liaina le tala
Ua logo le Faleagafulu ma le Manu'atele
Ua logo Maauuga ma Nuuausala
Logo Malie ma Vaitoelau
Logo Mulinū'ū ma Sepolataemo
Logo Pule e lua ma le Faleono
Aua ua masaa le toto o le Aiga Sa Tuula.

Ae tau ia ina ia fati magalo le ava nai Taga faapea le Tautalaga E tu lilia foi i le to, ae popoe i pisaga, auā ua mautinoa ua nofo fale iina le faauiluito ma le tauimusui
O le ala lea o le sii o le fua i le Aiga Taulagi ma o lea foi ua faasau i

malaē le faasifoga a Aiga ia, o lea ua ifo Tofa ma Su'a
Ua taoto foi i le lefulefu le Falefitu ma le nuu nei, auā o le puua lea na afua ai le faallavelave ma masoe ai Vui, o se tama ano manava ia Tofa ma Su'a
E le o se usu tau, e le o se usu seu, e le o se usu faaaloalo, a o le usu faamaulalo ma le toilet, talu le soifua ua fano.
Se ua maumau manava o le Taulagi na fanau ai, ai ana oti i le faallavelave, ae soifua Vui o sili atu lena.

O lele ua soloa ma le aufuefue ma ua taoto i le vailalo Aiga ia ona o le maasiasi. Talofa e, e a ulu le tafe, ae ua selefuria ai fua Talitaliaai. E a i lenei tavelau e laga vale i le fa e le 'aina, ae masofa ai fua le fa i Aiga ia.

Sa Tuula e, afai lava e tuugamau le Taulagi lea i Talalupelele nei, afai foi e feoti le Falefitu ma Tofaleauga faaalualuo lenei nuu i Matofa ma le Atu Samoa, ua tatau ma ononea, auā ua agasala Aiga ia, ua tatai le ulu sii foi le ta, lape le Taulagi lea, i lo oulu va feagai. E ifo tonu le fuiini i le lapalapa ma le samala i le ulu o le fao, ona o le taga ua fai. Ou te faaeteete i lau fetuu Sa Tuula, auā afai lava o lou finagalo e fasia i le vao Aiga ia, ua talia ma le agaga faamaulalo. Se'i fai ni 'ai e tatai i le laau malū.

Lo outou Aiga Sa Vui, i o outou gafa tau tupu, tau faleupolu o itu tetele ma itu taulagi, ia faatofa malie, se ua agasala le Taulagi i a Tofa atoa ma lona Maopu o Su'a i lo outou va faa-Aiga tauasi. Malaeuu, lau tofa i le Matua fetalai, o le gafa o Tuiiana ua au Tuala le alii-o-aiga
Tuala o le uluai Aiga

Tuala, o le Tama o le Aiga, o le malu o Aiga
Tautaiolefue le gafa o Sa Tuula
Vui, Matafeo, Vaiouga ma Taeleasaasa
Ua matie ma mauluga le Amoa i Sisifo atoa ma Salafai ona o lo outou Aiga Sa Tuula
O le gafa o le Tuiiana ua au
Le Tupu Tafaifa o Salamasina ma lana fanau

Sailili Atili

E suli mai ai Sina
E suli mai ai Faumuina le e ona le Tupufia
E suli mai ai Tuiama Vaafusuaga
E suli mai ai Tofa, o Salamasina o le Iu o Gafa o le Falesefulu o le Tui-
ana. Ou te le saesae laufai, aua e tasi lo ta gafa.

Ua faalava lo'u tootoo. Malaenlu, e le o so ta tofiga le tao ma le uatogi
Ae o lo ta tofi o le fue ma le tootoo, e afua mai i le Vaioa ma le
Siumoo, e tasi la ta lauga, o le lauga e tausi ai Sa Tuula ma le Taulagi,
o le lauga e tausi ai le filemu, o ta'uuma o Salemuliaga, o suli ma
feoi o Muliagalafai.
Soifua.

Manatu anoa muamua – O le a lea mea e ta'u o le ifoga?

Manatu anoa lona luu – O le a le eseeseaga o le ifoga ma le faasifoga?

Manatu anoa lona tolu – O a taimi e ave ai ifoga, ae po o a tonu lava
faalavelave e tutupu, ua alagataatau ai ona faatinu lea tu masani a Sa-
moa?
Manatu anoa lona fa – O mau a ni isi tolo popoto o le atunuu, o lauga
o ifoga e uu fatatasi le fue ma le tootoo i aso anamua. Faamatala pe
asiea?

Manatu anoa lona lima – E i ai se isi igoa e ave i le ie tog a o le ifoga
e ese mai nai lo le pulou o le ola ma le tasi ae afe?

Manatu anoa lona ono – Talanoai ni vaogagana o ifoga

- Ft: 1. Ou te nofo atu fua o'a'u lava o Ae
2. Momoli mālu i puega, e pei o upu i faiva o le tai
3. E tu lilia i le to, ae maniti timo i pisaga

Auivi

1. Folasaga – Upu faanofogofie po o Upu faanofo filemu
2. Paia/Faalupega
3. Aano/autu o le aso
4. Faamatifi

Auiliiliga o le Auivi

Upu faanofogofie – Alagaupu ma muagagna e faailoa ai le agaga fi-afia, fagaetia, ina ua feiloai i magā fetau ola ma le ava fatafata.

Paia/Faalupega – O paia o le isi itu o le maota, se nuu, ekalesia po o se aiga, ona faalupe lea o paia o la outou itu.

Aano/Autu – O auga o ute o le mafutaga.

Faamatifi – Tatalo mo ni manua pe a toe taliu le uto i fanua.

MATAUPU 15:

Lauga Faafetai

Faataitaiga 1

*Tootoo – Pr Sione Ausage.
Porirua, Aotearoa.*

O upu lava e fai i le faiva o le gataifale e faapea: *o le a ou le toe ta i utuma'au, pe falo le afa loloa i o outou paia sausaugatā*, auā o le i'a iviivia, o le fue lavelave ma le vao filifili. Taoto la faamaene i le tai loloto mamalu ia, auā e le o'a'u o se tuifuga upu o le vaogagana o le atunuū, na te toe atofuli faa-le-atoa le maota o le atunuū ua soo lona tiaio ma e tulutulu i tao, tulou. Nu'unu'u la paia ia, i le au talaiā ma tootoo au o le atunuū, o lo latou nafa tausī vaatele lea, e puipui malu i paia fatataootoo o le atunuū.

E mua i malae sa'u faamatalaga e sula ai le agalelei o le Atua le Mata'isau Foafoa, auā o la na muā'au i le fanaelue o le la o lenei

toeaina. Ia maua le soifua laulelei i le falehua o tiakono ma le nofoatofu o le ekalesia. Ae silisili i lena, ia taoi mausali e le agaga o le Atua ma ia faagagana e le Atua fetalai o tatou uso fou ina ia mauaa i le ekalesia, ae ou ola i le agalelei o le Atua.

Soifua.
Soifua.

A oo ina manufulu 'ula e tasi se mafutaga, ona tau faaetefimalie lea o le lagona, e filitragaga ai le vaogagana a Samoa, auā e faigata la tatou mafutaga o lea o le vā i vasa. O upu e masani ai le aiga tauai: *E le tau faasegaina le pa osofia ma e le tau laea foi le maa pii tia* i lau faaaloalo ma le pule ua tōtō tetelle. Se o le mea moni, ua manusina le soā lo outou faaaloalo ma le aga faatupu i la tatou mafutaga. Ua fata lugua ua fata lalo, lau faaaloalo ua matūā meā, ua 'afu ai ita le tufanua, se ua le 'ole lava lea.

Faaefai i lo outou agaga sa 'afa e tasi e opogi la tatou galuega. O le mea moni, sa galo nūi i le vāai ma taumatemate faiva o Pa'usisi pe sina le galu ma tua i fea lenei sauniga faatala'i. A lea ua tali faaali ali le Atua o malo, e ala i agaga ua ulufale i le ekalesia, tatou te faatalali ai i le aso e afio mai ai lo tatou Matai. O outou sa ma faiga satuluma lava e momoe faatasasi ma see i i'u galu, ae matau lava iulu galu le galuega a le Matai i o outou finagalo. A lea ua tini pā'ō le uto, e pei o upu i faiva o vai, ua tau le 'ai o le tapalega ma ua togi pa tau i le ave lenei taumafaiga, talu la outou galuega sa fitaitiuga ai i vāiaso sa ua sola.

Ni sese ma ni aleu o la tatou mafutaga, lafo ia i fogavaa tele ma faatafea i le auau o peau. O upu lava a le atunu: *e le o se faiva lava ma se mamau*. E le o se ta foi ma se lavea, auā e poto lava le tauai, ae au lava ina pisi le moana i le itu i ama. Galo ia i Aa faaletou o le mafutaga, auā o le Atua e sisila i o outou finagalo ma o tatou loto. O le tatalo, ia tau masuasua faamannuaga a le Atua i pa o outou maota ma ia toulu faaua manuia i o outou aiga, e tautua tuāvae ai i le Atua ma lona finagalo. O mea ua faagagao ona o le galuega i lenei tafā o lana tovine, ja toe tapue faalaau ola e le Matai i le ekalesia. Ia maua le tofa faa-le-Atua i le susuga i le toeaina taitai. Ia maua manatu i le aiga

Isi upu faafetai

Faataitaiga 2

Ou te talitonu e le mafai ona tuuloa le fua e aunoa ma le aafea o tapu o le gataifale ma le laueleelē, tulou. Matou te le fili foi faa'afa o le filiga le upega o Samoa, nei meaane ua fenumiai le uto ma le maene, ona matau aleu lea o se taofi e tau tuumumuatu i lau susuga o le o lo o pule i le tausamaaga. O le talosaga vaivai, tau lava o se iua minute, se'i faaleo le faaaloalo maulugua lea, auā e le mafai ona omioni faanui aleale pe folo molemoleina, tulou, lau faatamalii i le asō, ona matou solomuli lea ma le agaga faaaloalo, faafetai.

O lea ua mātu le fau i le taliga o le sua i le Susuga i le Faafeagaiga, o le sa filigā i le manavaina o le feau o le ola sa lufulufi auā alo ma fanau faaiuso.

O lea foi ua pale 'au'au le tautega i le afioga i le Kovana Sili o le Malo Amerika Samoa. Ua sao foi i alo le taumafataga a lenei itu o le faigmomalaga, tainane le loaloa o le auvalaauia i ona tulaga faalupe, tulou.

O upu e masani ai le faiva o le gataifale, e le tau faasegaina pe faafuluina le pa osofia o le alofaga, e le tau laeia foi le maa pitia i lau faaaloalo ua faamanusina faaatu o le selā a tautai o le vasa.

A lea ua manufulu 'ula e tasi lau faaaloalo i le asō, ua fata lugua fata lalo, i le faaaloalo ua tetele, ua matou sapaiā fatu-e-o-slele. O le mea moni, ua fulifaō lenei itu o le malu, auā ua oooo i le asō. Ua moni upu a le atunu, ua lele le se sa tu i lo'u lima, ua taele foi le pepe sa tau apata i lo'u vae, ua gausia le aau ma ua solo le mauga maa i au faaaloologa.

Le Atua o le sosis ma le tamaoaiga, ia toe faautumū mea ua gaogao ona o lou silasila i la tatou mafutaga. Ia i ai le manuia i ou pa ma ia taumasusua le manuia i fāitofoa o maota ma laoā, ae a le tautua tuāvae i aiga ma le nuu, ae matau silisili i le Atua ma lona finagalo. Se taimi silināa le suega i le tuāvao ma siliofe tauai o le gataifale, ia tulimuliauina le agalelei o le Atua i le Susuga i le Faafeagaiga Taulagi, o le o lo o nōnō manū mo uaga o manuia auā Samoa ma ona tagata. Ia tumu pea le utu, ae a le folafolaina o le finagalo o le Atua i ona tovine tofia. Ia mamao ni tuatafalu ma ni ao taulia i le afioga i le Kovana Sili. Ia faaaupegaina pea e le Atua fētalai le tofa fētūnai faamuniao, ae a le manuia o le Malo o Amerika Samoa. Ia manuia tele le aofia ua malu-tauue ma faavaotutu'i i le asō, ae ola malolona se leo le a'ua'u i le agalelei o le Atua.

Soifua.

Faataitaiga 3 SAM 261 – SAMOAN ORATORY (LAUGA & 'AVA) TUFAAAGA MULIMULI

O le a ou le toe paoina faatupe o mumuli o taulafoga, pe toe lotoiā le lauti fatulalo o poula ma ta i tua le tili āua i sa ma fāigā, o lea ua manūtoao ma malutauue i le laumua o le faafaletui o le Kolisi Tu-ufaataasi o Amerika Samoa. O paia o le fale talatala o upu o la ta vaogagana, o le a pāpā le gae'e ma o le a ou le toe tailia tulāfāna, e pei o upu o le tatu i-i-malae i vasā i mamalu ia, auā ua mae'a fofolā le iviā'i a mal le anofale o le maota o le aiga fāia'oga, e leai se vave, a o se atoa i le liu o lo'u vaa, e toe ulumatāfolauina faale-a'ua'u paia ia, tulou, tulouna lava. Nuunuu la faatinī o manaia ma tausala o se nunuavaga sa ma fāigā ia i tootoo au, o le aufueloloa ma le autalata o Samoa, auā o lo latou nafātausi vaatele lea i paia e afua mai i le tai sāmasama ina ua fetuai folā o sa o tupu, se ia pa ia le tai 'ula'ula, na tātā ai i tua o Fatutoa lai o puava.

E le tau laeia le maa pī tia ma e le tau faasegaima le pa osofia i lo'u mauli ma lo'u tagata lilo pe a oo ina manufulu 'ula ma afa e tasi se mafutaga. O se lagona lena ia te a'u nei, ua o se mogamoga apaa gau

ma se ugapepe e alu i le faiva o le faalolo, e tau faaetefimalie atu ai se upu, e tusa o le faamoemoe sa tatou umufono talatala ma ulu mea fatu fala ai, lea ua toe o se aga ona tatafi lea, e pei o le upu i le Matiuau ma le Auseepapa, ona ili lea o le foafoa ma vili le foe o le tautai a'e malo, ina ua sina le galu i lau fatamasoaliga.

Taoto ia faagalu e le fati o outou mammalu e le avea ma sa le toesea na, ae mua sa tatou faapolo e momoli i le Atua o le fuā. Faafetai i le laolao lelei ma le laofie sa tatou tapisa ai ma aeale aiu ina ia tūtau upu o fetalaiaga ma saunoaga. Na ia muāau lo tatou laa i vasā i lenei pololokalama, toe mull'i au ina ua manunu le toau o ufi ma afu lelea ou nafā, ina ua toe lata i le siui e liliu ai le la o le mafutaga, auā aiga o lo o tapuai mai ma tu'i le muli paga, e pei o upu i taga ti'a o le tauitiaga. Seanoa lona alofa, semanu e atafāsaina fāafugā o laau e toulu i le ala ma o se foe foi i le tau lenei faamoemoe. Liuliu maia laia ala o le lupe tatou patipatia faa-alofī sa o tupu le taeao ua 'ula ae pou i toa, auā ua faailo lupe i le falevaai, ua oaoa foi i faleseu le seuga, ua togī foi pa tau i le ave ma ua tau foi le 'ai o le tapalega, ina ua le fusiga pe fisiga, ae ua niusina le faamoemoe, e i ai le asō.

E le galo Taē i Atū i le atoalio o le masina i lena itu o le malu, tau ia ina ia faapito augafa manū ia tasi i se gagana i Ao Faalupega, o le aiga o Sa Levi lea na tu maualuga ai ma matalupe le seuga i le laumua nei o le Kolisi Tuufa'atasi o Amerika Samoa. O ai ea na manatu ane o le a failā tu moana le mafutaga, a o ai foi na vavalō o le a ufi fulu o le manusina le soā i inā, ae tuluma e momoe faatasi o outou sa ma susuga i fāia'oga, tainane lenei matapia ua faataumuavaa i lenei pololokalama? Se mea ina matagofie o le mafutua faatasi ma le aufaigaluega a le Atua, ua malama ai i lagī le faamoemoe, e pei o le suafa o le alo tamaitei o le Tuiautua. IOE!, e le tauilo le matagofie o aao o i latou e aumaiā le talalelei. Faamalo, faafetai i faafeagaiga ia, o la outou pule ua fōtō tetele, ua matou sapaiā fatu e o eleele.

E le faaititia foi se lagona faafetai i susuga i alii ma tamaitai faia'oga o lenei mafutaga, ua se pasina alofaga o outou fofoga tausaafiga, ua pei o se atataa o le tauaumea lafoia, a o la outou foi vatapuia, ua 'ula ai a'u nei le tagata augavale ma le faatauvaa, se ua le 'ole lava lea!

E monea o'u manatu ma naneanea se tuualalo, auā ua atili maualuga lenei mafutaga, ina ua sii i tai le vaatele o le Ofisa o A'oga, auā o lea ua faamaloulou ma fafati mai le pou o le tupuatausi i Asotau, lau tofa i le Faletolu, Alailoto Seumalo. Ua namu sasala o le pua tau pea la tatou mafutaga, ua tasi ai lo ta fala, tasi le vala e fai ma 'afu ma ali e fai ma o ta aluga, auā e le malae 'ese ina, malae 'ese inei i la ta nafā e tasi, o le tapue ma aputi le gagana ma le aganuu, o le a satia i mea a papalagi. Faafetai le faatamalii, faafetai le tiu faatausala, faafetai le aga faafaleupolu, faafetai le faasoa matapalapala ma tatala le avei sa noa mau i le aniu o le maea i lou finagalo. Ua ili nei le foafoa ma leo malie e pei se ligoligo, ina ua vili le foe a le tautai a'e, le momoo sa malele faapopo ua tatae, lenei ua fai ma oso o la ta faatamasoaliiga, ina ua taoto i liu o le vaa i lou finagalo le atu sa tulituliaupu e le sa'u, e ala i le faasoa faalea'u sa tuumumusu atu.

Afai ua malie le galala i se manatu pumoomoo sa talatala atu, ua faamalo, ua faafetai, o lau pule lea ua ou pale ai ma ou faamanusima i lau faaeeaa. Ae pe faamata ua le susuu'u lau faafogaga, le a'u lo'u titi ma le so'o lo'u pale e ala i se au'afa ua ponaponā ma traai faata'i ui ua mau pe faapolopolo faamatu moepo e moe faō i luga o ona lava fua, ou te faamalie ma momoli mālu i puega, ua na o a'u o se vavae mu itiiti, ae tau ia ina ia au ave o lona malamalama susulu ia maua ai ni figota, auā le tapenaga o lou sa mo tupulaga lalovaoa o le atunu.

O ni aleu o lenei itu o le malu, momoli ia lai o Puava i motu le aina, auā e poto le tautai, ae au lava ina pisi le moana i le itu i ama. Faamagaloo se sese o le auauna pe afai ua afaina se finagalo tupu, a o se finagalo tamalii o se tasi, ae o le lagona maualuga, o le alauta muamua o le upega ma ia auā nei tolovoltaao ao faia le faiva o le a'oa'o, nei satia ma vale tulimia lo tatou tofi mai le Matai, o le Tagaloatusi i lo tatou faasinomaga.

Ia manuia lou alofaiva i tiute tofia, tapuai Telei'ai e pei o le talataloga o le toeaina Faleata i le Tuamasaga: "*Ia malamalamā o outou mata ma ia tafētoto o outou ala*". Manūteleina lenei mafutaga pe a tuuama le fua ma tatala le filialii, silināa foi le seuga i le fogatia ma siliofe tautai o le vasa, ia faatumu le utu o le folafola i le aufaigaluega,

ae a le feagai ai ma le utuga taufa ia Keriso ma lana faaoalataga. Ia maua le tofa saili mai lagī ina ia fatatamaoiga ai sui mammalu o le Ofisa o A'oga, lau fetalaiga i le Faletolu. Ia mamao ni tuātafalu ma ni laumea e toli e le savili i Tapaaau ia ma ia auā nei gausia le atipouniu pe sosolo le fue i le upega lauga i faleupolu. Ia taumatasuasua le tuluma o le vagana ma ia faagaganaina e le Atua fetalai, e puipui ai aiga, nuu ma le ekalesia, e amata atu nei se ia oo i le a le tu, e a le tu lava.

Soifua.

Tuifaaatasia:

*Tofa i le Matua. Telei'ai Fanaea C Ausage
Faauhuhunga o le Gagana ma le Aganuu Samoa
Kolisi Tuifaaatasi o Amerika Samoa*

Aso: 31 Mati, 2009.

Faataitaiga 4

**SAOFAIIGA – SAMOAN POLITICAL ORGANIZATION
SAM 172**

O upu lava e fai i le Alataua ma le tapuaiga, se ua SA TA-PUTAPU le lau eleele ma ua taoto foi le vao sa o tamaitai. O se lagona lena i le asō ma le matau a sulu o le tino, auā ua lalago tonu paia faataoto o le taeaō ma le aso ua 'ula ma mata lupe, tulou.

Tulou le paia tele o alii ma tamaitai polofesa o le gagana ma le aganuu Samoa, a outou susuga i fai'oga. Le fala le see i suli ma feoi o le talalelei, ou te faatulou atu. O o oufou paia ma faigā, e le toe autalaina pe filitagaga i se faamatлага a le auauna, auā o le fale o Po ma Ao e soo lona tiaio ma e tulutulu i tao.

O le a le toe lalagaina la he lafialalo i paia o le atunu ua poto i le malu nei, nunuu atu ia i tootoo au ma le autalaia o Samoa, latou te tofi, tofā i le moe alualu ma le tofa saili, e malu ai aiga ma afioaga, ae matau i le Atua ma lona finagalo. O paia o le aufaigaluega lautogia a le Atua, e le toe vaetapuina e lo'u

ugapepe o outou sa, auā o si ota lava lima e pa'ia ai si ota mata, tulou, tulouna lava.

E muāau le faasagi i le Atua o le aganuu ma le gagana, i lona aao taitai sa faaloaloa e pei o se ao-faanitu i le malama, a o se afi faaniitu i le fotu o le pogisa. Seanoa lo tatou Atua ma lona alofa ua ututumu, e taumate i le 'ete lenei faafoletui o upu o la ta aganuu. Foi la le viiga i le Atua, lo tatou Tapaaau Sili, auā o la e ou mea uma.

Mapu ia la i Niafane i ou seetaga malu, ae lalafo taula i malolo i lau faafogaga, ae mua i malae sa'u faafetai i le vasega o le Saofaiga – SAM 172, lea na mammalu ai le Laumua o le sailiga atamai, o le Kolisi Tunfaatasi o Amerika Samoa. O le mea moni, se na tau segia lo'u mauli i le uluai aso o le faneeluep o le la i lenei mafutaga. O ai ea a'u na afua ai ona tatou falē i vaogagana o Saofaiga o le atunu, auā o a'u o se tama meamea, e leai foi se gauī i le liu o lo'u vaa.

E ui i se manatu na noa i lo'u tagata, ae faafetai sa matou umufono faatasi ma susuga i faia'oga, tainane le aufaigaluega a le Atua, e matua i ai le tuu i upu a Samoa, o le a tau au ina mamulu ma see faai'a a vai. O manogi na aoao mo se uu, lea na laei ai lenei vasega o le Saofaiga, faatasi ai ma lo outou velo 'aso ma olo pito vaa mai, ua maua ai uafaalanumaaveave o lenei mafutaga. E moni upu o le atunu: *o le sulu mu tele, e maua ai figota*. O lo outou faiva alofi aao ma lo outou sao le faatuaoia, lea ua oloa luuluu ai le tagata lava ia, tiu lea ma affi auā alo ma fanau o le atunu. Faafetai le saili malo, ua outou le matua taofi, ae ua matua sasaa ma tufa le faiva o la outou faatamasoaliga i le tuāau, e faamalie ai i latou ua galala ina ua motu ma le taula ma le iloa le taga e fai i le vasa.

O upu lava e fai i le faatufugaga o le filigā 'afa, a lea ua solo le lavalima, ua outou sa'afa upu o le atunu i le malaise o outou finagalo, ina ia auā lava nei ola falolo le fanau i upu, auā o tama a tagata Samoa, e miliuu lava i upu ma tala. Alu laia ma lau ato ua ponaponā. O le ato pumoomoo, ae oa i faalumaga. Le 'afu lena ma le luuga o vaogagana o le Saofaiga, tiu ai faamatalaoa i lou aiga ma le faasinomaga o lau galuega, o lo o e afu sisina ai i le faiva o le tautua tuāvae.

Le lotofale o le mafutaga ma ni pefea na tutupu. E malu a ita i lou finagalo tamalii po o se tuu mumusu, ae auā lava nei sii ma tuu. E ui sa tofia a'u e matua i ai lenei faiva alofilima, e le o lo'u iloa ua sulu faamasina, ae ona o le laualuga o lo tatou va fealoaloai ua tapue faalaau mafala, e ala ai ona filifogamafua se lafoga e lafoga atu, auā e li'i a tino, e seu foi le manu, ae matau galu i la tatou mafutaga.

Se gagana ua sala, ua vale foi i la outou faafogaga, galo ia i Aa i le Faga Malolo o le Alataua, i se aso ona tali iloa lea i le ala. Ae o le faatumutumuga o lagona, ia saili i tai se matapalapala a o sii i tai le vaatele, auā se gapiā mo le fanau. Ae sili ona lava tapena, a i ai se isi e faapalopalo ma tuu fesili i lau galuega, fosola le fala o le faafoletui, ae faasoa i ai i'a o lou faiva.
Soifua ma ia manuia lenei tauлага faa-le-a'oa'oga
O la outou auaua i le galuega

*Tele'i ai Fanaea C Ausage
Faauhuhuga o le Gagana ma le Aganuu Samoa
Kolisi Tunfaatasi o Amerika Samoa
Aso: 07-31-2009.*

Sailili Ati

Manatu anoa muamua – O a ni isi vaogagana e ono fau ai ni lauga faafetai?

- Ft: 1. O le vaa ua goto ma le mama ua lomi
2. Ua sili mea ua ou vaai i ai na i lo mea na ou faalogo i ai
3. Ua fata luga, ua fata lalo
4. E le tau faafuluina/faasegaina le pa osofia
5. E le tau laeia le maa pii tia

Manatu anoa lona lua – Aisea e le folo molemoleina ai pe omioni faniu aleale faaalaoлага a le atunuu?

Manatu anoa lona tolu – Ua tau le masani Samoa i lenei mea o le faafetai pe a tumu tagata i nofoaga fāitele. Aisea?

Manatu anoa lona fa – Afai ae tasi se faatau ia te oe e fai ma fotoga o se aofia ua potopoto i se faalavelave, e talafeagai lou tauanaunu o se aiga o lo o tupu ai le faalavelave i sou lafo? O le matapeapea ea se aganuu Samoa?

Manatu anoa lona lima – Tusi sau tamai lauga faafetai. Pule oe po o le a le faalavelave ma le mea o lo o tupu.

Lauga e Momoli ai Faifeau

MATAUPU 16:

1. Folasaga (Upu faanogofie po o Upu faanofo filemu (paia/faalupega))
 - 2. Faafetai i le Atua
 - 3. Faafetai i Ava/Lumā'ava sii
 - 4. Taeao (pijama ma fono faapipii)
 - 5. Auga/Autu
 - 6. Faamatafi

Faataitaiga

Momoliga Faifeau, Pr Sione Ausage i le Matagaluega a Tutuila ma Mani'a, Ekalesia Asofatu o le Toe Afio Mai.

*Tootoo: Tele'i ai Fanaea C Ausage
Aso: Fepuari 02, 2010.*

O lea ua faafio le naaloa i lona taomaga mutia. Ua faafio foi le tia logo seu o le tuāvao, ina ua totō le fuiñui, o le tuamafa na fili i malae, ina ua sili saaga le taeao, ae sili i le sasaga le vagana au ma le fetalaiga tumalele, i lau tofa (*sufa o le tulafale*) o le sa fai ma ositaulaga i la tatou fesilafaiga. Moe ia la i le ufu ae to'a i le paipai paia faufigatā, auā ua taumua le 'alo ae pīi fau le motu le fetalaiga lea sa paepae ai faafulfanua paia sautuao o le taeao 'ula ae pou i toa, e pei o le maimoaga o le maota na i le tafai Amoa, tulou.

O paia o le alii taeao o le Matagaluega a Tutuila ma Manu'a, le usualele ma le usu faaaloalo a ekalesia e fia mai le Matasaua se ia pa ia Afao i le Alataua i le affio o Faasisina ma le alalatai o Taautooto, e le toe falo tatai faafue loloa e se upu a Telei'ai. Aisea, auā ua leleoa se upu a le Paia i Lupeiele, Lakina ma Poasa, e mamae foi le tavae i ona fulu, e le avea foi lo matou anau i le i'a ae manumanu i le upega, leaga e faigata lo tatou va tapuia faale-ekalesia.

Faafetai i le Atua, ua tatou fesilafai i le soifua lagi e mamā, ae le o le lagia o tupuasa. Ua feiloai i vae lupe maua, ae le o vae lupe saa, e pei o upu i seuga o le tuāvao. Ua feiloai i le fotu lelei o malama ma le gafoa o ata o manū, ae le o le fusialo ma le loifofoga pa'u. O le vi-

ga lea e foi i le Atua, auā sa outou tutuu laau faamanuiti mai i le ala e i ai le maa tui ma le maa gao, tainane le maa faalavea aao, a o lenei ua malomua e pei o le igoa ipu o Nafanua, ua feiloaimauso e pei o le igoa ipu o Taulili, ae lalago faatasi e pei o le igoa ipu o Sa-Tupuā, viia oe le Atua i lou agalelei ma lou aao taitai.

Faafetai i le lumā'ava sii ma 'ava sa faatofalai i maota, ae faalafi i laoa. 'Ava sa moenai i tupua e fia o le ekalesia. 'Ava sa leo ma puipui malu ai maota e fia o le galuega a le Atua. 'Ava e tatalagatā. 'Ava e oioi gatā. 'Ava e faigata. 'Ava e fai lona gafa. 'Ava sa tupu i le tutu maa, e laga i le tafā o ata, ae stulu i le fausa aulama, lea ua tatala ma agiga i Lupeiele, e tua i ai lakina ma Poasa o le tupua o le talalelei i le Matagaluega a Tutuila ma Manu'a, auā e faigata lo tatou taeao fesilafai. Faafetai le faatupu, malo le faafāleupologu. Faafetai le silasila mamao i le Taitai Matagaluega ma le faletua, e ui lava ina ititi, ititi ia alega mea e pei o le upu e fai i le Alataua.

O taeao faitalia o le atunu e le toe paoina faatupe o muli i le tauafoga i sa matou faamatatalaga. Aisea, lea ua mā'e a ona e osia le tauлага i le Atua, e le toe namenanea i se leo vaivai, pe toe faufau se isi alafausa fou i paia ma mammalu ia. Nona la taeao o Samoa i Tama Matua ma Tootoo, auā o lo latou matafaioi tauasi lea. Taeao o le talalelei, o lena ua outou oaoa ai i faleseu, ae saa ai i maa o malie i le talalelei, e faapena se lagona maualuga i lenei itu o le maota. Faalelepa foi taeao o le talalelei i ana auaua, o lo o faafale-le-malu i ekalesia e fia, ona o le Atua ma lona finagalo.

O auga o ute o le faamoemoe, o lena ua pei o le mea e taatia i malae i lau silasila ma le maimoa. E le toe faaluafessasi foi i ai se taofi. O le mea sili, o lenei ua toai i fana le Taitai Matagaluega ma le aiga, auā le valaau a le Atua, o fea lava e tusi aao i ai, o lo tatou tiute o le faalogo, savali ma usitai. Fua, a alualu suaga o le vaatele ae faaletonu le galuega a Sione ma Valelia, o lea tatou te soo tulutulu. Valaau atu, ona ou savalivali mai lea tatou te pola faaso, auā le manua o le galuega a le Atua. O lea ua osi i le asō la tatou feagaiga, a i ai ni pesea, tatou te felogoi pea.

Sailili Atili

A sili i le sasaga lenei mafutaga, le Atua, puipui malu ou aao i le toe taliu o le uto i le Matagaluega. Ia faatumu le utu o le folafola i le aufaigaluega galuhue ua e tusi aao i ai, ae a le galuega tele i Tutuila ma Manu'a. Ia maua le soifua laulelei i le nofoatofu eseese o le Mata-galuega, se ia oo lava i se aupito ititti. A liliu le vai o le tamaitai, ola maloloina lelei le Taitai Matagaluega ma le faletua, ae maua se vaivai o Telei'ai i le alofa o le Atua. Ia leaga e sa le 'ava i la tatou ekalesia, ae lelei lo matou pāpā aveloa

Soifua ma ia manuia le asō.

Manatu anoa muamua – E talafeagai i se momoliga o se faifeau le leai o se 'ava fatatali ma se agatonu fesilafai?

Manatu anoa lona lua – E faapefea ekalesia e tapu ai le 'ava a le atunu? E ononea le palu o se vainu e sui a'i le 'ava?

Manatu anoa lona tolu – O le a sou lagona i le faaaogaina o tupe e sui ai ie toga i taimi e teu ai e le aiga o le faifeau le ekalesia?

Manatu anoa lona fa – O le ie o le feagaiga o lo o agiga i le taimi e momoli ai se faifeau, pe aami ai foi se faifeau, e talafeagai le toe militai o le ie i le faifeau ma lona aiga pe afaia ua ela ma lapelapea lana galuega, po o le toe momoli o le ie a le aulotu i le taimi na feiloi ai le amiga?

Manatu anoa lona lima – O ai tonu le matai o le nuu/aulotu e moe i ai le ie lea o le feagaiga i le taimi lea e momoli mai ai se faifeau?

Manatu anoa lona ono – O ai ea e saunia le ie o le feagaiga? O le aulotu/ekalesia po o le faifeau ma lona aiga?

Faafaiavaina

O se tasi lea o mea e tupu i lo tatou lotoifale, i se tagata ua maliu sona toalua, ae toe faaiipoipo i se isi. E tusa ai o faatalatalanoaga ma i latou ua manau i lea mea po o se gasegase foi i le faiatou a isi, o le aafia lea o le mana faatiapolo (aitu) i le va faaulgulii i taimi o feusui-ga, tulou. E talitonu foi isi, o le tasi ta'uga o le lea gasegase, o le faa-tausia.

E faapea se faamatalaga, afaai o le tane ua maliu lona toalua, ae toe faaiipoipo i se isi fafine, o le taimi e tofafai ai ma feusui ma le fafine fou lea, o le taimi lenea e iloa ai foliga o le fafine ua maliu o lo o i le va o le tane ma lona faletua fou. E faapena foi se lagona pe afaai e maliu le tane ae tuua na o le fafine, e tutusa lelei foi le mea e tupu.

Auivi

1. Folesaga – Upu faanogofie po o Upu faanofo filemu (paia/faalupega)
2. Faafetai
3. Faatoesega
4. Aano/Autu o le aso
5. Faamatafi

Faataitaiga

Ae ou te le i asaina tapuafanua o le tupuasa ma lenei faasi-nomaga, e muamua ona ou faapoi lilia ma ou see ma le faaeteete, e pei o le tala ia Ulufanuasesee i le mavaega na i le onetai, auā e maniti tino, e mogea lagona ma ua leoa foi se faamatalaga a le Paia, tulou, tulouuna lava. O aso faapenei e manatua ai i lou loto Sa-Telei'ai ma lona nuu, ina ua ola o lana masiofo na ia faapea atu ai i lona nuu: “*ui mai am aua ua sa le itu taumatau.*” O le taeao ma le aso e muamua ona ou faatulou, aua ua sa-ma-tau le tupua ma le laoai, ina ua ee paia faataotooto o le faamoemoe (*faatagi paia o le isi ity*). A liliu mai i lenei itu o le tupua, ua paia auā o lea ua savalivali mai lenei itu o le aiga (*paia o le aiga o le tane, po o le fafine*). A lea ua sa ai nei le sami ma le tuāau, ua sa ulumanu ma le tuāao. Ua sa Sualo e afio ai Man-ufelavei ma ona Usoalii. Ua sa Togafaimuli e afio ai Vaiulumuli ma

MATAUPU 17:

Lauga o le Faafaiavaina

Sailili Atili

Pule, o Uscolii o Sa-Tama Fatfine. Ua sa Sataliautali e afio ai Tilive'a ma Leana, o Alo o Tamalelagi ma Usoalii o Sa-Solomuvaa. Ua sa Fagafeuo e afio ai le Maopu o le Tui Aana ma Usoalii o Sa-Aumua. Ua paia Tuugamau e alalatai ai Puni ma lona aiga Sa-Puni. Ua paia Afaeese e alalatai ai Pa'u ma lona aiga Sa-Pa'u. Ua paia Falesoa e alalatai ai Mano'o ma lona aiga Sa-Manoo. Ua paia Vailavea e alalatai ai Lavea ma lona aiga Sa-Lefaillele. Ua paia Satila e alalatai ai Mutimutu ma lona Itulamanamavae. O paia na, e i ai le lagona o le a nuunuu ia i le nofo a ituaiiga ia te oe Leulumoea, o lau matafaioi tausia lea, ae a Niupai, o le tupua tausia e aitelea ia i ai upu e le liliu, e pei o le tala ia Pili ma Moo

Ae o le faafetai i le Atua ua tatou feiloai i magā fetau ola, i luma o nuu, ae le o tua o nuu. Ua feiloai i le ava fatafata, ae le o le gasoloso o ao ma le taape o pāpā. Faafoi la le viiga i le Atua, auā o la emuāau ma muli'au i o tatou ala uma, e pei ona tatou fesilafai i le asō. Ae muamua ona matou momoli māu i puega ma faasifo so matou manatu i lena itu o le aiga ona o le tulaga e pei ona i ai le faamoemoe, auā ua le po se lilo i lena itu, ua pei foi o se mea e taatia i malae i lenei itu. Matou te faatulou ma augani atu i ou faasinomaga sa ma le paia, ina ia tatalia ia Segal le finagalo, ae tatou o gatasitasi ia i le finagalo o le Atua ma taeao o le talalelei ua ao ai Samoa atoa. Ina ia auā nei toe poia faamanu i ofaga pe satia ma toai faai'a o le po le mafutaga fou a le (*suafa o le tane ma le fafine*) ona o tulaga tuai ua tuanai. O le augani ina ia maua le nofo fealofani o le ulugallii fou ma ia fusia i le alofa, e pei foi o le taimi ua fano ma le itula ua sola, a o soifua se suli, a o se feoi e faasino i lena itu o le aiga ma le faasinomaga paia.

Faamatifi loa i au upu – Faamanua, Faatoesega, Faamavaega/
Mavaega a le atunuu po o le Tusi Paia/Talalelei).

Soifua ma ia manuia fuafuaga o lo o toteo.

Manatu anoa muamua – O le a lea mea e ta'u o le faafaiavaina?
Manatu anoa lona lua – O ai tonu e tupu ai lenei mea? O le tane po o le fafine?
Manatu anoa lona tolu – E lualuagia ea lea mea ma ni agaga faasauaii po o ni ilamutu o le faasinomaga o le tagata ua maliu?
Manatu anoa lona fa – E mafua aisea ona tupu o lea mea i se tagata ua toe faaipoipo i sona toluua fou?

Manatu anoa lona lima – Afai ae tatala tapu o se faasinomaga o setagata ua maliu, faamata e ono toe tupu lenei mea pe o le a muta loa ona ua uia ala faaleaganuu”

Auivi

1. Folasaga – Upu faanofogofie po o Upu faanofo filemu
(paia /faalupega)
2. Faafetai
3. Aano/Autu/Auala
4. Faamatafi

Faataitaiga

Lauga o le Faanuifalega.

*Lauga sauniumi o le taalolo i le umusaga o le Mauga o le Atua i Amerika – Vista, California
Ekalesia Asositu o le Toe Afio Mai
07 Februari, 2006.*

MATAUPU 18: **Lauga o Taalolo**

Sauvia ma Tuifaatasia:

*Tofa i le matua – Telei'ai Fanaea C Ausage
Faia'oga Ulu o le Gagana & Aganuu Samoa
Kolisi Tuifaatasi o Amerika Samoa.*

O lea sa fetunai le muniao o le seuga a alii, sa tuu a halo foi i'a sa a le aiga tautai ma tuutuu lima le vai o Liavaai i le sivaloa ma le faatau paia. O lea la ua tasi ai nei le faafitiga o aleaga, o Telei'ai o le a fai ma ositaulaga, auā le manulauti o le asō ma lenei fesilafaiga.

Ae ou te le i so'aina le loto na i le Itutolu o Sagaga ma le Faleono o le Atigana, Faleata ma le Gafa; E muamua ona ou faapoipoi lilia faaalofi sa o tupu na i le malae o le vavau ma fafano ane ou lima nei vaipa lo'u gutu, tulou, auā ua le toe tu se ola, ina ua su'e fuefue le tai o le paia lasilasi o le asō. Ua paū ai nei le tuāvao mafua malu, ina ua leai se tuanafaa filimalae po o se lupe papāgatā e leoleosai i le tuasivi e toe olo tu i le fogatia. Ua paū ai nei tuā'au mafua malu, ina ua leai se peau lagavale, a o se peau lagavaa e fati, ina ua mapu le sologa peau i lona auau o peau. A lea ua malumaunu ai le tupua tausi lenei o le talalelei na fuafua ai le suluia o ona ave malolosi i Sinave ma Ulumotootua. Ua saveiololo ai nei le laoai, ina ua taotoga i'a sa ma ua faafeagai segaula ma muā'autoa o le talalelei, ona o le molimauna o le Mauga o le Atua, lea ua failā tu i moana i le asō.

Tulouna la paia o Samoa ua potopoto
Tulouna paia o Malaetele, i le Tai Samasama o le Tui Manu' a se ia pa
ia Filimapuletuu, o le Tai Ulaula o Nafanua

Tulouna paia na afua i Pomaseme le malae opea, o le Oneone le Uiftia,
se ia mapu i Fagalele, o le Faga Oneone o Moso
Tulouna paia mai Sausa i lona Matāfanua, se ia pa ia Analega i lona
Siusfanua na alaga ai le leo "tali ia i lagī se ao o lou malo"

Tulouna paia e amata mai le Vai Sa o le Laau na Amotasi, se ia timi-
tauao i le Vai Salia na mavae ai Toivanatuitotonuoleatoletufuga ma

Sina-Tapuitea i le mavaega i Tulāfasā

Tulouna malae e fia o Samoa

Tulouna Leulumoega o le Tumua, ae a Maauga ma Nuuausala

Tulouna Lufilufi o le Tumua, ae a Lalogaifua, Mulinū ma Sepola-
taemo

Tulouna Tuisamau o le Tumua, ae a Malie ma Vaitoelau
Tulouna Vaopipi e afio ai le Malietoa ma lona tala na atoa, i lona fala

na fola loa ma lona nofoa vaevae loloa, na faalogo i ai Samoa atoa
Tulouna Puleono i Salafai

Tulouna Fufifatu ma Vaitututuu, Finao ma Mati'a/Mat'iatauu, Vailoa
ma Faletoi

Tulouna paia ua potopoto i aiga o pāpā, aiga o nofo, aiga o tupu ma
aiga o ee, saoao ma tamaitai, faletua ma tausi, trainane i paaga mamae
ma le au valaaulia

O le mamalu lea, ae a Tumua ma Pule, Ituau ma Alataua, Aiga i le Tai
ma le Vaa o Fonoti. Tainane o Tama ma o latou Aiga, o Aiga foi ma a
latou Tama.

Tulouna paia o le Faleagafulu
Tulouna Sua ma le Vaifanua, Fofa ma Aitulagi, Ituau ma Alataua,
Saole ma Saleaumua ma le Launiusaellua

Tulouna paia o le Motu Sa, o le paia lea i le Laau na Amotasi, ae a le
afio o Faatui ma le tapuaiga i Tootoo ma upu i le Manu' atele
Tulou, tulou, tulouna lava

O paia ia, o lea ua aofia Faga i La-Ua, ua poto foi moli i le fu-
tiafu e tasi, o lea o le a taalolo atu i faleupolu o tofiga, auā o lo latou
fatuaiaga tausi lea. O paia o le Aiga o Sa Levi, o outou susuga i

faafeagaiga tauilagi o lo o faafale-le-malu ma faafaleletulua i le tauasuga
o le taufa o le faoalataga, o le a nona i le Atua ma lona finagalo.

A o lenei aso ua sausau frialele le manu sa moe afusia ma savini
faapuna o manufou lagona, ina ua tatou feiloai i le agaga o le mimusa
ma le aleale aitu, o le pasioa, paioa, auā ua sau le vaa na tiu, tau mai i
le vaa na tau, ae o lo o mamau pea lago o le vaa na faō i le afolau. Le
Atua faafetai i lou agalelei, seanoa lou alofa, semanu e toulu faa-
laumea toli i le savili, pe ausaga foi e le tu aao lenei faamoemoe, sa
fau ao fau po. A lenei ua togi pa tau i le ave ma ua timi pa'ō le uto, e
pei o le upu i faiva o vai, o le laau lea o le ola. O lenei aso ma le
faamoemoe, o lea o le a ifo le u o le tologa ma talatuvavalu lau o le fo,
nei fesili faaliu o vaa o tautai le mafuaaga o le sopoutu i le tupuataus
lea. O le afio mai o le afioga i le Sa'o, le tofa i le Avaganofoa i lau
fetailaiga Puni, o le paia lava lea i le Falefa o Usosilii, Fiamē ma le
Gafa, trainane lau Saofaiga Leulumoea o le Tumua na saili malo, ona
o le susuga i le faafeagaiga tauilagi o lo o outou pale feagai i lenei itu o
le tovime a le Atua. Afai o le a se silasila i lau susuga i le ao faalupega
ma le mamalu o le ekalesia ua lafufiau tama seugogo i se taumafaiga
vaivai lea o le a fou atu, ua le tuua ni lelei, ae aumai ni masei. Ia fina-
galo malie, ua laulau toafa lau eelele o le Sa'o lea mā lenei aiga, ua
muafale i moana, ae tuafale i papa. Sa i ai le lagona e faaifo le vao, ae
faaa'e le tai, ae pagā lea, ua le a'u'u se fasaoa e taumolimoli atu. O
lea o le a taumafai atu paia i aiga ia.
(Ave loa le faaalalo)

O lena ua mautu atu i lagotonu se taumafaiga vaivai a le tofa i
le Avaganofoa ma lenei itu o le aiga Sa-Puni. Afai ua le tau i se si-
lasila, a o se maimoa i lena itu o le tupua, ou te faamalulu atu, ua pau o
le foai a le Atua, ae o le lagona maualuga, o lea sa tatou utuvai faatasi
e molimaunu le Failā lea, o le 'Ala ma le Mila tapuai o le Atua, auā le
faamatagofieina o ona sauniga. Sau se taimi tuu ama le fua, tatala le
filii ali'i ma silimea le seuga, ia mamao ni lagilagiā i le susuga i le ao
faalupega, tainane suli ma feoi o le talalelei o lo o tatou mafuta. Ia
mamao ni peau tauilia, a o ni tuatafalu i tapaau ia, tainane susuga i
toeaina. Aua nei gausia le tootoo pe sosolo le fue i le nofo a faleupo-

lu, ae faatumu le tuluma o le fetalai, e puipui ai aiga ma nuu, a ia silisili le ekalesia ma le upumoni a le Atua. Ia taumamao ni gasegase i le nofoatofii ma le loaloa o le ekalesia. A liliu le vai o le tamaitai, soifua laulelei lana afioga i le Sa'o, ola maloloina lenei iuu o le aiga, ae maua sa'u faamatalaga i le alofa o le Atua.

Soifua ma ia manua le asō.

Sailili Atili

Manatu anoa muamua – Faamatala lea mea e ta'u o le taalolo, a o a foi faalavelave e faatino ai?

Manatu anoa lona lua – O le a le saoga o ta'uuga o le nifo lea o lo o ailao e le taupou? O le nifo 'oti po o le nifo otii?

Manatu anoa lona tolu – Aisea e ala ai ona ailao le nifo otii lea e le taupou, ae le uu lelel lava ma savaii e tata'i le laina o le taalolo?

Manatu anoa lona fa – E i ai se fesootaiga o le ailao a le taupou o lea nifo ma taua o le atunuu po o tatu'i-i-malae i aso anamua?

Manatu anoa lona lima – E i ai taimi e ta'i ai sua o taalolo, e vaiai ai le fata uma o faaaloaloga, ae momoli e tagata e ta a latou tatau. Se aga masani lea a Samoa, pe na o ni taalolo faapitoa?

Folasaga 1

Lauga o le uluai faaunga o le Amosa o Savavau i Tutuila, Amerika Samoa.

UA TINI NEI LE MATALALAGA, UA TAU FOI LE ‘AI O LE TAPALEGA, O SE GAPIĀ LENĀ E FAI MA TOOMAGA O LE SOIFUA TUĀVAE

*Tootoo – Telei’ai Fanaea Chris Ausage
Faia’oga Ulu o le Gagana & Aganuu Samoa
Kolisi Tuifaaatasi o Amerika Samoa.*

Aso: 30 Aokuso, 2010.

“Le Atua o le Mataisau ma le e foafoa, ia avea lenei feau fatauya, ua o se vavae mu ittii, e fai ma tamau o le faamanatu ma le toe fafagu i o matou tagata, lo matou tofi na e tuuina mai, nei saia ma vale tuulima”.

MATAUPU 19:

Folasaga Esseese

E le mafai ona tulioa le fua sa faalepa i le atuvasa, e aunoa ma le afea o le Susuga i le Tu’itu’i o le Gatoaitele, le Susuga i le Tumua i a Tuisamau, o le Faatonu Lagolago o le Malo Faalotoifale o le Malo Tu Toatasio Samoa, lea sa matua i ai le tuu o le faiva o vaogagna o lauga, a o se foi sa faatonu folau i lo’u vaivai i taimi ua sola ma se laolao ua tuanai, tulou.

Ou te matuai ifo toele foi i le aufuefue ma fa’alo atu i afioga i alii Faamasino, o i la’ua sa togia ma filitaga i ai le finagalo autasi o le Komiti o le Iunivesite o le Amosa o Savavau o Tutuila ma Manu’ā. Lau afioga i le Komesina o le Matagaluega o le Puipuiga o le Saogalemu Lautele, lau fetalaiga Tuaolo, tainane lau Tofa i le Tootoo, o le tootoo lava o le feofeo, lau Tofa Laie, malo i le galuega sa oulua fitaituga ai i le malama ma le itula ua fano, tulou.

O paia tifa to ma le va i vanu o sui tofia ma le Komiti Faafoe o le Iunivesite o le Amosa o Savavau i Tutuila ma Manu’ā, tainame

pāia o Samoa ua malutauee, ua tinitauao ma ua faavaotutu'i i le asō i le maota o le Fetauaiga o Matagi, taoto ia i Tama Matua ma Tootoo, auā e le mafai e se tufuga faafialima-mae'a ma so'u maemae mu'amu'a ona tofī-tofā pe toe ulumātāluina foi le maota tulu tulu i tao o Samoa, ua soo lava lona taiao ma ua mausali lona faavae papa, tulou, tulou, tulouna lava.

O upu lava e fai i le ogaelele lenei e faapea: "A logoa le auau o Logotalai i le tagi a le manu tulihia i tuasivi o le aai, ona faapea lea o upu – Se! ua alittia Lupele, ae faattata le avea'i i Mo'eitai o tupua tauilia e fai tau i ai upufai o le Faigamalo a Tutuila ma Manu'a".

O le lagona lena o le meemee i le faagaetia, aua o lea ua logole-tala i Moeitai, o lea ua lele le lupe sa tau faatu i le tulua, tu i le lima, lea ua lele lava o se manusina e le soā.
A fesili pe mafua aisea?

If you have knowledge, let others light their candles by it.... Fuller.

E le natia ma le lāina le faiva na saasaa faaoti e pei o le utu a le fāimea. O le finagalo sa faapolopolo faamatu-a-moepo i le Susuga i le Matuaofāiva, auā ua le faapito manū i Tumuā, ae matua faasoaa, matua tufā, matua alofa i le uso tuofe, lea ua aeae ai le Falese-fulu, a o suli foi ma feoi o le Motu Sa, ina ua manufulu 'ula e tasi le aoina o manogi o le lolō, e tua i ai le poia faamanu i ofsga ma toai fai'a o le po, talu le moenoa ma le le tomanatu i se tapenaga.

Faafetai i lau Susuga i le Tu'itu'i i lou gapatia ma le ulufia o aao, i lou sautia ma le auvasa mamao. Le pito laau sa tausae ma mammafa tu, a lea ua olioli, livaliva, temeteme, ina ua tini le matalaga, ua tau foi le 'ai o le tapalega, ina ua ututumu se gapiā i totino o le saofaiga o le Iunivesite o le Amosa o Savavau a Tutuila ma Manu'a, e fai lea ma sopomua o le soifua tuāvae. Ua moni upu e masani ai le aiga tautai, se ua o se pasina o le alofaga le solo lelei o le lavalima o lau faasoaa Maulolo (*ua le o se tuli ua vale*); ua o se ifo foi o le ataata o se taulaumea lafoia; susuu'u ai le silafia mo totino uma o le Iunivesite o le pale i le asō; auā ua mae'a ona faamanusina e lau Susuga i le Tu'itu'i le atu sa tulituli-aupu e le sa'u; lea ua i le liu o vaa

o le au-faaau i lenei asō; o ua-faanumaaveave na o le faamoemoe sa fau ao, fau po; o lau pule lava lea ua tōtō tetele, ua o matou sapia fatu e o eleele.

Faamalo, faafetai le uta mamao. Ua moni lava upu i le itulagi o Salafai. Ua le o se futu na tafea lo matou nofonofo atu i inei. Ua le o ni suli foi o Saumani Afasee, o feoi lava o le aiga Sa-Sa'umani, auē e tasi lo ta ali, tasi lo siapo, e toala faaaautama foi i ta'ua, ua afua ai ona e le faasoaa na o lena itu vai, ae ua e silasila mamao mai foi i lenei itu vai.

The end and aim of all education is the development of character....Parker

Le mammalu o tupu ma tamalii, o faleupolu totofi, tainane le paia o le aiga o Sa-Levi ua lautogia i le asō ma le faamoemoe, ua outou oloa-luuluu i le faasoaa le faatuaoia a le Tu'itu'i. O lana tuumumusu lea ua outou 'afu ai i le vaogagana o lauga ma le gagana o le ifuaso talafeagai. Omai lea ima o. A tuiefu le tau, pe soata foi le laueleel e sunu'i ai lou tootoo, manatua peal le Tu'itu'i o lo o tapuai, tainane le nofo tatalo a sui mammalu o le Komiti Faafoe o le Iunivesite o le Amosa o Savavau i Tutuila ma Manu'a.

There are no foolish questions and no man becomes a fool until he has stopped asking questions.... Steinmetz

O le asō, o lea ua faanaelupe le la i lau galuega, o i latou o le afaauina. O lea o le a sii i tai le vaatele ma lau ato ua ponapona. O lea foi o le a faatili foemole, aua tupulaga o le Falesefulu ma le Motu Sa. Faamolemole, tautuana lo ta faiva o le fetalai, o lo ta nafā-tausi ma a ta measina, taofi le aimu o le maea, nei vale tuulima lo tatou tofi mai le Matai.

Education, in the deepest sense is continuous and lifelonging..... Hilton

Sofiuua ma manua le asō.

Folasaga 2

O le pepa na folasia i le aufaiga lugue a le CTY – Nuuuli.

Autu:

OLE VA FEALOALOAI UA MAE'A TUULAUPUA, LE VATAPUI E TAUSI VAATELE, MA LE AVA FATAFATA FAATINO I ALAFUA TAOTO, FESOOFTAIGA, ATOA AI MA TU MA AGANUU/AGAIFANUA

Tootoo:

*Tele'i ai Christian Usage
Faia'oga Ulu o le Gagana & Aganuu Samoa
Kolisi Tuifatasi o Amerika Samoa.*

Ano Mataupu o le Pepa:

- I. O le uiga o le upu – VA.
- II. O manulauti filifilia e fitoitonu i le VA.

III. Ituaiga faamatalaga eseese mo feiloaiga faa-le-atunu, e tapui ai le VA.

I. O le uiga o le 'upu VA

O le VA, ua o se avanoa e va ai ni mea se lua. O se avanoa e tuaoi ai le isi mea i le isi, e aunoa ma le feaia a'i, pe pao foi e le isi letasi. I se isi ona faapupulaga manino, o le va, ua o se avanoa (*space*) o lo o tanu ma affi i lona totonugalemu ni *Tapu (taboo)*, po'o ni Sa – e i ai le 'upu: *Sa Taputapu*. O ia tapu po o sa, e tapui ai le nonofo lelei o ia totino e lua, e pei ona ta'u ia le amataga. O se faataitaiga faigofie, o le a mafai ona auiliili i le pito i lalo o lenei pepa.

Faataitaiga:

O le va o 'ulu, e pei o le Sagosago i le Maopo, o le Momolega i le Aveloloa, po o le 'Ulumaa foi i le 'Uluua, ma isi ituaiga 'ulu e i ai le Puou, Maafala ma le anoanoai o 'ulu taumafa a le atunu. O le avanoa o lo o va ai nei laau, e le mafai ai ona feaia a'i le ola a'e o lala, o le tasi

lau i le isi. Aisea?, auā ua lava ma toteo le laueleelae o lo o ola a'e ai ia lava, na i lo le manao fua e ola i le isi itu o le fanua, o lo o ola a'e ai le isi laau. E mafai foi ona auiliili ni isi faamatalaga le uiga o lea avanoa i le va o pou o se maota e fono tasi i ai se afioaga i so latou laoai po o se tupuatausi o sea alalafaga. E leai, leai lava se mafuaga tatau e tasi e alala ai fua le isi matai i le pou o le isi matai. E mamalu lava le matuatalai i le alii ma lona usoalii i le pepe o le maota. E faapena foi ona matagofie le talaluma i le alala ai o faleupolu totofi o sea afioaga. Aisea?, auā o le maota fono o lea afioaga ua mae'a *tao-to lona alafua ma lona ivai'a*, i ona tofiga, mammalu, ma sa e aunoa ma le fesopoi. I le ma lea, ua mae'a *tuulaupua* ona tapu, ina ne'i satia le va i ni uiga mataga. A lelei ona tauis o le va lea o matai, ona leai lea o setasi e *tau masina* sona manatu ma le finagalo autasi o alii ma faipule o se afioaga. *A sopo la le manuvale i le fogatia*, e alai i se tasi e solia le faavae o le nuu ua mae'a ona tapui ma *tuumatamaga i tulafono*, ona usutaii lea o le nuu i lona tupua (*mallae*), ina ia faia se faatatau i le totino o le nuu ua sopoutu ma sopo tuaoi i le finagalo o le nuu. A afua ona tutupu o ia mea, ona satia lea o le va nonofo o le nuu ma ua vale tuulima ona tauis o lea lava va.

E leai se eseeseaga o le tagata na te *sii le ta* i se tapu o se afioaga ua mae'a folasia i lumāmea ma upu nei o le *saeia fua le maaveave le fua ma le totō le niu o le tuaoi*. A mae'a totō se niu o se tuaoi (*tulou*), o le pine faamau lena ma se lagisofua e molimau ai le va o ni fanua se lua. Afai ae toe lhai e se tasi sea niu, o lona uiga, ua tupu le vevesi ma le feluiai o ni itu se lua. Ua ati le pa e va ai tagata nei ma ua tupu le feitagai i le totogo a'e o maseiga ma toatuga i lo la va nonofo. E faapena le va nonofo a'i o le Matuaau (*o le e matua i ai le faiva o le fai'oa*) ma lona 'au-aiga ua ta'uua o le Auseepapa. E le mafai e le au-seepapa ona toe *sii se isi matalalaga*, ne'i sese le alafausa ua faataoto e le matuaau po o le matuaofaiva o sea faatufugaga.

O se uiga talafeagai o le upu o le VA, ua faamatalaina e faapea: *Ua o se fatu ua mae'a ona totō, e faapelepele ma faapologolo a o se matua moepo, ina ne'i ta'e pe pisia i se mala. O le va o tagata soifua, e faatusa i se pa le sopia faalemafrafau, e tauasi i le faaeete, o le ava ma le migao e gata mai ai le silafia, ma e puipui malu ina ne'i*

saria. E le tatau i le va o tagata ona fuitia i se lafoga soona lalafo tuul-
afoai, pe *talave faaloulemāga* i se faautaga papa'ū ma setofa pumoo-
moo. I ni isi o faamatalaga faaopoopo, e tatau i so o se tagata ona
tauvave le tausiga o le va ua o se *anavatau* ma ia susulu pea e peio se
fansua mu tele, e tosina i ai tagata o aiga, nuu, ae silisili ai le Atua ma
lana upu moni ua tatou *oaoa ai nei i falseen, ae saa i maa o malie.*

II. O manulauti filifilia e faattatau i le VA

a. Cultural Protocols: *Alafua Faale-aganu.*

*. Definition – What are protocols?

O le uiga o le upu alafua
* Why do they exist?

E mafua aisea ona olaola pea?
* Proper/Inappropriate protocols
O alafua tatau ma le le tatau ai ona faaaoga

*. How can we use it in working with others?

E fā'apei ona faaaoga tatau i lo tatou galulue ai ma isi?
Ia faasoao se faataitaiga e faattatau i fesootaiga faale-aganuu.

b. Communication: *O Fesootaiga*

*. Why is communication important?

Aisea e ala ai ona tāua fesootaiga?
* Share a cultural perspective on Communication

Ia faasoao se faataitaiga e faattatau i fesootaiga faale-aganuu.
* Differences/Similarities in Western style of Communication versus
the Samoan way of Communication.

O le eseesege o fesootaiga Faa-Europa, e fua i a tatou foi tuvaaga/
feiloaiga ma fesootaiga.
E tāua fesootaiga e silafia ai e le tasi le isi. E tolu ituaigna gagana e
fesootai ai o tatou tagata.

c. Behavior: *Tu ma Aga*

*. Proper way of addressing elders and others from a cultural stand-
point

O auala tatau e faatulima ai faale-aganuu i tagata matutua.

*. How do we approach elders properly (verbal and non – verbal)
E faapefea ona tatou feagai ma tagata matutua i le faaaogaga o le
gagana, po o se isi tulaga talafeagai?

*. How do we close a discussion session with elders (proper way)
E faapei ona faamae'aina se talanoaga ma tagata matutua (auala
taufafeagai)

III. Ituaigna faamatalaga eseese e tapui ai le VA

A. O alafua, ua o ni tulaga faalupe faale-atunuu ua mae'a ona: tapui,
tuulaupua, taoto faamaene i le tai loloto, papae faatulumua o le lagi
malofie, mamanau faatiti o poula, paepaelago, papae faaulufanua, taoto
faagalu e le fati ma isi.

Ft: *values* – o mea e sili lona tāua. E pei o le va fealoaloai, o le toga
ma le malo, o le 'ava ma le le'a ma isi.

E mafua ona tupu ma olaola pea nei alafua, ona ua avea ma
vaega o le soifua o so o se tagata Samoa au uiuli. Ua avea o se vaega
o lou tino, na tuu taliga ma tuu gutu mai e o tatou tuua ua lagomau i
malae sa ma saga mai aopouli i lo tatou tupulaga o le talutulu fou, e
faapena foi ona tatou faaaau pea ona faasoao atu i le tupulaga amuli.

O Samoa ma ona alafua faataoto, e fua i le gagana faaaoga,
tuлага (status), tausaga o le soifua.
Ft: afio – afioga – kovana, senatoa, faipule, tamali'i o afio'aga
susū – susuga – faafeagaiga, ao faalupega, tama o le galuega, ma
so o se tagata e te le o silafia.
maliu/sosopo – tofa/failauga – tulafale, tuua

E. E tāua fesootaiga e silafia ai e le tasi le isi. E tolu ituaigna gagana e
fesootai ai o tatou tagata.

Fr: Gagana i aso uma/taatele
Gagana faaaloalo
Gagana faafailauga

Faataitaiga 1

Malo le soifua manua ma le lagi e mamā (*faahupega*), tainane le nofoaalo.

Faataitaiga 2

Soifua laulelei ma le taeao manua i le agalelei o le Atua, ua tatou fesifafai i manū, ae le o mala (*faahupega*), faapea le paia lasilasi o le aiga.

Faataitaiga 3

Ia, faafetai i le Atua ua tatou feiloai i luma o le nuu/aai, ae le o tua o nuu, i lenei laolao matagofie. Faafetai i le atoalio o le masina i le soifua laulelei (*faahupega*), faapea le loaloa o le aiga alii.

Faataitaiga 4

Faafetai i le Atua i lo outou soifua matagofie, ua tatou feiloai ai i magā fetau soifua, imā ua fuli vaa o mala, ae ea sa o manū, ua tatou fesilafai ai i lenei laolao/laofie mai le Atua.

O faamatalaga eseese o tapui ai le VA

Vaaiiga 1

Ia, ee tai ia le paia fatafafa o le maota/laoa i le afio (*faahupega*), tainane le loaloa o le aiga.

Vaaiiga 2

Taoto ja le fala le see i le paia o le malu nei i le susū o lau (*faahupega*), faapea foi le favailolo o le paia tele o le maota/laoa.

Vaaiiga 3

Pāpā le gae'e i le paia tele o le maota i le alalatai ai o lau (*faahupega*), faapea foi le tapuaiga mau i le faletua/tausimā le nofoaalo i lenei aso.

E faapesea ona faamae'a ni faattatalanoaga ma tagata matutua?

Ata 1

Ua faamalo faafetai i lau (*faahupega*) e tusa o la tatou mataupu i lenei aso. E lagona le agaga fiafia i le fāasoa mai ma le manino o le

manulaūti o la matou savali, na mafua ai ona soli vale le maota/laoa. O le tatalo ia maua pea lou soifua tului, maua le tofa faale-Atua, auā le feagai ai ma tiute tauave o le aiga, afioaga, ae silisili le galuega a le Atua. Ia ola maloloima le ofisa nei, ae maua sa'u faamatalaga i le agalelei o le Atua.

Ata 2

O lea ua tatou i siui o lenei mafutaga. Avea lo'u leo e fai ma sui o le Faatonu ma le ofisa nei, e momoli atu ai sa matou faafetai faalelava, e tusa o le finagalo sa pola faasoas mai e pihamā i lo matou savalivali mai i le asō. O le lagona maualuga, se ua malie o, ua malie malo i le faasoas, ua fai lea ma 'ai o la matou mataupu. O le tatalo, ia faagaganaina e le Atua fetalai, maua le tofa faatupu, auā matafai o tofi e le Atua, tatou te tautua ai ja te ia ma lona finagalo. A liliu le vai o le tamaitai, soifua manua le afioaga i le Faatonu, ae ola maloloina le loaloa o le ofisa.

Ata 3

Ua toe nei o se aga ona tuuama lea o le fua ma tatala le filialii. Ae avea lo'u tagata faatauvaa ma le leai o se agatonu, e momoli atu ai la matou faafetai faale-a'u'i lau (*afioaga*), e tusa o le talia aloaia o lenei ofisa i le matoa/laoa. Ua ututumu le ato pumoomoo na saili faalumaga, a lea ua taumasuasua. Faamalo faafetai i le faeaea. O le tatalo, ia mamao ni tuātafalu ma ni lagilagiā, ni laumea e toli e le savili ma ni ao fegasoloi. Ia maua pea lou soifua manua, e tautua ai aiga, ae matau lava i le Atua ma lona finagalo. A liliu ala o le lupe, maua lo matou ola e tautua ai lo tatou malo.

Soifua ma ia manua lenei aso.

Manatu anoa muamua – Aisea e ala ai ona tāua folasaga o so o se ituiga lauga?

Manatu anoa lona lua – E talafēagai ea ona felanulanua'i folasaga a se tulafale i ni faalavelave eseese, pe lelei lava ona tao tasi i ile folasaga e tasi?

Manatu anoa lona tolu – Aisea e le fetau ai se folasaga o se semina faale-autalavou i faigauo e faia i se semina faale-agauu i 'ava ma lauga?

Manatu anoa lona fa – E tatau ea ma onomea le i ai o le gagana faperetania, e tapena ai ma oloa luuluu ai se folasaga mo se valaaulia?

Manatu anoa lona lima – Tusi sau folasaga faataitai i se laugatogi ua valaaulia ai oe e fai ma fosoga autu o le faamoemoe.

MATAUPU 20:

Tuvaoga Eseese

Tuvaoina o le Faavae o le Malo Amerika Samoa

Faataitaiga 1

O le a mapu ia i fala matū paia sautuaoo o Samoa, auā o le vao filifili, o le i'a ivivia ma le fue lavelave, o le ao mammalai i le faasouga o ao ma le atu folasa; auā e leai lava se faafailoa mae'ae'a na te toe tofi'u filifanua paia o Samoa ua lalago tonu i ona tofiga maape anamūā, tulou. Ae tau ia ina ou su'i tonu le mata o le niu ma uluuulu matāfolau se leo vaivai e faatulou ai le paia maualuga ma le mapu'epu'e o Samoa o lo o faafofoga mau mai i lenei itula o le aso (*faaaaua loa ona faatulou isi tagata*)

Faataitaiga 2

Ole a le toe tofi, tofā paia o le atunuū e pei o upu e fai i anava tau o Nafanua le atua o taua. O le a le toe tapue foi faalaau ola paia faaufigāta ma mammalai faaetegāta o Samoa, auā o lea ua tu-la, fano-la ma nofofale Sa-Tui ia maa i anomaota ma tupuatofia o le atunuū, e leai se vave, a o se atoa i le liu o lo'u vaa, e toe atofuli ai paia faataotooto o Samoa le atunuū tofi, e le tali ola pe tala tau e pei o Toga, tulou. Ae faataumuuaava se leo le a'u'u e faatulou le paia faavaotutu'i o Samoa (*faaaaua loa ona faatulou isi tagata*)

Faataitaiga 3

Ole a ou le toe tātilia tulāfāna ma lotoia le lauti fatulalo, pe toe ta i tua le tili āua i paia o Samoa ua paelago ma tapena faatamaitai toaga e tuua ua lagomau i tiā vavau ma malae tumau. E i ai le lagona maualuga, e leai se malamalamā susulu e toe timeia ai i se upu paia o Samoa, auā ua taoto faauulanu maaveave a o se tuluhulu o se maota, ua pei o se atiati, ua lagotonu foi ua o se taupupū e pei o se lio o le masina, tulou. E muamua ai ona ou tapui le tapu o Tupo le aloalii ma ou vai sausaunua paia o Samoa faafofoga mai (*faaaaua loa ona faatulou isi tagata*)

Faataitaiga 4

O le a taoto ia faamaene i le tai loloto le faafofoga tapuai mau mai a le atunuū faafogatā, auā o Samoa o le i'a ivivia, o le fue lavelave, ma le vao filifili, e leai se vave na te toe vaetapuina le

atunuū, e le talā tau pe talioia e pei o Toga, tulou.

E uluui faatulou atu i auaua a le Atua, o lo o faamaota-le-malu i afio-aga eseese ona o le Atua ma lona finagalo.

E faatulou atu i le paia maualuga o le Falesefulu, ae a le afio o Maopu

E faatulou atu foi le mapuepu e le Motu Sa
Tainane tulaga faalupe o le atunuū i ona tafa e fia

E faatulou atu i lau afioga i le Alofi o Amoa, lau afioga Tufele Li'am-atua, o le Failautusi o lo tatou malo faalotoifale ,
Faatulou atu i lau tofa o le siamupini o tootoo, le fetaiga tumalelea i lau tofa Fofo Sunia

O paia o le atunuū, e i ai le lagona o le a faataalolo, auā e le o i ai se atoa i le liu o lo'u vaa e toe tavavaea paia o Samoa, nuumuu atu.

Ae alo maia lau faafogaga Samoa, i le auga tonu o lenei polokalama.

Faataitaiga 5

O le a ee ia i fala matū le paia faafogaga o le atunuū faafogatā, auā o Samoa o le ao mammalai ma le faasouga o ao o le atu folasa. O ou sa ma faigā ua taoto a o se ala oo, e leai se tautai matapala, na te toe fagota ou paia, auā e le atoa lava i se faamatatalaga le a'u'u, tulou

(*Sosoo ame loa le faatulou i sui o lo o i lugia ma faaaaua ai lea fataitaiga*)

Tuvaoina o Tausaga A'oga

Faataitaiga 1

O lea ua mae'a i le manu tulu'ia i Logotala, e faailoa ai i Matautu aai lapalapa o malo, o le mua ma le faasao i le Atua o le fiua, auā o lea ua fotu pule le faiva o tama, ina ua manava le to'alii e ala i le talosaga molia sa molioo e feoi o le tapatapa ai lenei mafitaga e le agaga o le Atua.

O lea ua ou tu lilia nei i le to ae maniti tino i pisaga e filitagara le faaufigatā o le vaogagana, auā e le o se taeao o se tatu' imatae po o se tofaleauga faaualuelo, ae o le taeao ua pasioa, paioa, ua mapue faatia sa, ua maualuga a o se galue fuli afā, tulou. Ae ou te le i āsa la le pa i Filigoto pe ou te toe vailia le 'ato ulusega e pei o le upu i Sase, ae ou te le i tafilia foi le vaosa filifili o le Tualauta e pei ona anau i ai aliiseu o le tuāvao, e muamua ona ou tu i Avaavaloloa ma faatilo le u o le tologa i Moetai ae faasifo lava i Lupelele, auā o lea ua taalii le mafiu i paepae tetele, ua totō foi le fufui i tia mapuepu, auā o lea ua ee pāpā aao ma ua faavaotutui faasinomaga e fia o le Matagaluega o A'oga o le malo Amerika Samoa, tulou, tulouna lava.

Ua paia Moeitai e afio ai Fonoti

Susū le uluai Sa' o ma Maopu

Alalatai laru fetalaiaga Fagaima ma lou matafagatele.

A ou tu i le tupuatausi lenei ma faatilo le u i le la itu vai,

Se ua paia Luppelele

E afio ai le Punefu o le Motu, le Maopu

Susū le vaa see lua i Sa' o

Susū le faaululuuga o le Meana'i

Le Matua ma le Taauoso

Ma upu i le Tagaloa

Ua paia faapefēa?

Ua paia auā le asō, a lea ua susū mai le aufaigaluega mamana o le talalelei

Ua mamaulu le taeao toto'a, a lea ua sii mai le fala siigatā o le Faiga Malo a Tutuila ma Manu'a, lau afioga i le Matua, Togiola Talalelei Tulafono

Ua mapu'e lenei laolao manino, auā o lea ua afio mai lau afioga i le Faatonu, lau afioga i le Tamaitai Fomai o le tofa manino tuutuu loloto, lau susuga Jacinta Galea'i

Ae o uafaalanumaaveave o le aso na atofa ma taeao na lavasi ma tuupoina, ina ua afiogā mai tafa e fia o le mamalu o le Matagaluega o A'oga ma ona tulaga tofi.

O paia na o le taeao ma le aso ua tuluma e momoe faatasi, ae agi a o se

matagi le soā

Lea ua manufulu'ula ai e tasi lenei mafutaga, ae o se la 'afa e tu tasi i moana.

Faalelepa la paia moelilii o le aufaigaluega o le talalelei, i le Atua ma lona alofa, ae a le feagai ai ma le utuga tauifa i fata faiataluga e fia o le Falesefulu ma le Motu Sa, e nōnō manū mo se manuia lautele o ona tagata.

Nuunuu foi la faatini o tausala o se nunuavaga paia o le atunuū, ua o se atiati o se maota, ua o se atoa o se masina, auā o paia faataootoo a ua o se alaoo ma ona pa le solo, i Tootoo ma Tama Matua, a o le Usoga a Tumua ma Pule, tulou, tulouna lava.

Ae o le viiga o le Atua ua tatou mimusa ma umufono talatala i le agaga meemee, ina ua o tatou ulu mea fatu fala i manū i le Laumua o le Toa. Ua tatou feiloai i magā fetau sofia, ina ua sau o le vaa na tiu, tau mai i le vaa na tau, a o lo o mamau pea lago o le vaa na faō afolau, ina ua le atafasaina faafugā o laau e toulu lo outou sofia i le maa tui ma le maa gao, ae o le maa faalavea aao, a o lea ua tatou sagisagi fiafia i lenei taeao manuia.

Faga tonu loa le ifi o Māina i le manuauti o le faamoemoē.

Faataitaiga 2

E sala lava ina tapisa Fulurasou, auā na papae ai ti'a o le tautiaga. E sala foi ina tapisa le malae o le Su'iga 'Ula o le Atuvasa, auā o lea ua malutanee ma tinitauao paia lautogia o le taeao ma le aso na atofa, a o se laolao na tuupoina ma se laofie na hape. O le upu e fai i le tuāau, o lea ua matie le laumea o le vasa, ua taoto a o se atoalio o le masina, ua o se atiati foi ma se tulutulu o se maota, e pei o upu i le agaiotupu ma le falefa o lona aiga na malama ai Samoa, tulou, tulou, tulouna lava.

Tulou le afio mai, o le na tao-tasi i upu fai o le Malo o Amerika Samoa, lau afioga i le Kovana Sili Faalupega o isi tagata

matagi le soā
Lea ua manufulu'ula ai e tasi lenei mafutaga, ae o se la 'afa e tu tasi i

moana.

Faalelepa la paia moelilii o le aufaigaluega o le talalelei, i le Atua ma lona alofa, ae a le feagai ai ma le utuga tauifa i fata faiataluga e fia o le Falesefulu ma le Motu Sa, e nōnō manū mo se manuia lautele o ona tagata.

Nuunuu foi la faatini o tausala o se nunuavaga paia o le atunuū, ua o se atiati o se maota, ua o se atoa o se masina, auā o paia faataootoo a ua o se alaoo ma ona pa le solo, i Tootoo ma Tama Matua, a o le Usoga a Tumua ma Pule, tulou, tulouna lava.

Ae o le viiga o le Atua ua tatou mimusa ma umufono talatala i le agaga meemee, ina ua o tatou ulu mea fatu fala i manū i le Laumua o le Toa. Ua tatou feiloai i magā fetau sofia, ina ua sau o le vaa na tiu, tau mai i le vaa na tau, a o lo o mamau pea lago o le vaa na faō afolau, ina ua le atafasaina faafugā o laau e toulu lo outou sofia i le maa tui ma le maa gao, ae o le maa faalavea aao, a o lea ua tatou sagisagi fiafia i lenei taeao manuia.

Faga tonu loa le ifi o Māina i le manuauti o le faamoemoē.

Faataitaiga 2

E sala lava ina tapisa Fulurasou, auā na papae ai ti'a o le tautiaga. E sala foi ina tapisa le malae o le Su'iga 'Ula o le Atuvasa, auā o lea ua malutanee ma tinitauao paia lautogia o le taeao ma le aso na atofa, a o se laolao na tuupoina ma se laofie na hape. O le upu e fai i le tuāau, o lea ua matie le laumea o le vasa, ua taoto a o se atoalio o le masina, ua o se atiati foi ma se tulutulu o se maota, e pei o upu i le agaiotupu ma le falefa o lona aiga na malama ai Samoa, tulou, tulou, tulouna lava.

Tulou le afio mai, o le na tao-tasi i upu fai o le Malo o Amerika Samoa, lau afioga i le Kovana Sili Faalupega o isi tagata

O paia ia faaufigatā o le atunu, e pei o upu i le Siisiialafia ma le aiga Salevaiolo, lea ua tuluma e momoe faatasi i le asō, e pei o upu i se utugaluua ma le talipisi o se lagi malofie, trainane o mammalu le toese ma sa le avea ua mae'a fili faatiti o poula, e le utupupuina ma tapulalaga i ai se faamatalaga, e leai foi se manatu e toe faa-faletautu faaahuahu i ai, auā ua taoto lona faavae papa. Niunuu la ma faalelepa e pei o le fuua o le aiga tautai paia ia i Tootoo ma Tama Matua, auā o lo latou matafaioi lea e tauis vaatele i ai.

Faataitaiga 3

O upu lava e fai i le faiva o le seuga e faapea; o le a le toe salanaa lupe o le taecao pe toe seu tafilia le nai i paia faataototo ua faavaututui ma 'afa e fai i le asō, ae lelei ona ou seu matatoaga, auā ua alititia fanua, ua lilligo le fogatia, ua paū le tuāvao mafua malu, ua luppe le taumamu 'ula, ina ua tagata loaloa le vao, tulou, tulou, tulou, lava.

E faatulou atu i lau Susuga i le Faafeagaiga, o le feagaiga na amai i lagī o le (*ekalesia/faalupega o le muu o lo o faifeau ai*) o le sa fai fotoga mua e faaleo le sulaima o le Matai Sili i le lagī ma lona viiga e faavavau

E faatulou atu i le masii mai o le atoalii' o le masina i le maota o le malo (*faalupega – Kovana ma le Tafa tolu*), se ua moni upu i le ágaiotupu ma le falefa o lona aiga na malama ai Samoa, "se e taoto lava mamalu faalemalu, a ua o se attiani lona matagofie"

E faatulou atu i le aufataitao o le atunu, ua sii mai le fala siigata ma faamalo'ulo'u mai (*faalupega o Tutuila & Manu'a*)

O outou paia ma faigā, e le mafai ona tu-la, fano-la i se faamatalaga, pe toe tofi, tofā i se leo vaivai. Aisea? aua o le o ia te au le nafā faamatuau ma le auseepapa e toe sii ai se isi matalaga pe toe faufau se isi alafausa i paia faataototo o le atunu, pe toe atofuli faaleatoa i se manatu augavale o lo'u ugapepe. Taoto laia i le autalaia matootoo au o Samoa, auā o lo latou nafā e tauis vaatele lea i paia oo o Samoa ma ona Sa le popo, faataalo.

Tuvaoga o Faaulufalega o galuega i 'oga

Faataitaiga 1 – Siliaga ECE

O upu lava e fai i le tupua ma le laoai i Siliaga: *se ua faamamu tulu'ia e tagi i tuasivi o le aai*. E afua lea soāfuitau, pe a amia e le vaaloa se soifua i le fāfā. Peitai, o le asō o lea ua faailo e le manu tuluia e tagi i tuasivi o le Aitulagi le failā o'a'oga, auā o tama fānau o Siliaga, e fāfaga ma miliuu i upu ma tala, tulou.

Faataitaiga 3 – Tulou le paia tele o lea ua poto moli i lona futiafū e tasi i le asō.

Tulou le faamaloulou (faalupega)

Tulou le sii mai o le fala siisii gatā (faalupega)

Tulou le fafati mai o pou (faalupega)

A lea ua mapue ai tia mauauliuga, ae taaligoligoa le vao Auā o lea ua fetai a'i faamuliauma eseese paia ia i le malu nei Taoto ia le fala le see ma le vala le osofia i o outou mammalua ia E le toe lalagaina faalafi-a-lalo, e pei o upu e fai i le faatufugaga o le eliga, i se leo vaivai ma se faamatalaga le a'ua'u Auā e le o i te a'u se gaui a o se atoa, e toe vaetapuina ai paia faataototo o le asō.

Nuunuu atu la ma nona i Tula Malosoi o Siliaga, o lo latou matafaiotauis vaatele lea i le Falesefulu ma Samoa ua potopoto, tulou, tulou, tulouna lava.

O upu e fai i le seuga i le tiaseu: *se ua se togi le seu nalagatila, ua faamalo le fai o le faiva, ua e faapulou i le tualima*. A le galuega tele lea sa fitaituga i ai le paia tele ua aofia i le laoai. O lea ua matau e sulu o le tino le failā mo a'o'oga e utu vai magalo I ai alo ma fanau o Siliaga, auā le lumana'i o aiga ma le afioaga, ae matau lava i le Atua ma lona finagalo. Ua moni upu i le Matuuau ma le Auseepapa: *e le sulaina sala o leie*, i le galuega tele ua taoto i lagotonu, e pei ona lago lelei o le Sa i le faleta, o le Siisii-Alafia ma le aiga Sa-Levaiolo

Faataitaiga 2 – Nuuuli ECE

O lea ua tatou fesilafai i le atoalio o le masina, ae le o se masinana na mitiloa po o fānoloa, e fua i le asotau o le atunu anamuā. Le atoa lea o le masina lea ua tatou mimusa ai ma aleale atiu i le agaga

meemee, auā o lea ua tafa mai le tīla o le fua sa i le vasa, ina ua tu le galuega anagatā mo alo ma fanau o Paepaeuli ma Nuuuli.

E ao ai ona li' a tino, e mogea foi lagona ma segia le mauli e see loa i le malū o le tai taeaō, pe sasi a le tautai, o lea e tapuaia ona faiva manaiā, tulou.

Tulou le tala mai o aao (faalupega).

O outou paia, sa ma faigata tifa to ma le va i vanu.

E le toe fesaua'i faa'aso o le faatuifugaga o le fauga fale, auā e le o'a'u o se matuaofaiva o upu o le vaogagana, e toe atofuli le iviā'i o paia o Samoa ua taoto, a o se ala oo, i le fasouga o ao ma le atu folasa.

Niunuu la ma faalelepa foe o le savili i paia ia o le asō lea ua manūtiao i Paepaeuli ma Nuuuli, auā o le nafā ma le matafaiōi tau si lea a le paia i le Toafa ma upu i le Itiāu Malosi, tulou, tulou, tulouna lava.

O le asō, o lea ua solo le lavalima ina ua mae'a filitagaga le tofa ma le faautaga, e fausia se maota e se'i ai na o le moiaa o le atamai, e moltitino ai a'oa'oga lelei mo alo ma fanau o le afioaga auā le lumanaī. A lea ua matau e sulu o le tino, le galuega sa ulufia ai aao o le agaiotupu ma le aiga na malama ai Samoa atoa, lea ua taoto i malae le taeaō ma le aso na atofa ma tuupoina. Le maota sa tapue faalaau mafala e le finagalo o le Ofisa o A'oga, lea ua sila maimoa i ai le asō.

Faataitaiga 3 – Lupelele Elementary

A tagi i tamilo le manu tului i tuasivi i le 'au'au o le mauga o Logotala, ona fonoa lea o le tupuatausi i Lapelele, le lupe sa faamolumalu mai i Malaefono, ae lafoia lona ataata taulaumea susulu i lau eleele o Tuula Uta. Ua 'afa ai nei e tasi le asō, e pei o le upu e fai i le afioaga nei, "o le nuu sa tasi". Aisea? Se ua taoto paia faatafafa o le taeaō, ua pei o se tulutulu o se maota, a o se atiati. O sa ma faigā lea ua manūtiao i le laumua o le lupe tutasi o le itumalo, se ua o se āua moelillii, ina ua tuluma e momoe faatasi ma paia faalupegatā o le taeaō:

Afio o le Punefu o le Motu

Afio le vaa see lua i Sa'o
Susu le Faauhululuga o le Meana'i-na-taua o le afioaga
Ae puipui malu e le fetaiga tumalele i le Tagaloa

Ua liligo foi le fogatia ua popogi tuāvao masfua malu i le aso ua 'ula ma le taeaō ua toto'a, auā o lea ua susū mai tafai ma tu 'itu'i o le talalelei, o auaua a le Atua o lo o faamutia agiagi ma faappola le malu i tafa e fia o ona tovine tapuai, ona o le tauasuina o le taufa ia Keriso ma lana faaolataga. Ae le vaea le fala le see, i le paia ututumu o le Ofisa o A'oga ua fai ma sui vaaia o le Malo ae a le manulauti o le asō. E le faagaloina Taē i Atuā i paia ua maota-tauue ma tini-taumalae i le taeaō, ou te faatulou atu. Tulou, tulou, tulouna lava.

O le lagona mauluga, e le toe samisugaluina paia o la tatou fesilafaiga pe toe tofululifilanua mammalū ia, auā o Samoa ua taoto lagotonu lona iviā'i a, ua mausali foi ona faavae papa, e le toe faatafaoina faafigota i le sami uli se iloa faavavavave o le auauana, nuumuu atu i faleupolu tofia o Samoa ma le faautaga ua ponapona faalaau mamafa, latou te tausi vaatele i paia ia o le atunu.

Faataitaiga 4 – Pavaia'i Elementary

Ae ou te le i folau i le si'u matagi, pe faatutila lo'u vaa i le tafe sousou o le au i ou paia sausaugata Samoa le atunu tofi, e muumua ona ou faatinī le u o le tologa ma ou tapui tapuafanua sa o ou tupuatausi (*īgoa o le malae*), auā ua tagata loaloa le vao ina ua sāsā le aveo, se o le tala ave, ua sa le pisa, ua sa foi le pa'ō, tulou. (*Faatulou paia o le afioaga*) ona faataalolo lea i Tama Matua ma Tootoo, latou te tausi vaatele i ai. O paia o le aufaigaluega tofia o le talalelei, o suli ma feoi taulagi o lo onopai i afioaga eseese ona o le Atua ma lona finagalo, faalelepa ia e pei o le fua o le atuvasa i lo tatou Mata'isau, le Atua Foafoa ma le atululuga.

Faaaliga: Faaauau loa i isi au faamatalaga

Faataitaiga 5 – Matafao Elementary

A oo ina agi mālū le fisaga i tumutumu o tiaseu o alii, ona faapea lea o le upu, se ua sāsā le fala i Matafao, auā ua sa nei le lagi, ua pāu atoa le sami, ina ua matalupe le seuga nai Vacovai, ae mata i' a sa foi le tiuga tautai. A gafoa lelei foi ata o le Faga sa alofia, ona faapea foi lea o upu, ina ua tatou fofofa fesilafai i pue o alofisa, ae le o pue o matagiā, auā ua tuanai le atuvaya, ua tuanai atu foi ma le atu ava, ina ua tatou feiloai i pue o manū ma le ava fatatafa.

Mua ia la mua o ma faasao i le Atua o malo, o lana pule to ua le tofaleauga ai faaahuau, ina ua matalupe le seuga, ae tuvaga figota, ina ua olioli livaliva temeteme le agaga meemee, ua taoto ai le seu na lagatila, ae faapulou i le tulima, tulou, tulouna lava.

Faatulou atu i le Aiga o Sa-Levi ma lo latou tofi faafaitaulaga sili, e molimoli ai talosaga mo ni manū, ae o se 'ai o lenei faamoemoe. Faatulou atu i lau afioga i le Matua, o le Kovana Sili o le faigamalo a Tutuila & Manu'a, Togiola Tulafono, o le o lo tu i matagiolo, ae a upufai o malo.

Faatulou i le malamala fiti ma le malamala pipii, lau afioga i le agaiotupu, o le sa taula i ai le fale lauvao, le fale laufao, ma le faleta i le laumua nei, ae matua i ai le faiva o le falefa o lou aiga na malama ai Samoa ina ua velo le uluai 'aso o lau faatufugaga.

Faatulou masani

Faataitaiga 6 – Alofau Elementary

O lea o le a see fatuāgalu lo'u vaa, auā ua sua oooo ma tai tatu'i le gataifale, ua le toe tu se ola pe sipa foi se lamaga, ona gase lea o se faamatallaga e taufaaetefimalie ai ou paia tulutulu i tao, ua sootaiao, o le fale foi o Po ma Ao, tulou. E le mafai ona tafea le utu a Taufau i paia o Aloifafuna, auā na sooo'ula Faumuina le ana le Tupufia, tulou, tulouna lava.

(*Faatulou loa i isi paia o le nuu*)

O le lagona maualuga, o le a nona paia ia, auā e le mafai ona

toe utu fulu o le manusina le soā i se upu mammu ia ua tuluma e momoe faatasī i le asō, nūnuu atu. O mammu o sui vaaia o le talalelei, o le a le toe nanenanea i se faamatallaga vaivai.

Faaaliga: Faaauau loa i isi au faamatallaga.

Faataitaiga 7 – Leone High School

O upu e fai i Tātāgamatau e faapea: A nofoia falemuu, falevai ma faleseu o tia maualuluga, ona faapea lea o upu: *se! ua tiligo le fogatia, na paū le tuāvao mafiamahu*, auā ua tagata loaloa le vao filifili ma le asaasa gatā. A taalii foi le mafua ma ua matie faalaumea i le vasaa le igafo i Avalua, ona faapea lea o upu, se ua talaga pasina ma talaga pa usi le taeao ma le aso, auā ua togo malama o Taulelei, ina ua ite le aso fou, ua iloa foi le ufaalanumaaveave o le susuu'u o le aao taitai o lo tatou Matai. A lea ua malumaunu ai nei Lalofisi ma Falesau o Fale lava o Mavaega e afio ai (*faahupega o Leone*).

A ou tu foi la i le tupuatausi lenei ma ou lūlū le salefu i le isituvai lea, ona ou manatua lea i lo'u loto le fuaitau a Samoa anamuā e faapea: ua paia ma mammu Asotau, le Iruau o Tofiga, ina ua le toe tu se ola, auā ua su'e fuefue le tai, e leai foi se tautai e toe tāēle pisipisi, a o se aliiseu e toe seu tarfili le naa, ae agatonu ona seu mata-toaga, o le paia lava lea (*faahupega o Vai'oq*).

Ou te faatulou atu i paia faataotooto o le taeao manino, o le aso ua toto'a ma lenei laolao manino, lea ua malutauee ma faavaotutu'i i le laumua o le A'oga Maualuga o le Liona.
Faatulou i auaua a le Atua
Faatulou masani loa i paia ua aofia (*Malo, Atumu, Auvalaauia*)

O paia o lenei aso, taoto ia lona lafialalo e pei o upu i eleiga a le atunuu, to'a ia faatagī ma faalelepa e pei o le fua i le vasa loloto, i Tama Matua ma Tootoo, auā e leai se isi e faufau manatu e toe atofuli faaleatoa le atolio o le masina i paia o Samoa le atumuu tofi, ua taoto ae o se alaoa ma ona pa le solo.

(Alo loa i le polokalama faataoto)

Faataitaiga 8 – Nuuuli Vo-Tech

O le upu e fai i le agaiotupu, o le e matua i ai le faiva o le faatufugaga o le fauga fale ma le falefa o lona aiga na malama ai Sama moa e faapea: “*ua uafaalanumaveave le au'aso ua o se au a moelili'i; ua matagofie le taupupū ua o se lio o se masina, ae o le tulutu foi o le maota ua taoto lona manaia ua o se atiati.*” A faitau foi le Asotau o le atunu, o le masina lenei o le Toetaumaa e faitau ai uif vao e tua i ai le tausiga o le aiga. O le asō, o lea ua tau le ‘ai o le tapalega o le toe umusaga o galuega o lenei tausaga. Ae le i alu loa le fua o le ativasa i se faamatalaga e agatonu ai le manulauti o le taeao ‘ula ma le maualuga, e muamua ona ou faatulou i le paia ua potopoto i le laumua nei o matata ma faatufugaga esese, tulou, tulou, tulouna lava.

Faatulou i auauna lautogia o le talalelei.

Faatulou i malo ua valaaulia (faasolo loa i tagata e auai).

O paia le popo ma sa le solo o le asō, lea ua matie ai Paepae-ulu, o le tupuatausi (*Faahupega o Naanuli*).

O paia o lenei aso, e i ai le lagona o le a ou le toe ta i ama pe ta i matau faalama ise i se faamatalaga le ‘au’u, pe tali tipe tali foi i se leo vaivai e talimatū ai, e pei o upu i le faiva o le tauafoga. O le lagona maualuga, niunuu ia fatinii o tausala ma manaiā o le numuavaga paia ia, i le Toafa o le Ituau Malosi, auā o lo latou nafa tausii lea.

Faaauau loa i isi au faamatalaga

Faataitaiga 9 – Fagaitua High School

A tafā ata o manū o le taeao ‘ula i le itulagi lea, ona faapea lea o upu: “*Se ua iloa ataa o Taulalelei.*”

A ‘a'e malo i fanua le faataitaiga a le aiga tautai, ona faapea lea o upu: “*Se ua ite famulalo, auā ua iloa malaē ma ua sina le galu.*”

A tu-taula ma tutu fāatoga le fua i gatafāle o Sua, ona faapea lea o upu: “*Se ua alititia Malotumau ae manūtoao Fatuleggee,* ina ua tagata loaloa le vao, ua taalii foi le mafiu i le tuāau, ina ua le toe tu se ola, auā ua ooootu i le tai i eelele sa ma tupua le vaea o le itumalo, tulou, tulouna lava.

Faatulou i paia o le aso, le aufaigaluega mamana o le talalelei, e le toe lauvaeina le lafialalo o outou paia i se faamatalaga.
Faatulou atu i paia o le malo i ona ao, lau afioga i le Kovana Sili matafai o lo o agaia ma tuumumusu mo se manuia o lau faigamalo.
Faatulou atu i le lavaloa faalupe o le auvalaaulia o lea ua epa i le laumua

Faatulou i paia o le nuu (*faahupega o le nuu*)
O paia na o le asō, e i ai le lagona o le a nona ma faalelepa i e na leleo i le maota ma le sofoga o aiga ma upu i le Alataua, auā o lo latou nafa tausii lea.
Faaauau loa i au lava upu le polokalama lava.

Upu taufaau ina ua mae'a se sauniga o le faaipoipoga i le Malumalu Tapuai

Faataitaiga Malumalu

O lea ua mae'a manava le to'aalii ma mapu i le sasaga le seugana i Matautu Sa ma Fogaa, e ala i le hufilufina o lo tatou matupalapala faa-le-agaga lea na toina mai i lagī, e suli ma feoi o le talalelei, lea ua fai ma gapiā e faataumua-ava i le sauniga o le numuavaga ma le sakkarameta paia o le faaipoipoga, i le Susuga i le Faafeagaiga Taulagi olaulelele Sa na laulili ai upu valoia o le Tusi Paia e tuaa ua laлагomau i malae sa ma tupua tumau ma le afioga ia (*igoa o le Sa'o tamaitai*). O paia o lenei aso ua faavaotutu i ma tauumatasi i le tupuatausi o Asotau, tainane le ‘Ala ma le Mila o le Atua, o le a le tote tofi’ulu pe sama-susquina i se faamatalaga, e pei o upu i le lagimalofie. Niunuu la ma faalelepa e pei o le fua i le atuvasa paia ia i Tama Matua ma Tootoo, auā o lo latou anava-tauave lea, e tauasi vaatele i paia ia.

Ae o le auga tonu o le tulai i le ava ma le faaaloalo, ona o lo matou va nonofo ma le tamaitai faatoa nosotane, le afioga i le Leiuua etusa o tulaga faaleaufaipese auā viiga o le Atua i lona malumalu paia. O upu lava e fai i le faiva o le Alofaga, ia mālu lava i puega lou finalo, e faitau ane ai se ‘ai e pei o upu i le tapalega, i se meaalofa ua

taumafai e tulaga faalupe o le aufaipese (*faahippega o le aufaipese*). O upu foi o le atumu i suaga o le numuavaga, e sali popo oe ma fai sali mata, vae ane ou paia faatalalelei, ae totō laufala a'u ma faulafausa e tua i ai matalalaga auā aso faapenei. Peitai, ua le apaapa lava i ie o au'afa faapolopolo faamatu moepo e tofafa i maota e affio ai Alo o Salamasina, tainane Tapaua e mapuepue ai Asotau, po o ni moega lafo e moenai i laoa o le Faletolu ma Falealili. Talofa, ua na o manava o Mailie'i a e fia manu ni mea se tele e oloa luuluu ai le aso ma 'afu ai se faamatatalaga vaivai, ae ua pau o le foai a le Atua i matou lima. O le tatalo, ia sopomua manū i le aiga fou, ponā i vao ma faaualualuō mala, ae aua lava ne'i pu'aina i ala. Galo ia i le si'upapa o Aa se sese/aleu o le aufaipese, ae tuli-matagau so tatou 'ai mo le galuega a le Matai.

Manuia le ulugalii fou, manuia le au valaaulia
Soifua

Sailili Atili

Manatu anoa muamua – O le a sou lagona i le faaaogaga o upu o se faasinomaga o lo o tupu ai le faalavelave e fai ai lau lava tuvaoga?

Manatu anoa lona lua – E le logo malie i se faafogoga lou talanoa i se faalavelave i se tasi afioaga, ae fai ai fua upu o le isi afioaga. Se'i faaali sou taofi i lea mau?

Manatu anoa lona tolu – E tatau lava ona suisui tuvaoga i mea e tutupu, nei mea ane ua maua sou gao i tagata o lo o faalogologo lelei i au tuvaoga, ona faapea lea o so latou manantu, ua sau foi la tatou tama "se ua savini faapuna o manifou lagona o le taeao." Ua oo lava la i lauga o otu, ua fai ai lava lenei tuvaoga le fetaui.

Manatu anoa lona fa – Tusi sau tuvaoga o se faafeiloaiga o se malaga.

Faaafe

O lea ua mau-falega ma manutu mai i maota le paia maualuga i le au valaaulia lautogia, lea ua sii mai le fala siigatā ma faamaloulou mai e sila-maimoa ma le toto'a, a o se seu silasila manino e tusa o le manulauti o lenei aso ma le faamoemoe. Mapu la i falamatū ma papā le gae'e paia ia, aua o Samoa o le ao mammala i le faasouga o ao. O lea ua lepa i maotaga le faaaafe vaivai a lenei foi itu o le galuega, talu lava le naunau faataiofafineleavi mo se lelei, ina ia meā le aso tele o le tamaitai faatoa nofotane, po o le afioga ia Leilua. O le mea lea, e lelei ona fofogaina se faafetai, ona alo lea i le taliga o le sua ma le faaaloalo lava.

Saafiga o le 'ava
Tootoo: Papu Tolefoa (SAM 261, ASCC).

'AVA, 'AVA, 'AVA

1. 'Ava sa tu i uluai 'ava, lea ua ati ma toso e atiu o Sagaga. Ua pagau mau ua salalau, ua 'ava ai nei le atu laulau. 'Ava sa tauilo ai Salevao, ma le aiga e itu hasi, pe tanoa selau, pe tanoatasi. O unaolei'asa, o fetajaimauso, ma 'ava felafoai, o lea ua ou tau-limaina le laatasi. Ua i aisle 'ava tasi.
2. 'Ava o 'ava, 'ava sa faaagaga e sua e leo ai maota o alii ma laoa otuua. Talofa i le utiuti o lau faaso, ma ua te'a le inati o le tanoa. Luilui malie la ia galuega a le tausala ma le aumaga, se taimi alaga ia oe le faaso 'ava, o lea ua fotu pule le faiva o tama. Ua silimaa foi le seuga ae se i tapa ipu o le taeao 'ula. Tufa le 'ava lua.
3. 'Ava mata, 'ava tugase, 'ava felefelé, 'ava olo, o 'ava na aao mai e le alii taeao i le paia o le (faalupega). Ae usu faaaloalo mai ai (faalupega) ma le nofo a faleupolu, ua i ai le latasi, 'ava felafoai e luga, a ao le malae ua tolu.
4. 'Ava na sua mai i le faalava i lugā, fufui i le vai o Tutaga o le Vaaloa, folia i maliae i Malaoa, lea ua mago faala. Ole a fai i ai le pule a le faatoafaiava, te'a le inati o le tanoai i le tausala ma le aumaga, te'a le luplesina i le matuatala ma 'ava i le talatumaga, 'ava o totroe o le a manoai i tua nei, ona o le aso e la. Faamalo le pule, ua te'a le 'ava fa.
5. 'Ava, 'ava e, ta inu ae ia i se ipu 'ava. O le 'ava a Tagaloamama ma Pava. O le 'ava sa lafita'i auā malo fegasoloai. O 'ava o velev-elega ua ati aa ae tōtō ona ata. Talu ai matematega ma suegamalo a Aiga ma a latouTama, Tautē le afioga i 'Ava Lima.
6. 'Ava mo Samoa ua potopoto, Manu'a, Falesefulu, Tumuua ma Pule e ono. Le 'ava ua toso, po loa le fala, see i luma le pule'ava, faleo lau faaaloalo ma lau faatupu, faatali malo, ae a le maau lea ua oo i le tai oooo. Faafetai mau 'ava i le paia i le 'ava ono.

Solo ma Saafiafiga:

7. ‘Ava lafi fitu, e feai toe liu aitu. Malalatea asa mai le ‘ava se’i fai ai le ‘ava o Tuimanu’ a ma le faletauaitu. ‘Ava lea a le falefitu. Ua atoa ‘ava e fitu. O Ao o malo mai iu o gafa e tasi le faafitiga o aleaga, o Suasamiaavaa o Samoa le toala faaautama o le ‘ava. Faaeteete tamaiti nei soli le ‘ava, auā o le faasallaga o le alalua o le tagata. Saili mai ia so tatou ‘ava auā le faigamalaga. Aami ‘ava o ipu o le faleula tautagata ma le faleula tauaitu. Ua manutu ‘ava e fitu.

8. ‘Ava e mamalu, e le pisa, pe tautala pe gaoiā auā e paia le alofisa. Vaai lelei po o ua māvae le fau ma le laulau. Manatua, e sila alofi le maota pe a uma ona palu, taualaga ia oe le tufa ‘ava, ia tulai se tama, auā ua mai vai ae magalo ‘ava, ae tapa se ipu mo le faiga malaga, a e a le fesilafāiga i lenei taeao ua mammalu. Faatali maia lau ‘ava valu.

9. ‘Ava o feiloaiga, ‘ava o veleveleaga, ‘ava muāau, ‘ava o evaevaga, e see ai le tausala, ae alaga ai le tufa’ava, ina ua pati lima le au toeaīina, le alofi lea ua fai e le Falesefulu ma Tama Matua o Falelima, ‘ava e asu mai i ou lima, aumaiā, ‘ava e iva.

10. ‘Ava faatupu, e leo e ilamutu ma a latou sulu, ae a le alofisa o Malietoa ma Tuimanu’ a i Pomaseme le tai samasama o le tupu. ‘Ava ua faasinasina i le va o le lagī ma le lalolagi, tapa ipu ai aiga taitasi ma e masani, laga ai le maasiasi ma le toilalo popo aiai, saunia i lona lava tino ma lona toto e Iesu le Mesia, le tupu o tupu. Taute le ‘ava sefulu.

SOLO MA MAFUAUGA O FAIVA O LE GATAIFALE

Tusia: Telei’ai Fanaea C Aussage – ASCC

Sa fetumai nei le muniao i le aiga tautai
Ua tasi moemoe o le sikola, o le a muamua mai
E taumafai e tulifui’ aupu le atu a le sa’u
Upu o le atunu o le a tauau ina mou atu.

Se miti ea po o ni manatu faivavale

Muagagana ma Alagaupu o lo ta gataifale
Le tiuga malie ma le alofaga
O faiva faatama tanē o nuu ma afioaga.

E poto le tautai ae sese lana atu i ama
Auā e leai se tautai ei i ai se atoa i le liu o lona vaa
Sau le vaa na tiu, tau mai i le vaa na tau
A o lo o mamau lago o le vaa na faō i le afolau.

Se o le afa i le agi faasulusulu o le toelau
A o le la fala i le agi mālu o le fisaga o le sau
Aua le tolovaea le upega, e le oge maa le sami
Sina le galu, ite fanua a lalo i le vaa a le tautai.

Ua tau fai ‘ai le ofeloa ma le matila
Le tanta e fefé vale i le tauaannu, pa le fatitili, emo le uila
Le lafoa’i nei galō ma ia tapena mea uma i le vaa
O lea o le a motu ma le taula, e le iloa le taga e fai i le vasa.
Ae ia mata’i le siui o le faamili o atu.

Ua faapopo a ua o ni aso ua
O aso folau foi ua le tuua
To i’u, faasoa le faiva i le lau o le foe
Pe na o le pipii lava i le ama, o le i’ a lena ma oe.

Uhuu matāfolau le sailiga pa
Sasaa faaotī le utu a le faimea, saili le mataalia

Momoli la mālū i puega
Le tautai matapalapala e saili le agavaa i se faiva.

E uliuli le sami a ua iloa ala o i'a
E taa fua le atu a ua uma ona aisa
E uliuli le sami ae leai ni i'a fēai o i ai
Le sala a le tautai e fai ae totogi mulimuli mai.

Ua ou tu nei i siui ma sausau i le moana

O paia ua poto i le futiafu, ua aofia faga i la-ua
Ua tatā i tua o Fatutoa la'i o Puava
Se'i motu foi le pa a ua e iloa?

La seu le manu ae tagai i le galu

Aua e taa le galoo ae gase i paau

O se foe foi e faaee i le tau

Vaai le atu mua nei mamulu maumau.

O le tuualalo lena a le sikola, e pei o le aiga Sa-Saumani

O le uta a le vale e taofi mau, a o le poto e fetala'i

Aua le manao i le i'a ae manumanu i le upega

Tumau i le aganuu, taofi le aimiu o le iumaea.

Aumai lea o lou aao ta pola faaoso upu o lou gataifale

Ioe, o mea moni, e le o ni vaogagana taumatemate

Faafetai ua manua le vailiu e festaaso a'i ai o ta lagona

Auā o le sulu mu tele e maua ai figota.

Avea ia le Atua o le gataifale e faataumuavaa i lo tatou laa i vasā

O Ia foi e muliau, ina ua toe o ni aga ona liliu lea o le la

Foi se viiga pe a'a'e i manū le faatautaiga

Tautuana lo tatou tofi, lipoi le anava o le gagana.

Ua matuu atu se au'afa sa faapolopolo faamatuua moepo

Ua le natia, pe faalafi lilo i se to

Le fāasoa alofā lea ua tatala le ato ponapona

Ua le faapito manū ia tasi, ae mo tupulaga ina ia soifua ma ola.

Soifua.

Punaaoa o Saililiiga
Afutoto, S.T.T.O.L., 2009. *Po Tala o Samoa*. Lomiga 1: Apia, Samoa.

Amosa, M.L.T., 2000. *Fausaga o Langaa, Vaega 1*. Samoa: National University of Samoa.

Mailo, P., 1992. *Palefūiono*. PagoPago, American Samoa: Island Business Center.

Milner, G. B., 1961. *The Samoan vocabulary of respect*. Journal of the Anthropological Institute of Great Britain and Ireland.

Ministry of Youth, Sports and Culture,, 1997. *Samoa Ne'i Galo. Vol 1*. Apia, Western Samoa: Pacific Printers & Publishers Limited.

Pratt, G., 1984. *Grammar and dictionary. 3rd Edition*. Auckland: Pasifika Press.

Sauoiga, L. S., 1988. *Mavaega i le Tai*. Samoa: Methodist Church in Samoa.

Sauoiga, L. S., 1995. *Ia mana le lauga*. Apia: Vasai-i-Faletaea Printing.

Samasoni, L. D. C., 1999. *Tusi lauga gagana a faleupolu. Vaega 1*. Honolulu: Samoan Service Providers Association.

Samasoni, L. D. C., 1999. *Tusi lauga gagana a faleupolu. Vaega 2*. Honolulu: Samoan Service Providers Association.

Samoan Studies Institute,, 2009. *Ua Tala le Taui. Vol 1*. American Samoa: American Samoa Community College.

Simanu, A.M., 2002. *O Si Manu A Atii*. University of Hawaii Press: Pasifika Press.

Sunia, F.I.F., 2000. *Measina a Samoa*. Fiji: Oceania Printers Limited.

- M Tavale, T.T., 1999. *Fuelavelave*. New Zealand: Wordsell Press.

L₆ Tu'i, T.F.M., 1987. *Lauga: Samoan Oratory*. Suva: University of the
E South Pacific.

E Henry, F., 1980. *Samoa: An Early History*. American Samoa: Ameri-
can Samoa Department of Education.

L₆ Kramer, A., 1994. *Samoa Islands. Vol 1*. Auckland, New Zealand: Pol-
ynesian Press.